



PAMFLET

393











ORATIO  
DE PACANDA ET COME  
PONENDA REPUBLICA  
AD BELGAS,

IN QVA MALORVM PVBLICORVM  
tum prateritorum, tum presentium & futurorum, pra-  
sentem patriae ruinam minitantium causa vera  
cum veris eorundem remedijs bona fide,  
& quasi digito, demon-  
strantur

A BALEO CARFENNA  
HYLANDRO.



Esaie 52.

Quam speciosi sunt super montes pedes euangeli-  
zantium pacem, pradicantis bona, euangelizantis salu-  
tem, dicentis Sioni: Regnat Deus tuus, &c.

ANNO 1578.

393







# ORATIO DE PACANDA ET COMPONENTA REPV- BLICA AD BELGAS,

*In qua malorum publicorum, tum præteritorum, tum  
præsentium & futurorum, præsentem patriam ruinam  
minitantium causa vera cum veris eorundem reme-  
dijs bona fide, & quasi digito demonstrantur.*



**N**EMO quidem nostrum non vi-  
det, aut ullo modo dubitandum  
existimat, inclyti Belge, quin ma-  
ximarum ac propè infinitarum cla-  
dium nostrarum, quas velut ag-  
mine quodam perpetuo, & spa-  
tio annorum plusquam duodecem, funestissimum  
hoc bellum civile nobis invexit, & in posterum  
ira divina denunciatur, causa sint peccata nostra,  
quibus ad iustam vindictam Deum nostrum pro-  
vocavimus: Quæ tamen illa sint, quamque in-  
visa Deo peccata, quoniam paucissimi nunc vel  
opinionum errore atque ignorantia, vel pervicacia,  
atque aduersus verbera divina contumacia, sa-  
tis probe perpendunt, hinc est, quod in tot tan-  
tisque malis publicis vera calamitatum remedia  
non modò nondum inventa, sed nec requisita  
quidem publicè, nec tentata sint hactenus.

Sicut autem in ægro affectoque corpore  
non alius demum verus morborum atque sym-  
ptomatum medicus fuerit, quam qui causas

A ij

&c



## ORATIO

& originem eorum recte deprehenderit com-  
monstraveritque, ita & quassatā, contusam, con-  
fractamque motibus bellorum civilium repu-  
blicam melius nemo pacaverit, curaverit ac sa-  
naverit, quam qui ipsa malorum principia rite  
perspecta bona fide detexerit.

Cæterum quæ ad hunc usque diem à nobis  
admota agræ Reipublicæ remedia sunt, his non  
solum nihil mitigati, sed contrà magis exacerba-  
ti dolores fuere: ut non minus mirū videri pos-  
sit, si talibus pharmacis sanari mala nostra posse  
credamus, quàm si ad scopū pervenire aberran-  
do contendamus, & ruendo in voluntarium exi-  
tium nihilominus salutē, cuius portū subire recu-  
semus, sperare audeamus. Ut autē fisti tandē rui-  
na nostra, & sanari vulnera, ac melior imposterū  
vivendi via inveniri queat, consilium est mihi,  
prius ipsam malorū causam bona fide demōstra-  
re: deinde curandi viam aperire, ad eamq; cape-  
scendā vos cohortari. Sed ante omnia rogandi,  
Belgæ, atq; obtestandi mihi eritis, ut si forte du-  
rior oratio insuetas aures vestras minus jucunda  
veritate pulsaverit, ne aliter animis afficiamini,  
quā suadet pericula in quibus versamur, neve sa-  
lutaria cōsilia ideò repudietis, quòd fortē minus  
blanda molliaq; prima fronte videatur: cum nō  
sit ejusdem & jucunda & utilia in extremis ma-  
lis consilia dare. Si tamen, quæ vestra prudentia  
est, pro dulcibus ea reputabitis, quæ Reipublicæ  
ac vobis universis salutis viam ostendent, opti-  
mè



## AD BELGAS.

mè mecum actum, omneque me tulisse punctū putabo, si pro publica univerſorum ſalute, qualicunque etiam eventu meo, laborādo beneque monendo profuiſſe me vobis, & promoviſſe gloriam Dei regnumque Chriſti intellexero. Quod quò commodius poſſim, & illud vos rogabo, ut ab omni ſpecie externa ſevocatis in publicā ſalutem auribus atque animis, non quis ego & quos alloquar, ſed quid, & cuius nomine imperioque dicturus ſim, etiam atque etiam mecum conſideretis.

Vt ergo ad rem veniam, quia extra controverſiam eſt, & non niſi cecis profeſſisque Dei, patriæ, omniſque honeſti hoſtibus contemtoribusque ignotum, peccata noſtra, publica que ſcelera poenarum quoque publicarum cauſas eſſe: nec illud magnoperè ambigi puto, nos in utramque diuinæ legis tabulam graviter deliquiſſe, hoc eſt totam legem violando, & Deum ipſum & homines non leviter offendiſſe, idè non immorabor huic loco. Hoc autem poſito fundamento, videamus deinceps, qua potiffimū re Deum, qua item homines læſerimus.

Conſtat autē cū totius & Prophetiæ Apoſtoliæque doctrinæ concordibus testimonijs, tum & hitoriæ ſacræ conſentiētibus exemplis, non alia re magis, quā idololatria, violari debitam Deo obedientiam, ejuſque juſtam iram & vindictā in homines accendi. Porro idolum tum coli dico, quoties veneratione divina ado-

A iij

ratur



## ORATIO

Deut. 6.  
32.

Marc. 7.

Deut. 4.

Ex. 12.

Levit. 10

Exo. 20.

ratur observaturque, quod natura Deus nō est: homo sit illud an angelus, aliudve quantumvis nobile opus manuū Dei licet. Præterea idolum colitur, quoties non solum fictitium numen pro ipso Deo subiicitur adorandum, verumetiam cum aut colitur quidem Deus, sed nō solus: aut solus quidem colitur, sed non eo, quem ipse præcepit, cultu: aut cum contempto verbo Dei ac salutari doctrina, pestiferæ lacunæ, peregrinæ doctrinæ & hominum decreta sacrosanctis ac salutaris euangelij fontibus admiscuntur. Tametsi enim Deus totius legis observationem veramque præceptorum omnium obedientiam postulat, & violationem cuiuslibet partis severè punit, tamen eam præcipue legis partem religiosè nobis servandam tradidit, qua præcipua & totius legis princeps pars, hoc est, ipsius adorandæ Maiestatis cultus continetur, quæque ideo ad gloriam cultumque divinum propriè pertinet: ejusque tam profanatores quam violatores, ceu divinæ Maiestatis suæ perduelles, severissimè vel cum clade atque intereptione universarum urbium, gentium, populorum & regnorum prosequitur: Atque hac de causa statim ab initio promulgatæ legis inter ipsa capita prioris tabulæ, cum se Deum fortem & gloriæ suæ zelotem appellasset, omni que idololatriæ specie verbis gravissimis populo suo interdixisset, mox subdit, se nominis ac Maiestatis suæ profanationem in tertiam quartamque authorum stirpem vindicaturum.

Sic



## AD BELGAS.

Sic & apud Esaiam prophetam iterum ac *Esai. 42*  
 sepius inculcat, se gloriam suam alteri non da- *& 48.*  
 turum, nec laudem sculptilibus, eò quòd ipse  
 primus sit & novissimus, hoc est, verus solusque  
 Deus, conditor creatorque cœli ac terræ. Ideo-  
 que puniturum se perditurumque populum re-  
 bellem ac verbi sui contemptorem severe denun-  
 ciat. Christus quoque ipse futuræ mox Iudæo- *Mat. 24*  
 rum ruinæ præcipuam solamque causam immi- *Marc. 13*  
 nute majestatis Dei, & spreti repudiatiq̃ue Mes- *Luc. 11.*  
 siæ atque euangelij impium crimen commemo-  
 rat. Paulus ob ingratitudinem neglectumque *Rom. 1.*  
 cultum Dei, quem ex mundi creatione cogno-  
 verant, gentes à Deo abjectas, suisque cupidita-  
 tibus ac perversæ menti ita traditas affirmat, ut  
 cœcæ in omne deinceps nefas sese præcipita-  
 verint. Sed quia hæc & similia testimonia  
 in Scripturis volenti legere sacra Biblia nusquã  
 non obvia sunt, omisis illis, percurramus & ex-  
 empla quædã vindictæ divinæ in contemptores  
 verbi Dei & Idololatrias edita.

Ut autem hic ridiculum illum Aaronis *Exo. 32.*  
 & Israëlitarum in Arabiæ desertis erectum vitu-  
 lum præteream, qui certè funestus populo  
 fuit: ut non dicam de summa ejusdem po- *Num. 14*  
 puli in Deum ingratitudine, qua per annos *Psal. 95.*  
 quadraginta continuos Deum exercuit, & se  
 promissæ Chananæ possessione indignum red- *Judic. 2.*  
 didit: ut non commemorem totam Iudicum hi- *&c.*  
 storiam, ubi præsens semper vindicta recens

A iij

apo.



## ORATIO

apostasiae crimen excepit, nota est Eliae prophe-  
 ta ad Achabum Regem seditionis ac turbarum  
 crimen a se conmissum ipsi objectantē, respon-  
 sio : Non ego (inquit) Israëllem turbo, sed tu &  
 domus patris tui, qui deseruistis praecepta Domi-  
 ni, & sequuti estis Baales. Dedit itaque mox  
 & ipse Achab cum suis impietatis & in divinas  
 admonitiones contumaciae meritas poenas. No-  
 ta & Hieroboami, Iorami, Ochosia, similium-  
 que Regum historia. Et ne singulos persequar,  
 notus, inquam, est tristissimus vtriusque populi,  
 tam Israëllici quam Iudaici exitus, qui propter  
 depositam beneficiorum Dei gratiam memoriā,  
 desertumq; cultum ipsius ab Assyrijs Chaldeis-  
 que sepius bello petitus ac repetitus, tandemq;  
 victus, ac proprijs sedibus expulsus, spoliato e-  
 versoque templo, quod impietate sua profana-  
 verat, in miserabile ac diuturnum exilium ab-  
 ductus est: adeo ut repetita conduplicataque ge-  
 mini exilij atq; exitij clade penè ad *panoethria*  
 sit redactus. Sed omnium notissima, & ad oni-  
 nem memoriam nobilissima, tam urbis Hiero-  
 solymitanae, quam totius gentis sub Tito Vespasi-  
 ano facta expugnatio everfusioque. Nam post  
 longam calamitosi belli moram, post infinitas  
 cades, ac urbium agrorumque vastationes ob-  
 sessa, expugnata, & solo aequata Hierosolyma,  
 templum quoque ipsum spoliatum exustumq;  
 est, totusque populus pecudum in morem par-  
 tim foede contrucidatus ac mactatus, partim vi-  
 lissimo



## AD BELGAS.

lissimo contemptissimoque precio in perpetuam  
& miserabilem servitutem addictus abductusque  
fuit. Ut mirari merito quis possit, cur eum popu-  
lum, quem mira benignitate præ ceteris dilectum,  
in Abrahamo adoptatum, cultui & gloriæ suæ, ceu  
peculium sibi Deus elegerat, quem plurimis be-  
neficijs, miraculis, victorijsque ornaverat, in quo  
per tot sæcula Ecclesiam suam ac fœdus conser-  
vaverat, ad quem denique unigenitum filium mi-  
serat Christum & redemptorem, tam gravi exem-  
plo, tamque ineluctabili exitio perdere sustinue-  
rit. Sed tantam ultionem merebatur spreti nu-  
minis, neglectæ religionis, & erectæ idolomanie  
impietas. Hoc ergo unum est maximumque sce-  
lus, quod quia propriè in ipsam Dei summam  
Majestatem committitur, non potest aliâ, quam  
summam ultimamque pœnam commereri.

Accedit alterum vicinû cognatumque huic,  
nempe crudelitas in Vates Dei, piôsque docto-  
res, qui impijs cultibus adversantur. Est enim  
hoc omnium idololatrarum ingenium, ut quam  
stultè atque extra verbum Dei sunt amplexi su-  
perstitione, eam cõtra verbû Dei furiosè crude-  
literque tuendâ existiment. Huc enim semper spe-  
ctarunt sanguinaria tyrannorû edicta, ut quam  
approbare ratione divinitus doctis non poterât,  
terrore suppliciorû in animis hominû munirêt i-  
dolorû suorû veneratione, & si qui meliora con-  
silia sequuti morem non gererent, è medio tol-  
lerent. Ideo Nebuchadnefar Babylonius erecto

A v

ingen-



## ORATIO

- Dan. 3.** ingentis molis idolum edicto colendum omnibus præcipit: recusantem Danielelem cum socijs in fornacem ardentem conijcit.
- Dan. 6.** Darius quoque eundem Danielelem ob contemptum impij edicti laniandū immitissimis leonibus obijcit.
- 1 Reg. 18.** Achabus & Iezabel superstitionē idolorum crudelitate ac cæde prophetarum Dei consecrandam sibi putaverunt.
- Joachimus rex Vriam Semeium impietatem regis & populi castigantem, & ni resipiscerent, exitium regni atque urbis denunciante occidit, teste Jeremia. Ipse quoque Jeremias vates reprehensa idololatriæ à populo & Ioachimo Sedechiaque regibus & tota sacerdotum caterva pelsimā iniijt gratiā. Assuerus Persarū rex consilijs impij Amanis impulsus, & stimulis idololatriæ suæ subactus, odio veri cultus Dei adeo sæviit, ut extorrem gentem Israëliticā & per regna sua dispersam propter professionē veræ religionis uno edicto trucidare universam constituerit.**
- Antiochus Epiphanes devictis Iudæis occupataque Hierosolyma, studiū idolorū & odiū legis divinæ immani sævitia adversus omnē ætatem, sexum ac professionem promiscuè exercuit.**
- Sed & ipsi Iudæi, corrupta iam sedē religione, teste Christo domino, missos divinitus prophetas pari truculētia, qua gentes impiæ, morte multarunt: tandemq; & ipsum Christum dominū, spem salutēque suam, per tot secula promissum atque expectatū, finem scopumque legis ac propheta-**



## AD BELGAS:

phetarum, odio veræ doctrinæ atq; æmulatione  
in venerati erroris, nulla non injuria probroq; af-  
fectum in crucē egerunt: non minùs stolidè quā  
impiè unicum pacis ac salutis vitæque authorē  
perdere, quā non retinere receptā superstitionē  
malentes. Idem furor Iudæorū Ioannem, Iaco-  
bū, Stephanū aliosq; Apostolos, atq; ipsos adeò,  
postquā Christi innotuit ortus, infantes Bethle-  
hemiticos perculit. Quod si cui porrò libet co- Matth. 2  
gnoscere, quo furore sævitiaque ab idololatriis,  
jam inde ab ipsis Ecclesiæ Christi incunabulis,  
impij cultus defensi, veraque euangelij doctrina  
repudiata sit semper, pulsis, cæsis, jugulatis, mer-  
sis, exultis, ac ferarum rictu laceratis doctoribus  
ac professoribus, evolvat ecclesię historias: & vi-  
debit luce ipsa meridiana clariùs, eundē esse, qui  
semper post orbem hunc conditum fuit, & falsæ  
doctrinæ authorē, & cediū immanissimarum in-  
martyres Christi patratorē spiritū. Neque enim  
potest non verissimum esse veritatis ipsius Chri-  
sti hac de re testimoniū, qui requirentibus ipsum  
ad necem Iudæis, verissimè compēdiosissimèq;  
respondens hæc duo unico planè in versu con-  
juxit, et: Quia nō potestis, inquit, audire sermo-  
nem meū, vos è patre diabolo estis, & desideria  
patris vestri vultis facere. Ille homicida erat ab  
initio, & in veritate non stetit: quia non est veri-  
tas in eo. Cū loquitur mendacium, è pro-  
prijs loquitur: quia mendax est, & pater menda-  
cij, &c.

Hæc



## ORATIO

Hæc ergo duo præcipua sunt, & sibi mutud  
cognata idololatrarum peccata, idolorum cultus,  
cum Dei contemptu, & crudelitas adversus pios  
fidôsque Ministros ac Prophetas Dei, adeò invi-  
sa Deo, ut eorum atrocitate irritatus, & urbes &  
gentes integras sæpè gravissimè afflixerit ac per-  
diderit: & tandem suum illum ex omnibus popu-  
lis selectum, præque omnibus dilectum, & in  
Abrahamo, Isaaco ac Iacobo electum adopta-  
tumque populum, crebris incommodis, cladibus  
exsilijsque exercitum, ac postremò justo iudicio  
damnatum, percussumque affectata cæcitate, fu-  
rore ac væsania horrenda, cum internecone to-  
tius gentis ac penè nominis Iudaici cum ipso pa-  
trix solo everterit: & qui cædibus superfuere, ex-  
torres sedibus patrijs, ceu miserabilia mancipia  
Romanorum aliarumque gentium, in hunc us-  
que diem, nobile per tot secula divinæ in ido-  
lolas iræ sint documentum. Hic ergo Iudaicæ  
impietatis, crudelitatis & contumaciæ exitus  
fuit.

Sed videamus, an & nos Belgæ his tantis ma-  
lis obnoxij, calamitates ac misérias, quibus nunc  
multos annos conflictamur, miserèque involvi-  
mus, & quas in futurum nobis minatur Domi-  
nus, norundem peccatorum nomine potissimè,  
ut pœnas, sustineamus. Equidem ut facile con-  
cessero id, quod de flere etiam cogor, eum apud  
nos hodie vitiorum omnium proventum, eam  
flagitiorum omne genus ubertatem, & (ut ita  
dicam)



## AD BELGAS.

dicam) fecundam quandam messem scelerum esse, ut iudicatu perquam difficile sit parum exercitatis, quænam potissimum, & an universa simul malorum nostrorum bellorum, seditionum morumque perditissimorum fontes & causæ sint: ita affirmare, atque etiam sanctè adjurare non dubitem, contemptum numinis cultumque idolorum, & grassantem hactenus apud nos per infinitas piorum hominum cædes crudelitatem nostram, tam reliquorum vitiorum ac flagitiorum, quam poenarum, turbarum, motuum, seditionum, ac civilium discordiarum, bellorumque funestissimorum fontes uberrimos, ceu pixidem Pandora extitisse. Et meritò quidem justoque vindictæ coelestis iudicio. Solet enim neglectum sui desertumque cultum ita uleisci Dominus, testante Paulo, ut desertos à se, qui vitæ ac boni universi fons est, deditosque impijs cupiditatibus, ut reprobam mente suapte natura in quævis flagitia ruant præcipites: donec confecta scelerum periodo, in ultimas se poenarum suarum poenas ipsi demergant, funditusque perdant idololatram.

Quid ergo? dicat forsitan aliquis: An tu nobis vel Ethnicorum deorum, vel etiam Iudaicorum idolorum cultum obijcies? Ecquem nos Martem impium, aut Iovem Olympium, Lapidemve juravimus unquam? Quam nos Matrem deum, aut Venerem Cypriam, aut Dianam Ephesiam venerati sumus? An non Christi à Iudæis repudiati cultores fidei sumus, cui templa dedicavimus,

Rom. 8.



## ORATIO

mus, ac divinos honores in hunc usq; diem magna veneratione deferimus? Cujus aras quotidianis hostijs pro vivis ac defunctis religiosè imbuimus? Nónne ad ejus sepulchrum, crucem & reliquias magna religione ex traditione majorú, non absque summis rei, vitæ, liberorum & conjugum periculis, per maria ac terras adorabundi concurrimus? Quid? an nō & sanctis ipsius Apostolis & martyribus templa cœlestesq; honores pari, qua ipsi Christo reverentia & cultu, infinitisque propè ceremonijs cōsecravimus? & si qui hæretica audacia cōtra hæc vel mutire sunt ausi, hos magno zelo ex autoritate Apostolica castigavimus? Vbi ergo ille, quē nobis improperas, idolorū cultus? Vbi numinis contemptus? Vbi sevitia in prophetas ac martyres Christi? Dicam, quòd dicturus veni, non quidē aut contēdendi, aut reprehendendi libidine, sed tantum monendi aut plagis nostris medendi studio, & mei insuper, qui Christo in fidelem hanc militiam nomē dedi, muneris ratione, piōque promovendi inter nos regni Christi desiderio ac zelo. Dicam ergo, clarissimi Belgæ, faventibus vobis, quod sentio, & quod res est, quòdque tacere nefas ac summū impiæ desertionis crimen existimo.

Et primū quidem omnium non nego, quin omnia ista, & plura etiam istis, perquā studiosè fecerimus. Addo etiam, si hoc est rite Deum colere, Christoque Domino & Servatori nostro bona fide servire, debitumque cultum atque gloriam



## AD BELGAS.

riam tribuere, quod injussu ipsius contraque ca-  
nonem fidei sumtuosas insanasque basilicas tam  
in hominum defunctorum, quam Dei ipsius ho-  
norem exstruximus: quod ad adorandas crucis di-  
vorumque tanto jam antè mortuorū reliquias  
capsis sepulchrorū erutas inque pompam produ-  
ctas tanto æstu concurrimus, easque pari, & ma-  
jore etiam, quam Deum ipsum, honore venerati  
sumus: quodque eos, qui nos è scriptura, hoc est,  
ex ipso ore Dei meliora docuerunt, & currere  
nobiscum ad adoranda opera manuum nostra-  
rum noluerūt, strēnuè jugulavimus: hoc, inquā,  
si rectè ac piè numen est colere, non possumus  
non religiosissimi videri, omnemque pietatis im-  
plevisse cumulum existimari.

Verū si illud demū veræ pietatis minimæ-  
que adumbratæ religionis est munus, eum solū *Deut. 6.*  
Deum agnoscere & colere, qui solus est Deus ve *Matt. 4.*  
rus, eoque cultu solo, quem solum ipse requirit,  
excluso omni inventitio cultu ac peregrina do- *Marc. 7.*  
ctrina mortalis hominis: hæc ipsa, nimirum,  
erunt, quæ in modò dicto cultu reprehendenda  
veniunt, quæque turbarum omnium ac tumul-  
tuum cladiumque publicarū verissimas causas  
& principia esse, & futura porro ruinæ dolorū-  
que nostrorum initia, nisi nos ad se convertat, &  
pestem imminentem clementer avertat beni-  
gnissimus Deus, non sine causâ metuimus. Atq;  
hunc metum ut pium esse non dubitamus, ita  
non fore vanum mox ostendemus.

Nam-



## ORATIO

Námque hoc modo quot divos adoravimus,  
 totidem deos fecimus: quot ossa hominum vita  
 functorum, quot reliquias ac statuas ad cultum  
 produximus, totidem idola contra Deum crexi-  
 mus: quot sacrificos, missas ac sacrificia pro vivis  
 & mortuis fecimus, tot Christos, summos æter-  
 nosque Pontifices ordinis Melchizedechici ad  
 æternam unici Pontificis Christi injuriam, per-  
 ennisque sacrificij mortis ipsius contumeliã fa-  
 bricati sumus. Semper enim illud retinendum,  
 ut unus est Deus, ita adorandos plures non esse:  
 ut unus Christus *Mesites* Dei & hominũ, Ponti-  
 fex perpetuus, qui unica corporis sui hostia pro  
 cunctis mundi peccatis in perpetuum satisfecit,  
 ita novos quotidie sacerdotes instituere, qui nul-  
 lo non die infinitis per orbẽ sacrificijs tam pro  
 mortuorum quàm vivorum delictis Deo idem  
 illud corpus Christi, quo semel in æternum lita-  
 vit ipse, sacrificent in victimam, sine probro ac  
 ludibrio æterni sacerdotij Christi, fas non esse.  
 Docet enim Scriptura, unica hostia Christi non  
 solum typica illa Leviticorum sacerdotum sa-  
 crificia impleta abrogatãque esse: verum addit  
 etiam, nullam amplius hostiam pro peccatis re-  
 liquam esse. Aut igitur unus esse Deus, unus in-  
 ter Deum hominẽsque *Mesites* homo Christus,  
 una litatoria pro mundi peccatis hostia esse de-  
 finet: aut nos colendo plures, & requirendo alias  
 victimas & sacerdotes, verissimos esse, & nume-  
 ris omnibus absolutos Idololatrias plũs quàm  
 mani-



## AD BELGAS.

manifestissimū est. Neque ad rem facit, quod nec Osiridem Isidemque, nec Iovem Iunonemve, nec Martem aut Venerem, neque ex obsoleta gentilium Iudaicorumque deastrorum turba, ac cæli denique ipsius splendidissimo exercitu quemquā hodie divinis honoribus atque altaribus nostris dignamur. Illud enim in confesso est, nos verum illum, qui nos & omnia condidit ē nihilo, Deum, & verum illum, solum summūque Pontificē, qui pro omnibus unica litatoria corporis sui hostia litavit, Christū cum Spiritu Sancto non piē colere: quia neque solum neq; ex ipsius præscripto colimus. Vbi autem Deus non adoratur solus, nil refert, quemlibet ei socium, quodlibet idolum ex universis operibus manuum ejus ipsi adjungas: sint hæc vel angeli rerum omnium creaturarum nobilissimi præstantissimique licet. Sive enim pro Deo, sive cum Deo, aut præter Deum numē aliud quodvis fictitium veneremur, spoliari Deum suis insignibus semper necesse est, ad quoscunque ea demū vel socios, vel æmulos, vel ministros transferamus.

*Apo. 22*

Atque hic profectō fuitiles sunt & frivola rationes superstitionis nostræ de meritis hominū quantumvis sanctorum, neque sanē unquā hac dibapho scruina idolomania nostræ contegemus. Divini enim honores non meriti sunt, sed nature, nō dignitatis, sed majestatis, non opere,

**B**

**sed**



## ORATIO

*Galat. 3.*  
*Rom. 11.*  
*Rom. 4.*  
*Psal. 51.*  
*Rom. 7.*  
*Galat. 3.*  
*Rom. 7.*

sed gloriæ. Deinde quid hominum merita cælo  
 reponimus? qui si sunt homines, certè dij non  
 sunt: si Adami posteritas, peccato suo mortem  
 nobiscum, at meritò Christi veniam, justiciam  
 atque immortalitatem fide & gratia sunt conse-  
 quuti. Omnes enim ex æquo homines sub pec-  
 cato ac morte conclusos Deus tenuit, tenetque,  
 ut omniū misereatur: utque omnis justiciæ, mi-  
 sericordiæ meritique gloria non inter Deum ho-  
 minesque divisa, sed apud solum Deum in soli-  
 dum remaneat illibata. Quòd si verò, teste Pau-  
 lo, ne Abrahamus quidem ipse credentiū omniū  
 pater, ac verum vivumq; fidei exemplar habet,  
 quod gloriatur, nisi de merito justiciæ Christi, ac  
 gratiæ Dei Patris, quonam merito Deos facimus  
 ipsius posteros, quorum ut quisque optimus in-  
 tegerrimisque fuit, ita se in peccatis conceptum  
 natumque, sub peccato venditū, injustum mor-  
 tique addictum, ab una Dei clementia meritò-  
 que Christi omniē salutis & vitæ æternæ immor-  
 talitatisque spem expectare confirmat? At-  
 que hoc est, quòd Paulum, postquam hoc ipsum  
 argumentum Romanis ex professo inculcasset,  
 in hanc exclamationem ac deplorationem sui  
 prorumpere coëgit: Miserum me, quis me li-  
 berabit ab hoc corpore morti addicto? Nec  
 miseriæ suæ ulla alia, quàm divinæ misericor-  
 diæ meritique Christi consolatione ipse mox  
 occurrit: Gratias, inquit, ago Deo per  
Iesum



## AD BELGAS.

Iesum Christum Dominum nostrum, & cæt.

Cùm ergo universæ miseræ suæ mortisq; eter-  
næ in ipsis hominibus quantumvis excellentib;  
resideat causa, quâ ipsi in se non tantum agnos-  
cunt, sed & deplorant, & contrà in mera libera-  
litate Dei Patris ac merito Iesu Christi omnis  
spes ac fiducia salutis, quâ ubique ut magnificis,  
ita veris tamen encomijs deprædicant, facessat  
atque evanescat vanissima miserorum hominu-  
tionum gloriola, & stulta Deoque & Christo  
injuriam meritorum humanorum præsumptio &  
cavillatio, quæ solidam, ut conditi, ita re-  
demti hominis, reparatiquè orbis laudem, di-  
vinitatis maiestatisque gloriam constare Deo  
non patitur.

Iam si quis mihi vitilitigator objectet, san-  
ctos Christi Apostolos ac Martyres, si minùs  
proprio, at saltem Christi merito, Patrisque bo-  
nitate in eum dignitatis gradum evectos, ut co-  
li, invocari atque adorari unà cum Deo & Chri-  
sto Domino Spirituque Sancto debeant: cùm  
filij sint hæredesque Dei, fratres & cohæredes  
Christi, ideoque omnium bonorum & thesau-  
rorum cœlestium participes per Christum, hic,  
licet per me, amet mireturque bellum inven-  
tum suum. Ut tamen ei quàm modestissimè  
respondeam, commentum quidem paulò sub-  
tilius ac furtum ingeniosius, quàm fuere hæ-  
tenus crassa illa & vulgo quoque suspecta

B ij

con-



## ORATIO

congruitatum, condignitatum & supereroga-  
tionum deliramenta potius, quàm commenta.  
Sed commentum cerebri sui quò subtilius, hoc  
nocentius in Dei injuriam invenisse eum dico.  
Amet ergo suum illud, quo bellum Deo gigan-  
teum denuntiat, bellum argumentum, risore po-  
tius majestatis, quàm scrutatore veritatis di-  
gnum. Si enim idcirco Dei gloriam commu-  
nicari servis ipsius fingunt oportere, quòd filij,  
quòd hæredes sint Dei, quisnā obsecro, piorum  
omnium non posthac Deus erit? Omnes enim  
electi, inque Christo adoptati, filij sunt & hære-  
des Dei, fratres & cohæredes Christi. Tot-  
idem ergo dii erunt, <sup>†</sup> quot terra corpora æ  
celo animæ fidelium tenebuntur. Quòd si frau-  
di esse Deo liberalitatē suam æquum putamus:  
& quia nos ex hostibus hæredes, ex alienis filios,  
ex miseris beatos ultrò reddidit, ideò redigendū  
in ordinem & subiiciendum regulis Jurisconsul-  
torum credimus, (apud quos hæreditas est suc-  
cessio in universum jus, quod defunctus tempe-  
re mortis habuit) quid obstat, quo minùs (secun-  
dum hos argumentatores cum ipso Christo co-  
hærede nostro familiæ herciscundæ judicio ex-  
periamur communē hæreditatem tam diu jam  
occupante, ut planè usucepisse videatur? Quid  
ni & cum Deo patre nostro de dote matris alijs-  
que juribus nostris, quæ pari sanè æquitate, quæ  
Majestatem divinitatēque, nobis vindicabi-  
mus,



## AD BELGAS.

mus, summo jure contendimus, ipsumque cœlo deturbamus?

Sed suspicamur fortè id, quod res est, parùm nobis in viribus & jure præsidij forè adversus eum, qui armipotens dominus exercituum, qui jus & justitia ipse est, quique juri judicijsque legitimis præsidet. Ergo vel furtis, sacrilegijs alijsque malarum artium ac sophismatum cuniculis agendum, vel adjuvanda viribus artes, & Gigantea manus ipsi cœlo admovenda erit, si quidem potiri spolijs opimis volumus.

Verùm ignoscite, quaeso, generosi Belgæ, si quid jocosius in re maximè seria, quàm pro vestra gravitate atque argumenti dignitate loquutus sum. Non enim vobis, sed cavillatoribus hæc reponenda duxi.

Quanquam utinam nos cum patribus nostris diram hanc verèque giganteam fabulam, cujus modò meminimus, adversus Dominum Deum nostrum, contraque fidelium prophetarum atque martyrum ipsius sanctissimum exercitum non tam verè lusissemus ipsi, atque expressissemus. Sed de hac querela suo loco videbimus. Nunc ad propositam objectionem paucis respondendum est.

Hæredes ergo & filios omnes gratuito non meritò sibi, & cohæredes Christo unigenito suo electos suos Deus æternus æterno testamento suo fecit, fateor. Ergo & magnificos illos dono-

B. III

rum



## ORATIO

rum thesauros per Adamū deperditos, & per Ie-  
 sum Christum recuperatos largē ac liberaliter in  
 eosdem effundit : cuiusmodi sunt remissio pec-  
 catorum, iusticia, innocentia, vita & immortalita-  
 tas, quibus ab initio ad imaginem Dei conditi  
 donatiq̃ue fuerant. Interea Deus æternus, cuius  
 æternū testamentū morte Christi juxta carnē se-  
 mel confirmatū, jam nō amplius morte, sed vita  
 testatoris Dei ratum est, semper ea sibi reservat,  
 quę ne ipsi quidē Adamo dederat, & sine quibus  
 Deus esse & conditor rerum omnium minimē  
 poterat : divinam essentiam ac naturam dico,  
 omnipotentiam, infinitatem, maiestatem, aliā-  
 que soli naturę glorięq̃ue Dei competentia. At  
 hominibus ad amissam imaginē regenitis, ado-  
 ptione filijs, ministerio servis, ut vitam & iusticiā  
 creator dederit, ipsam tamē naturā rerum crea-  
 tarum non ademir, sicuti ne ipsis quidem omniū  
 operum suorum nobilissimis præstantissimisq̃  
 angelis. Omnia autem ea dona filijs dedit li-  
 beralissimus pater, quę ad ostendendam beni-  
 gnitatem suam dare decreverat, quibusq̃ue ima-  
 ginem patris sui Dei referentes quodammodo  
 similes essent, non pares Deo. Et, ut paucis  
 omnia complectar, gratiam salutis hominibus,  
 non gloriam Deitatis : vitam æternam, non  
 naturam divinam : dignitatem, non Deita-  
 tem : innocentiam, non omnipotentiam : im-  
 mortalitatem, non maiestatem largitus est Deus.

Hæc

*Hebr.* 10

*Esa.* 42.

*Eccl.* 48.

*Rom.* 8.

*Psal.* 8



## AD BELGAS.

Hæc enim Dei naturæ propria, ista gratiæ, benignitatis, liberalitatis & insignis in hominū genus amoris illius dona sunt.

Porro ut nunquam non verum est, unum esse verum Deum, Patrem nempe omnipotentem, creatorem cœli ac terræ, angelorum & hominum, omniumque rerum hujus universitatis: unum item Christum Iesum pariter cum Patre naturæ ac majestatis: item unum Spiritum Sanctum procedentem ab utroque: atque ita in tribus *hypostases in homouiosis* unum, nō plures deos: ita semper vera immutabilisque voluntas Dei 1. Tim. 2. erit, quam verbo suo nobis pro unica vitæ nostræ cultusque sui regula sanctè observandam dedit: Nō habebis Deos alienos. Ego sum Deus Iacob. 1. tuus, fortis zelotes. Item: Honorem meum alteri non dabo, & ce. Quod cum ita sit, non potest gloria sua spoliatus Deus non indignissime ferre, gravissimæque vindicare injuriam suam, atque imminutæ contentæque divinæ majestatis suæ contumeliam. Non enim minus vera est comminationum, quàm promissionum ejus veritas. Exo. 20.

Accedit, quòd ne ipsis quidem beatīs Dei cultoribus, si sentiant, & prohibere à se idolomaniā nostram queant, blasphemi hi cultus, à quibus, Act. 10. dum viverent, abhorrere se ingenti zelo testati sunt, ullo modo placere possunt. Nam & ipsi beati Angeli, quia in colendo adorandoque Apoc. 22

B iij

solo



## ORATIO

solo Deo conservos se nostros esse agnoscunt, adorari à nobis recusant. Duplici ergo piaculo nos obstringimus, quoties videlicet immani sacrilegio & Deum debito cultu privamus, & sanctos Dei ministros, qui sunt vasa electionis & misericordiae divinae, quantum quidem in nobis est, ex veris gratiae iusticiaeque imaginibus ficta fallaciaeque idola, zeli, furoris atque indignationis divinae organa facimus. Cum autem & Deum perduellionis laesaque majestatis crimine in nostra supplicia provocemus, & beatis ipsius ministris, qui gloriam Deo, non sibi, tribuentes voluntati illius & ministerio suo perpetuo addicti sunt, surreptae atque usurpatae gloriae ac majestatis supremae sacrilegium irrogemus, apparet nos Iudeorum rebellium & gentium profanarum potius superasse, quam non aequasse superstitionem.

Vt enim nihil dicam de Iudaeis, illae quidem certe ut inexcusabili ingratitude & ereptae laudis crimine verè Deum offendeabant, eaque impietate gratiam ejus amittebant, ita daemones herosque suos, quos alienis exuvijs ornabant, placare ac demulcere vel fictitio cultu, ideoque ad ipsos receptum habere qualemqualem videbantur. At nos, ut dixi, ingeminato errore, dum & ipsum Deum rebellionis, & numina nostra exprobrati immanissimi sacrilegij detestando probro perinde offendimus, neutris utique grati, sed



## AD BELGAS.

sed utrisque pariter invisi sumus. Illi cum præter  
ea, quæ ex mundi opificio didicerant, nihil de  
Deo ejusque cultu certo statuere possent, Solem,  
Lunam, & lucentem illum, nitidum splendidū-  
que cœli exercitum. & principes item suos, me-  
dicos legumque latores opinione meritō vir-  
tutumque stulta quadam gratitudine inter deos  
referebāt. Nos autem, quibus de cultu suo Deus  
per prophetas & apostolos, perque filium unige-  
nitum abunde testatus est, relictis apud nos eter-  
ni testamenti sui tabulis, non contenti ficta ho-  
minum merita reposituisse cœlo, & extulisse ho-  
muncionem & vermem terræ supra Deum crea-  
torem in omnia secula benedictum, descendi-  
mus etiam eodem vanitatis cœstro in ipsa terræ  
viscera: & læsa Christianæ erga mortuos pietatis  
& legis divinæ naturæque regula, quæ condi nō  
erui sepulchris ossa piorum hominū jubent, pul- Deut. 34  
veres, cineres atque ossa mortuorum, nequic- & c.  
quā reclamant Deo, ratione & natura ē moni- Joan. 15  
mentis ad publicam pompam ac venerationem & c.  
produximus.

Versa deinde, ut assolet, in quæstum religio-  
ne, vel potius in avaritiam ac mundinationem  
superstitione, ne qua species impietatis desidera-  
ri in nobis posset, adeo quælibet sepulchra caco-  
dæmonum in morē perreptavimus, ut per spe-  
ciem religionis non solum sine delectu quævis  
cadavera ē pulveribus effoderimus, sed & com-

A V

plura



## ORATIO

plura unius divi corpora (rem prodigio similem) invenerimus. Et cum huic tam felici negotiationi neque modus neque pudor adhiberetur ab harum mercium ebuccinatoribus, & credula multitudo nullum non reciperet, quamvis absomum, crassum seque ipsum vel commemoratione sola evertens delirium, invenit mendax & impunis impudentia, quod nusquam exstabat. Multa itaque prapucia Christi diversis locis culta. Multa crucis ligna. Clavi penè innumerabiles. Lac virginis Marię, quod lacteti Christo superfuisse, & stupendo miraculo conservatum per tot secula perdurasse perhibent, in una provincia Hispania tantum, quantum vix vacca quæpiam fecundissima è media Batavia multo tempore multoties dederit: siquidem, quod ubique colitur, oppidatim colligatur. Corpora Petri aliorumque divorum adeo multa (prout jam non amplius superstitio, sed libido atque avaritia nundinatorum pudendum ac detestandum quæstum in miserum vulgus exercentium suasit) ut ex hac multitudine etiã inter celebres civitates, apud quas hi thesauri ad lucrum prostabant, (cum plura uno corpora unus divus habuisse vix videretur) ridicula nonnunquam certamina de veritate rei confictę (nusquam enim est, quod est ubique) sint nata. Inde nimirum exstitit tritum illud quidem prudentiorum risu, quibus jam tum nares esse coeperant, sed tamen e vulgi istorum temporum



## AD BELGAS.

porum fœcibus haustum, scommata. Tres magos in Colonia totidem esse crassos rusticos ex Vestphalia.

Quisnā obsecro vel Iudaicus, vel Ægyptius, vel Chaldaicus, vel quilibet alius ex densissimis illis antiquæ ignorantie tenebris unquā populus pari stoliditate idola coluit? Nam quid dicam de commenitijs Christophori, Barbaræ, Catharinæ, ac nescio quorum non tutelariū, larium, larvarum, lemurum ac templariorum Priaporum, ut falsissimis, sic fœdissimis numinibus, quorum plærorumque ne ipsa quidem archetypa unquā magis in rerum natura fuere, quàm fabulosa illa poëtarum Chimera, aut Cerberus, aut Hippocentaurus? Quid de indulgentijs venalibus & similibus idolomania nostræ instrumentis querar? Nam de indulgentijs utrum pauca, an nihil potius dicam ( quoniam argumento vix multa sufficerent) plane dubito. Certè horum cautionatio impudentissima atque imposturæ improbissimæ effecerunt, ut malè audiat Christiana religio inter Turcas aliosque fidei hostes, & ludibrio sit extraneis venerandum nomen Christi & euangelij.

Verum ego, qui non amplificandi neque exagitandi traducendive, sed tantū ostendendi communis periculi monstrandæque ad salutem viæ ergo dicenda hæc suscepi, non statui ad vivum omnia refecando, acerbius duriusque vulnera  
nostra



## ORATIO

nostra refricare quā dolor patitur. Sed ea tamen cum longa dissimulatione ad putredinem jam planè venerint, & cicatricem adeò lethalem obduxerint, ut non Chironiam aut Apollineā, sed vere divinam ejus manum desiderent, qui quavis mala nostra solus sanare & potest & vult, modò nos & morbum & medicum agnoscamus, aperienda saltem erant: ut in quo hæremus, periculi magnitudinē videntes, dum ultimo exitio nostro à cervicibus amoliendo, quantulumcūq; spei ac spacijs adhuc superest, celerem medicinā sedulò seriòque requiramus. Dico igitur invitus, quòd tacere mihi per nostra pericula jam præsentia non licet, nostram circa idola insaniam adeò conspicuam omnibus populis esse, tamque altè lateque per omnes terræ cœlique regiones extulisse caput, ut non modò hostibus nostris & extraneis contemptui probròque sacrosanctam religionem exposuerimus, verumetiam ridere cogantur ipsimet crudelissimi mangones nostri & sepulchrales dæmones, quibus opprobria divini nominis & errores nostros miseriamque & mortem Ecclesiæ Christi non magis questui, quàm ostentui fuisse certum est. Id enim restantur, & propè clamant cum alia multa planè mimica & scemica, ne dicam obscœna, fabularum nugarumque figmenta ac pigmenta, tum insignia illa missarum, indulgentiarum aliarumque quisquiliarum, quibus nostrā inscitiam sci-

tissimè,



## AD BELGAS.

tissimè negociati sunt huc usque, elogia atque  
programmata. Ex quibus unum tantum (sex-  
centa enim sunt, vel potius sex millia, si conse-  
cranda oppidatim ac templatim singula essent)  
ne longus sim, adducam. Id exstat Biturigibus  
inscriptum aræ Cardinalis in æde D. Stephani  
in hæc verba, ut ea retulit doctiss. vir Martinus  
Chemnicus, &c.

*Inexam.  
Concilij  
Trid. de  
Indulge-  
tijs.*

Hic des devote, cœlestibus associo te.  
Mentes ægrotæ per munera sint tibi lotæ.  
Ergo venitote gentes de sede remota.  
Qui datis, estote certi de divite dote.  
Te precor, accelera, spergas hic, dū potes, aræ  
Et sic revera securè cœlica spera.  
O si tu scires, quantum data profit tibi res.  
Tu juxta vires donares, quod dare quires.  
Te, miser, à pœna, dum tempus habes, aliena.  
Ut tibi sit pœnæ venia, sit aperta crumena.  
Consort cœlestis fabricæ, qui porrigit, est is.  
Ex hoc sum testis, vos hic mundare potestis.  
Crede mihi, crede, cœli donaberis æde.  
Nam pro mercede, Christo dices, mihi cede.  
Hic datur exponi paradysus venditioni.  
Currant ergo boni rapientes culmina throni.  
Vis retinere forū? mihi tendas pauca obolorū,  
Pro summa quorū reſerabitur aula polorū.  
Hic si largè des, in cœlæ fit tua sedes.  
Qui serit hîc parçè, parçè comprêdit in arce.

*Quid*



## ORATIO

Quid tardas? tantum nummi mihi des aliquantum.

Pro solo nūmo gaudebis in æthere summo.  
& cætera.

3 Thef. 2

Hoc nimirum ex plurimis unum est planè-  
que propositis dignū mercibus præconium in-  
dulgentiarum, insignè profectò ad posteros do-  
cumentum efficacis erroris & illusionis diaboli  
in homines verbi divini desertores. Nam quid  
dicam de frigidissimis, insulsiſſimis impudentis-  
simisque Francisci, Dominici & similium fabu-  
lis ad missas, indulgentias, ac purgatorium con-  
firmandum excogitatis? An risum hîc tenuisse  
suaves istos aruspices, & putidissimorum nuga-  
mentorum artifices nostros credemus, cum hæc  
plūs quàm anilium ac præficalium naniarum  
deliramenta non modò persuadenda suis tem-  
poribus, sed & pro fidei Christianæ capitibus il-  
linenda chartis, insculpenda marmoribus, ac tra-  
denda posteris putaverunt? Risit certè quisquis  
modò citati programmatistæ author fuit, in quo,  
ut carminis insulsiſſitatē non reprehendam (opor-  
tet enim juxta proverbium, quemadmodum pa-  
tella operculum, sic & mercibus dignū esse præ-  
conium, & similes habere labra lactucas) toti-  
dem haud dubiè putidissima impudētissimaq;  
mendacia, & impiæ in Deum blasphemix, quor  
verba sunt.

De



## AD BELGAS.

De vanissima, crassissima, frigidissima, immo gelidissima purgatorij fabula nihil amplius dicam, quam unum illud ex arcano ipsorum architectorum cribro ac tripode. Statuunt isti purgatorium unà cum seculorum omnium decursu finem quoque habiturum. Eum cum ad unam annorum myriada duraturum non putent, tamen ultra centum myriadas annorum extendunt supputantque indulgentias suas, quibus ab incendio, flammis fumisque purgatorij sui nos liberant, & arcas nostras magis quam animas purgant. Tam probè, scilicet, convenit indulgentiarijs nostris indulgentissima ratio cum calculo. Tam scitè didicerunt arithmeticam.

O lepidos profectò ac centum myriadibus calculorum dignos calculatores. Adeone simul & vestri obliti estis & proverbij: Mendacem esse memorem oportere? Adeò nunquam credidistis, vos artis & calculorum vestrorum rationem reddituros? Sed aperuit, mihi credite, jam diu oculos bona pars orbis Christiani, claraque in luce videt, & simul ridet fallacem istam quidem, sed nimium diu felicem vobis arithmeticam vestram. Nunc ergo tenemus consilium vestrum, & simul, quanti nobis atque orbi Christiano arithmetica ista constiterit haecenus, quippe quæ vos ditavit, orbem expilavit, Ecclesiam avariciæ libidinique vestræ mancipavit.

Sed



## O R A T I O

Sed necdum habemus omnia. Siquidem de-  
prehensi in tam manifesta verborum pugna in-  
constantiaque doctrinae, effugium ex jure suo in-  
veniunt, & Abundās, inquit, cautela nō nocet.  
Iam demū foricē indicio suo captum habemus.  
Illud nimirum dicere, vel saltē innuere nobis vo-  
lunt, se illos ipsos esse, de quibus jam tanto antē  
David prædixerat: Dixit impius in corde suo:  
Non est Deus, & Devorant populum meum, ut  
escam panis, & Petrus: Venturos illusores abne-  
gantes Christum, blasphemantes viam veritatis,  
qui fictis sermonib⁹ nos sint negotiaturi per ava-  
ritiam. O planè miseram temporum, vel homi-  
num veriùs ignorantiam: O vim erroris non sua  
natura, sed judicio Dei efficacem. Etenim si vel  
isti reddendam sibi unquam rationē questuosis-  
simæ hujus negociationis putassent: vel nos, qui  
tam foedè negociari nos passi sumus, saltē ho-  
mines, atque ipsis brutis non magis bruti fuisset-  
mus, nunquā hæc tam crassa, & nunc ipsis quo-  
que pueris ridicula deliria vel authorem apud  
nos invenissent, vel fidem.

Quid sit ergo & nostram stoliditatē naso su-  
spendere, & divinam majestatem, ac merita mor-  
tis & sacrificij Christi summo cum ludibrio tra-  
ducere, non video, si hoc non est. Ut non imme-  
ritò quis suspicetur, tales buccinatores non tam  
ad turpem quæstum faciendum emissos, quàm  
ad irridendam suggillandamque religionem à  
profes-



## AD BELGAS.

professis Religionis hostibus immisos & conductos esse. Equidem quotiescunque crassos, deliros, pueriles, vel potius aniles has nugas, & ridicula superstitionum crepitacula, quibus jam pridem euangelij splendor offecit, & sonora vox Dei silentium imperavit, mecum nunc repeto, & ad errores meos jam verbi Dei luce monstratos abjectosque, ceu ad turpissimum foetidissimumque vomitum, cum nausea respicio, miror huius perversissimi spiritus subtilitatemne dicam, an confidentiam, planèque, vtrum magis mirer, vix scio, persuaseritne tam absurda cordatis & Christianis, an suadere ausus fuerit.

Sed me dubitantem alia ex parte confirmat scriptura, quæ non tam subtilitati spirituum, quàm affectatæ nostræ cœcitati atque *heterodidascalix* acceptam cœlestis doctrinæ, quæ sola lucerna pedum nostrorum est, ignorantiam refert. Ita enim Apostolus: Quoniam veritatis amorem non receperunt, misit illis Deus efficaciam illusionis, ut crederent mendacio.

Quia verò ad hunc locum delatus sum, non abs re videtur, si hic paululū immorer, & quando tantis deceptionibus occasionē quidem dederunt stulta æmulatio paganismi, ex cuius ruderibus & ruinis deliria nostra fabricati sumus: causam verò neglectū projectumque studium verbi ac veritatis divinæ, de utroque conjunctim paucula his addenda duxi.

C

res



## ORATIO

res nostri ad exercitium pietatis magis sanè promti, quàm cauti, cum ex vetere illa idolorum, cui assueuerant, quàmque penitus imbiberât, superstitione recens, quasi è profundo mortiferoque sopore experrecti, religionē Christianam à Romanis ac vicinis non qua par fuerat, simplicitate ac puritate didicissent, ne pietatis exercitijs concedere paganis viderentur, ceremonias non paucas relictæ superstitionis retinuerunt.

Deinde acceptum à Romanis episcopis qualemcunque Christianismum ritibus quoque ex eorundē traditione (jam tum enim credendi legis Romani cæteris Ecclesijs dare cœperant) nō ex verbo Dei desumptis variè miscuerunt. Et ne quid in nostris sacris desiderarēt oculi & aures, manus & nares, lingua & palatum, minörve, quàm olim fuerat, splendor minüs augustam religionē redderet, pro dijs, dæmonibus & heroibus gentium culti adoratiq̃ue fuere apostoli, martyres, alijque pij jam vita functi homines, quos divorū honore, thure & sacrificijs mutata veriùs, quàm abrogata, supersticio dignata est.

Cumque jam semper inconsulto ore Dei ritibus ritus & erroribus errores sine fine ac modo cumularētur, ac novi quotidie divi, accensa emulatione, ambitione atque avaritia misera hominum credulitati, & invito reluctantiq̃ue cœlo obtruderentur, ventum tandem est in hanc religionis profanationem ac vastitatem, ut quasi  
**obrutus**



## AD BELGAS.

obrutus deorum turba Christus vix raro nomi-  
naretur, neque amplius cum Patre ac Spiritu San-  
cto imperet, sed tanquam unus in turba, & suo  
gradu dejectus, ipsemet imperium divæ virginis  
faceßere cogatur, juxta dictum: Ora patrem, ju-  
be gnatum. Agnoscitis enim, ni fallor, no-  
tissimam blasphemiam, quam tamen inter splen-  
didissimos planeque divinos titulos Regine cœ-  
li, advocatæ & spei nostræ virginis vel invitæ in-  
gerimus.

Interea verbum Dei, ne qua unquam assur-  
gendi & ex tanta cœcitatæ voragine emergen-  
di atque eluctandi spes esset, primum (uti dixi-  
mus) contemtum, deinde peregrinarum doctri-  
narum permissione infectum adulteratumque,  
postremo e manibus & commercio hominum,  
(dum ejus interpretatione populis Christianis  
interdictum fuit) sublatum est, adeoque profun-  
da oblivione sepultum, ut non modo nullum  
exstaret apud populum (laicos appellat) sacro-  
rum librorum exemplum, sed nec temerè apud  
ipsoß sacrificos, ut minorum gentium deos, ali-  
quod latinum volumen reperiretur. Quæ autem  
sola remaserat clero qualis qualis illa Latina ver-  
sio, vix apud Põtifices nostros & præcipuos istos  
scolarum vertices, qui mysteriũ suum etiã Pauli  
temporib' cœptum summo studio peragebant,  
nec ad illud penitus cognoscendum quamlibet  
suam, juxta præcipientiam, facile admittebant.

C ij

Interea



## ORATIO

Interea populo misere fascinato, ne nihil omnino de Deo sciret, frustula quaedam latine translationis (Latina tamen & illa) parca planeque novercali manu dabantur: sed non sine rosario, horario hararioque fabularum Circes poculo: lamque prorsus per ista thesaurus carbones erant: & totum propè Christianum orbem sublata cum lucerna via etiam mente hominum infectoque fonte vite in haram suam concluserat immanissima Circe. Eratque iam hoc modo miserrima Ecclesie facies, cui præter nomen ipsum Christianum vix quicquam solidi remanserat, quærendusque in ipso Christianismo Christianismus videbatur: donec iterum Deus infinitæ bonitatis sue divitibus thesauris per Germaniam, Angliam, Galliam, aliasque nationes liberaliter effusis, tandem & nos divina gratiæ suæ donis ac rore aspergere cœpit. Magna sunt ergo hæc & mirabilia iudicia Dei vindicantis maiestatis suæ contemptum: sed nec iniusta nec inusitata, uti exempla supra posita nos docere potuerunt: ut novum non sit nec iniquum, si verbi sui fastidium in nobis quoque tam densis ignorantie tenebris ulciscatur Dominus, nosque lucem celestis doctrinæ ferre recusantes fumis & caligine abyssi infernalis affectatis involvat, suffocet enecetque.

Sed ne cui videar hunc verbi divini contemptum plus iusto exagitare, agite, o indyti Belgæ, audia-



## AD BELGAS.

audiamus paulisper, si placet, quibus quàmque honorificis elogijs ac titulis sacras literas hoc est ipsum sacrosanctum os Dei, patroni & coryphæi propugnatores idololatriæ nostræ hætenus insignierint. Nam ut plausibili aliquo titulo somnia sua & hominum inventa scripturæ primum apponerent, deinde & præponerent, tum etiam superponerent substituerentque, finxerunt eam mutilam, imperfectam, obcuram, ambiguum, plurimis contrarijs pugnantibusque locis perplexam, atque instar nasi cerei ac regulæ Lesbæ, (hæc sunt ipsorum verba) pro cuiusque libidine in quamvis partem flexibilem esse.

Negarunt quoque hoc consilio ab Apostolis conscriptam, ut esset norma, fundamentum, thesaurus ac *plerophoria* fidei vitæque nostræ, sed tantum commentarius quidam brevis in usum notius Ecclesiæ catholicæ, sed solum privatarum quarundam Ecclesiarum, quasi tumultuario opere, & è re nata conscriptus, cuius omnis auctoritas non ab ipso, sed ab Ecclesiæ catholicæ, hoc est, suo iudicio pendeat. Ideoque certitudinem doctrinæ fidei vitæque non tam à scriptura, quam ab ecclesiæ traditionibus accipiendam esse. Neque defuere Centimani quidam audacissimi & Cerderei nostri temporis theologastri, qui ore impurissimo planeque obsceno sacrosanctam prophetarum & apostolorum doctrinam contumelioso indignoque nomine euan-

C iij

gelium



## ORATIO

gelium nigrum & theologiam atramentariam publicis libris corā toto orbe appellare sunt ausi.

Quin etiā ipsi summi nostri Pontifices quanti scripta sacrorum biblicorum fecerint, cum omni vita omnes, tum & voce quidam testati sunt. Horum unus, ejus nomini & vertici, ut sacro, parcam in presentia, cum evangelij historiam, ut fabulam, damnasset, & Petri Paulique erroneum & mendicorum (has etenim voces media inter pocula è cœno, non scrinio sacrati saturatiq̃ue pectoris & stomachi epulis vinoque gravati eructabat crapula, non Pontifex) in Italiam adventum execrandis convitijs deplorasset, monitus à quibusdam, ut sui Pontificatus meminisse vellet, cum amarulenta irrisione (sed non nisi reperta conduplicataque blasphemia cõtumelię prioris) fassus est tandem errorem. Hac enim sola mercede sibi gratā esse fabulā Iesu Christi, quod ipsius vicarius esset. Alius cum ob caponem non sat laurè coctum, in coquum destomacharetur, à quodā magni nominis viro, ne ultra modum sæviret, interpellatus, cum crapula eructavit & abominandam hanc vocem: Cum Deus ipse ob unum pomum totum orbem perdiderit, an me irasci verabis coquo, qui integrum mihi caponem perdidit? Vno virulento blasphemoque sarcasmo universam sacrosanctę historię auctoritatem sceleratissimè derisit ac proculcavit.

Sed



## AD BELGAS.

Sed non eriam omnia Pontificum arcana.  
Habeant hoc sibi jure quodā suo peculiare pon *Apoc. 13.*  
tificales dapes, ut ore impuro & blasphemio con  
tra Deum contraque Christum ejus sese extol- *2 Thes. 2 e*  
lant, & Scripturæ dignitatem suaviter ac petu-  
lanter irrideant.

Interim unum illud prætereundum non pu-  
tavi, de doctoribus & propugnatoribus harum  
blasphemiarū, quorum nonnulli adeo omnem  
pudorem cum pudicitia pietatēque perdiderūt,  
ut dum canonis, sacerdotij & sacrificij missatici  
impietatem sibi tuendam & commendandā ma-  
gnificis rhetoricę suæ coloribus sumserunt, non  
vereantur inter alias & has blasphemias in Deū  
evomere. Sacerdos est creator sui creatoris. Item *Breviario*  
Qui creavit me sine me, jam creatur mediante *Parisiensium*  
me. Vnde nata est illa ridicula simul & blasphe- *excusum*  
ma sacrificulorum gloriola, qui se virginis Dei- *per Odini*  
paræ felicitatem hac in parte longè superasse ja- *Petit.*  
ctant quod illa conceperit quidē, sed semel tan-  
tū conceperit ac pepererit creatorē & redem-  
torē suū: ipsi autē quotidie & quotiens sacrificāt,  
sola mysticarū quinque vocularū pronuntiatio-  
ne enthusiastica creatorem creent, tractent, ja-  
ctent & mactent, & denique nihil non de eo fa-  
ciant. Quæ prodigiosa Lupercorū nostrorū fec-  
unditas, si quidē vera narrāt, non virginis tantū,  
sed & ipsius Dei Patris omnipotentia ac beatitu-  
dinem haud exiguo intervallo post se relinquit.

C iij

Deus



## ORATIO

Deus enim, qui ab æterno filium unicum, & nō plures genuit, ut sit ipse cum Filio & Spiritu Sancto solus omnipotens creator & redemptor. facere alios creatores non magis, quam perdere seipsum potest. At hi nostri

*Cecropiam soliti baptæ lassare Cotytto, jam*

*Talia secreta celebrarunt orgia tædæ,*

ut minimo negotio non solū quidlibet ex quolibet, verumetiam, sicuti Deus ipse creata omnia è nihilo fecit, ita & hi creatorē ipsum e fermento suo, hoc est, ex re planè nihili, stupenda & profectò incredibili potentia creare queant. Itaque secūdum istos videri possunt homines jam diu paria cum Deo (ne interim majora dicam, quoniam mens inesse hisce Centauris desijt pridem) fecisse, & omninò vicem cœlitibus repēdisse tot creatis brevi tempore creatoribus, quorū ne ipse quidem creator unquam homines istorū similes Cyclopa creavit.

Nunc ergo his authoribus veridicum esse desijt os Dei Creatoris, quod negat ullos alios esse Deos, ullasque quāvis insignes res creatas, quæ admirandorum operum ipsius excellentiam exprimere ullo modo possint: planèq; necesse est, ut tu, ô summa rerum æternaque potestas, aut cedas rerum gubernaculis tantæ parium Deorū multitudini: aut, si hic est (ut est) fundus, & hoc mysterium iniquitatis nostræ, vibrando tandem fulmina tua manu vindice, & gigantes istos unā  
cum



## AD BELGAS.

gum universis, quos fecerunt creatoribus & redemptoribus suis precipitando, re ipsa doceas, non impunè neque diu irrideri maiestatem tuam, neque impias cœlo inferri manus posse. Ecce ergo mysterium impietatis, de quo tanto antè prædixit Apostolus, quodque observandum Ecclesiæ & Prophetæ, & Christus ipse præmonuerunt.

Conspiciantur autem jam omnes Furcæ, Saraceni, Iudæi ad subsannandam religionem Christi domini, conjuratione facta, simul prodire: quid, quæso, acerbius in eam comminisci queunt? Taceo reliquorum probra. Prætereo & ipsum canonem, cuius modò mentio est facta, quorum omnium impietatem si pro dignitate verbis exprimere atque ostendere cupiam, dies me citius quam oratio aut argumentum destituat. Et vestra, lat scio, Belgæ, prudētia facit, ut quia doctissimis libris sapius hæc viri docti graphice nobis ob oculos posuerunt, stultus videatur repetitus toties ineptiarum labor.

Missas ergo has missas, nœnias, superstitiones, blasphemias & monstra probrorum nunc facio: quippe quæ, ut nimis pudenda, tractari toties salva verecundia non possunt. Nam, juxta vulgare dictum: Scelera refutavit, qui revelavit, non qui contrectavit, aut retractavit. Summa enim huc redit: Auctoritatem literarum divinarum aut nullam esse, aut ambiguam. Atque in hunc modum maiestati oris Dei ac testamēto æterno Do-

C V

mini



## ORATIO

*Psal. 26.* mini & magni Servatoris ac Dei Iesu Christi  
 prappositæ oppositæque fuere doctrinæ damo-  
 niorum, fumi ac tenebrę abyssi obnubilantes  
 solem justicię atque aëra, traditiones ac deliria  
*apoc. 9.* ecclesię malignantium & derisorum, caudæ &  
 venena locustarum prodeuntium ex ore dra-  
 conis.

Hoc ergo unum est præcipuum peccatum no-  
 strum, quod quia ne adhuc quidem, vel millies  
 moniti, remittimus, sed contrà mordicùs defen-  
 dendum putamus: ne miremur, si vindicem glo-  
 riæ suæ manum Dei nostri, & virgam ejus fer-  
 ream contra nos etiamnum extentam sentire co-  
 gimur.

Nunc transeamus ad alterum, videamusque  
 deinceps, quam in ministros ac vates Iesu Chri-  
 sti, qui reducere nos in viam conati sunt, incle-  
 menter ac truculentè nos gesserimus. Ita enim  
 constabit omnè nos veterū Ecclesiæ persecuto-  
 rum patrum nostrorū mensurā accumulasse. Sed  
 hæc hinc planè, neque unde exordiar, neq; quā  
 aut quō progrediar, satis expedit. Tantus enim  
 sese hic pandit campus, vel potius inexplicabilis  
 labyrinthus, ut si nostræ crudelitatis exēpla hac  
 in parte singulatim vel enumerare tantū velim,  
 neque initium neque exitum sim habiturus. Ita-  
 que succumbere potius tanto oneri, quàm nar-  
 rando extenuare fidem eorum decrevi, quæ vix  
 fidem apud posteros nostros sunt invetura: quæ-  
 que



## AD BELGAS.

que nisi à nobis gesta essent, ne ipsi quidem nar-  
rantibus alijs credere velimus.

Tantum in universum vos meque ipsum mo-  
nebo, ut si per hos quinquaginta annos tantum  
Christiani sanguinis hausimus odio renascentis  
Euangelij: quantum ne omnibus quidem re-  
tro seculis patres nostri, quamlibet impij, tan-  
dem nos capiat pœnitudo, aut saltem lassitudo  
tanx lanienx. Etenim nostræ crudelitati  
satis non fuit, eos qui in nomine Christi ar-  
denti zelo gloriæ Dei & nostræ salutis ultro  
ad docendum Euangelium se nobis obtulerunt,  
morte mulctare: sed & rapuimus è privato  
in publicum ( constitutis ad hoc publicis In-  
quisitoribus, quadruplatoribus, facibus ac pe-  
sibus humani generis ) promiscuè omnes,  
quotquot nobiscum ad eandem luxur & impie-  
tatis profusionem non concurrebant. Utque  
omnes scævitiæ numeros impleremus, in hac  
tam violenta, tam immani tamque barbarica  
truculentia, nec sexus, nec ætatis nec conditionis  
aut infirmitatis ulla habita est ratio. Abreptæ à  
nobis orantes in privato honeste matronæ, pro-  
ductæque in publicum spectaculum: & per car-  
nificem vel flammis cœrematæ, vel vivæ in ter-  
ram defossæ sunt. Adcò & legum & humani-  
tatis simul omnis obliti fuimus.

Præterea & senes decrepiti, homines cæci,  
claudi & imberbes juvenes ac pueri vixdum  
puber.

I. Per. 44



## ORATIO

pubertatis annos ingressi puellæq; virgines unâ  
cum matribus, & foeminae uterum ferentes, jam-  
que vicinae partui unâ cum foetu, horrendum  
non solum visu, sed etiam dictu, aut in profuen-  
tem projectæ, merlaeque, aut terrifico flammarû  
incendio consumptæ sunt: idque plerunque indi-  
cta causa, sineque ulla legitima doctrinae inve-  
stigatione aut forma judicij.

Posteaquam deinde terrû illud axioma; cum  
hæreticis non esse disputandum, ab inquisitori-  
bus receptum fuit tanquam per se notum, factû  
est, ut sine ullo doctrinae examine audita tantum  
post accusatorem confessione doctrinae, sola car-  
nificis opera requireretur. Et cum jam populus,  
partim quasi commiseratione quadam innocen-  
tium reorum, partim edoctus quodammodo de  
ipsa suppliciorum indignitate & causa, stoma-  
chari, musitare, tandemque & concitari cepit,  
itaque est ad clandestinas & nocturnas inno-  
centissimorum hominum lanienas: hoc est, ad  
publica impunitaque latrocinia sine ordine ac  
modo: in quibus idem ferè accusator, qui & ju-  
dex & carnifex fuit. Quin etiam negatum sepi-  
simè ereptumque pijs martyribus id, quod uni-  
cui ipsi in morte indignissima solatium esse  
debuerat, ut neque de doctrina & causa mortis,  
neque de sua innocentia ad populum verba fa-  
cere possent. Quibusdam enim eorum, ante-  
quam producerentur, inserta illigataque oribus  
ligna,



## AD BELGAS.

ligna, injectæque pilæ, aut linguæ præfectæ, ne non modò de doctrina, sed nec de rebus quidẽ domesticis ultimæque voluntate sua alloquendi populum aut propinquos facultas esset. Nonnullis etiam nobilioribus eadem de causa tubarum ac tympanorum strepitu clangoræque, ad ludibrium non solum reorum, sed & populi, vox intercepta fuit. Taceo de fœditate, horrore & squalore carcerum, alijsque infinitis exquisitissimorum tormentorum cruciatibus, quibus plurimi excarnificati ac mutilati, multi in ipsis carceribus inter manus carnificum contrucidati, non pauci ita miserandum in modum excruciat, torti tenique, ut ad prodeundum, miserè luxatis, distortis distractisque membris, vires non superessent. Taceo quoque de diris & horrendis immanissimorum suppliciorum exemplis & spectaculis, deque summa deformitate hærentium post mortem ad compita viarum in rotis, furcis, postibus ac patibulis corporum in escam fœdarum volucrum & ferarum. Horret enim animus, contremiscunt artus, & concutitur totum mihi corpus vel sola ac tacita commemoratio-  
ne tam inhumana, & plus quàm barbaræ, vix-  
que fidem apud exteros posterosque nostros ha-  
bituræ feritatis nostræ. Quid enim aut magis  
horrendum, aut tam incredibile videbitur, quàm  
Belgas gentem Germanicam, ingenio placidam,  
professione Christianam, non solum vicinitate,  
sed



## ORATIO

sed & consanguinitate, lingua, cōmercij ac moribus Germanorum planè Germanam, oblitam innatae moderationis (etiāsi maxime tam frequentibus ac diuturnis vicinorum commercij de religione restituta nihil unquā didicissent) adversus innocentissimos Christianos, & sua ipsorum viscera saviendo, æmulari potius Hispanorum effera t̃a sevitiā rabiēque, quā imitari Germanicam, hoc est, suam humanitatem ac moderationem maluisse?

Nostra autem hæc sunt, nostra, inquam, ipsorum potius, quā martyrum, ò Belgæ, sunt hæc, quæ fecimus, vulnera: non ideo tantum, quoniā in nostros dolores ac pœnas acerbissimas emanabunt redundabuntque: verum etiā quia Christiani in Christianos, in Belgas Belgæ, inque proprium sanguinem ac viscera, ad propugnandam adversus Deum malam causam, malè crudeliterque consulimus.

Esse autem quā vera, tam etiā tetra atque immania, hæc, quæ dico, si scire vel serò tandē malis nostris possumus, inter alia verbi divini & conscientie nostre testimonia, ipsa quoque mordicus à nobis defensa hæctenus idololatria (ut non excutiamus publicos rerum capitaliū commentarios) omnimodo testari potest. Nam si, quos majores nostri simili errore, tanquā mera piacula, planēque abortiva quēdā mundi purgamenta, e medio sustulerūt (apostolos ac marty-

ess



## AD BELGAS.

res Iesu Christi dico) eorū nos ossa ac reliquias  
templis aris ac divinis honoribus colendos ducl  
mus idē, quoniā euangelium salutis nostræ &  
dulcissimam doctrinam novi fœdoris Iesu Chri  
sti nobis cum proprio periculo attulerunt, quo  
nam tandē loco habendi erunt, qui prorsus ean  
dem nobis doctrinam injuria quidem temporū,  
vel potius nostra, vitiatam perditamque, sed sua  
fidei opera, non alio, quā glorię Dei & publicę  
salutis, studio suis fontibus ac puritati restitutā,  
inque linguam nostram traductam (quod im  
mani sacrilegio nobis ante ipsos inviderat Satā)  
denuō tanquā post longum exsilium postli  
minio his nostris temporibus reduxerunt, qui  
que in hanc sanctissimam curam glorię Dei  
& salutis nostrę honores ipsi suos, fortunas & vi  
tam ipsam consumserunt.

Aut ergo ad amussim suam examinanda do  
ctrina eorum fuit nobis, & ex collatione Scri  
pturę legitima demonstrandus error ac falsitas:  
aut, si id facere inopia causę non potuimus, sic  
uti huc usque certē conscientia malę causę  
(credo) ne tentavimus quidem, agnoscenda no  
bis erunt vulnera simul & scelera parricidięque  
nostra, confitendumque nefarię rebellionis in  
Deum, atque impij crudelisque simulachrorum  
cultus teterrimum crimen. Quod si ve  
rō confessionem hanc nulla, nisi extremi ju  
dicij divini, necessitas exprimere contumacię  
nostrę



## ORATIO

nostrę poterit: testabitur tamen contra nos conscientia nostra, nosque terrificis facibus stimulisque suis persequi non cessabit, donec confecta rebellionis periodo nos sistat tremendo eius iudicio, cuius in oculis preciosa mors erit martyrum suorum. Testabitur & ipsa continuata jam in quinquaginta plus minus annos tristissimę lanienę deformitas. Ipsa denique dies ac sol hic splendidissimus tãtę truculentię inspector diurnus, ac lunę reliquorumque lucidissimorum astrorum celestium clarissimus exercitus cadiũ latrociniorumque nostrorum incorruptissimi testes nos accusabunt. simulque in lucem tanquã meridionalem producent innocentiam eorum, quorum nos innoxio sanguine & gladios carnificum fatigavimus, & maria ipsa tinximus, & flammam ignesque restinximus, & rivos stagna, fluminaque nostra infecimus opplevimûsque.

Iam quid querar de numero trucidatorum? Numerari enim infinita qui possint? Ut autem infinita videãtur, quę sanę quã simillima sunt infinitis, nostra quoque crudelitas effecit, per nocturna clãdestinaque latrocinia assiduę grassando. Si tamen divinare per vos, atque simul ex commentarijs & memoria publica conijcere & conquirere licet aliquid, quod unum reliquum fecit inclementia, reperiemus, ni fallor, intra Belgicę nostrę (ne quid de alijs dicam) quam libet angustos limites, intraque jam supradictum annorum



## AD BELGAS.

notum spacium, ob solam religionis professio-  
nem, haud minorem centum (quibus tamen non-  
nulli dimidio plures addunt) millium trucidato-  
rum numerum. O sævitiam furoremque hor-  
rendum atque incredibilem. Quis enim post-  
hac, præter nos ipsos, credere aut animo conci-  
pere tam multa tamque immitia crudelitatis  
exempla, à Belgis inque Belgas, eaque tam bre-  
vi spacio temporis ac loci edita poterit? Carent  
enim omnino pari exemplo cunctæ omnium  
temporum ac tyrannorum historiae. Quanquā  
ut miserum hoc est in Belgis, ita mirum in Sa-  
tana non est, superasse sævitia omnium ætatum  
furore ac rabie novissimi temporis: Nam licet  
idem sic hic, qui etiam omnibus, post homines  
natos, temporibus irreconciliabili odio Ecclesiā  
persequutus est, immitissimus draco ac serpens Apoc. 12  
antiquus; tamen quia cogi nunc in angustias re-  
gni ac tyrannidis suæ terminos, sequē indies ma-  
gis magisque constringi in exiguum temporis  
spacium videt, in furorem ac rabiem jam vertit  
iram odiumque Christi & Ecclesiæ: & quasi tru-  
cidandis singulis jam lassus leo, nil nisi compen-  
dia cedium requirit, ideoque nos quoque Belgas  
cum injuria naturæ ingenijque Belgici in extre-  
ma ista tyrannidis exempla prorumpere, inque  
propria viscera convertere rabiē atque arma no-  
stra manūsque furiosas compulit.

Neque etiam nos excusant Italorum, Hispano-

**D**

norum



## ORATIO

norum & maxime Gallorum similes, & forte nō  
 minoris infamiae carnificinae: dum illud in con-  
 fesso est, nos & crudelissimorum idololatrarū esse  
 socios, & seviendo in proprium sanguinem, jam  
 Belgas, immo homines esse desisse: quos adeo  
 non purgant aliorum scelera, ut etiam contami-  
 nent accusentque magis. Sicut enim non minus  
 perit, qui perit in turba, ita nihilo leviū peccat,  
 qui cum vicinis peccat, quā qui solus. Præterea  
 habeant sane Galli vicini nostri, habeant & Hi-  
 spani, gens ut olim tenax fidei ac studiosa verita-  
 tis evangelicæ, sic hodie superstitionis & crude-  
 litatis infamia nobilis, trucidatorum martyrum,  
 quæ volent, ornamenta: eaque furoribus ac par-  
 ticipiis suis in ultimo iudicii die prætendant, si  
 possunt: Belgas profecto minimè omnium gen-  
 rium oportuit tam longè recedere à natura mo-  
 ribusque Germanicis, neque in obsequium Hi-  
 spanicæ barbariæ ac feritatis usque adeo omnem  
 humanitatis avitæ laudem projicere, ut veluti  
 rabiosa belluæ in nostrum ipsorū cruorem vio-  
 lentas manus atque arma verteremus: idque in  
 tali causa, cuius deploratam esse conditionem,  
 & maturū jam casum differri diu non posse, ne  
 ipsi quidem ignorabamus. Nam ignotam nobis  
 hac doctrinā prorsus fuisse, dicere nō possumus,  
 præsertim cum ab oriente quidē nō solum vici-  
 nitate & commercijs, verum etiam morum, lin-  
 guæ, imperij, affinitatum & sanguinis commu-  
 nione



## AD BELGAS.

nione assiduoque penè convictu ita propè Ger-  
manos, apud quos Euangelium publicè doceba-  
tur ac perdoceretur, attingamus, ut non solum vi-  
cini, sed prorsus eadem gens, tantumque non  
fratres videri queamus. Ab occidente verò An-  
glos (apud quos eadem doctrina usque in hunc  
diem feliciter personat) tam amicos habeamus,  
quàm vicinos, quibus cum & ipsis & principio-  
rum fidam & constantē amicitiam à majorib⁹  
acceptā adhuc hodie non sine magno nostro bo-  
no tempore tam necessario retinemus. Cum autē  
vel ob has causas doctrina euangelica, quæ & in  
Germania atq; Anglia magna cū audientia do-  
cebatur, & ad nos translatis in nostrū idioma sa-  
cris biblijs varijsq; doctorū hominū scriptis mit-  
tebatur, millies insonuerit insonueritq; auribus  
nostris, crucifixo etiā per hæc (ut Paul⁹ loquitur) *Galat. 3.*  
ob oculos nostros Iesu Christo, nemo pfectò no-  
strū ulla ignorantia pretextere sævitia & insania  
sua potest. Dubitare itaq; nūc nō possum⁹, quin  
præter p̄fanos olim hostes Christi, ipsam quoq;  
perfidie & furoris crimine modo infamē Gallia,  
& feritate, cæcitate, superstitione ac crudelitate  
hodie insignē Hispaniā, & ipsam deniq; impiā,  
atheā, profanāq; Italiā, maximeq; caput ipsum  
crimeq; malorū omniū Romā, iuratā fatalemq;  
jam inde ab ipsius incunabilis ad ultimū usque  
diem Domini, pestē, gurgitē & mortē deniq; veri  
Christianismi, vel equaverim⁹, vel vicerim⁹ etiā.

D ij

Quod



## ORATIO

Quod si ergo neque furor Gallos, neque ex-  
 tas Hispanos, neque affectata impietas Italos,  
 Romamque ipsam adversus severum iudicem  
 mundi & fortem vindicem martyrum suorum  
 Christum, quò minus omnes furoris, cœcitat-  
 is impietatisque iustas meritaque pœnas luan-  
 t, ruebitur: quid nobis futurum arbitramur, qui  
 contra certissimum & incorruptissimum propriæ  
 conscientiaë testimonium pios vates nostros di-  
 vinitus missos furiosè mactavimus, quorum ne-  
 vitam improbare, nec doctrinam elutare pote-  
 ramus? Quid refuta e dico? immo quam de-  
 gustatam iam ne repudiare quidem, aut damna-  
 re unquâ ausi fuisset, nisi lucis odium, quam  
 tenebræ nostræ non tulerunt, & questus ex cultu  
 impio atq; avaritia, quæ oculos nostros perstrin-  
 xit, & Hispanorum ut diuturnus ita vanus (si vi-  
 ri & pristinae aviæque majorum virtutis memo-  
 res fuisset) terror in nostra membra, in pro-  
 priam naturam & conscientiam, inque cœlum  
 ac denique in Deum ipsum nos armassent.

Atque hæc confessio cum multis alijs, qui po-  
 stea resipuerunt, tum etiam non paucis rerum ca-  
 pitalium iudicijs expressa sæpius fuit: qui mo-  
 niti, ut aut conscientiaë suæ considerent, aut Deum  
 dilectorum martyrum suorum vindicem exspe-  
 ctarent, iniusticiam quidem iudiciorum suorum  
 agnoverunt: sed juxta proverbium, In Pyrrhiâ  
 quicquid eorum fuit malorum, hoc est, in regia  
 edicta



## AD BELGAS.

edicta conijcere, & a se in Regem amoliri crudelitatis invidiam ad tempus quidē conati sunt. Atque hæc quidem incitamenta fuerunt, quæ nos, cum meliora & videremus, & nonnulla ex parte probaremus: amplecti tamen deteriora, & accerere in capita nostra omnium martyrum vatumque, ab orbe condito usque ad hunc diem, occisorum reatum ultricemque Dei manum coegerunt.

*Matt. 23*

Et si ergo idem ille mendax & eruentus spiritus hostis Ecclesiæ nos modo cum proprijs visceribus, ac nobiscum ipsis cæca rabie commisit, qui ab initio Ecclesiæ Cainū in Abelum, Esau in Iacobum, Pharaonē in Israëlitas, breviter, qui totā illam omnium temporū turbam persecutorū Ecclesiæ in populū Dei instruxit, & in finē usque seculorum omnium instructurus est: in nobis tamen eo potentior efficacia ejus fuit, quod in veritatis agnitæ professores ac testes, inque verbi ac justitiæ divinæ præcones, notæque innocentia homines contra sensum & conscientiam nostrā nos concitavit: inque ruinam non inprovisam volentes videntesque præcipitavit.

Proinde quoniam ad horrendam à Deo defectionem ac spiritualem cum simulachris scortationem adjunximus & diræ crudelitatis ultima detestandaque parricidia in ministros Iesu Christi, quorum pedes ut pacem letam annuntiantium, meritò grati & preciosi nobis esse de-

*Rom. 10*

D iij

buisse:



## ORATIO

Psal. 116
1 Reg. 12
Apoc. 9.
 buissent: ne quaramus alias causas calamitatum  
 nostrarum, quam has ipsas, quæ Deo maxime  
 sunt invisæ. Neque miremur, si Deus ultor con-  
 temtus sui, zelotes impij cultus, & in ejus ratio-  
 nibus preciosa mors est testium suorum, jam  
 etiam ad nos virga ferrea sese convertat, nosque  
 in ira ac zelo furoris sui corripiat, seditionibus  
 bellisque civilibus involvat atque collidat. Ni-  
 si enim resipiscimus, initia hæc tantum malorum  
 erunt, & faviores nobis à Domino dolores pa-  
 rari minime dubitabimus. Aded enim illum  
 pervicacia nostra non vincemus, ut si ad do-  
 mandam debellandamque præfractâ rebellio-  
 nem nostram non sufficiant, quas huc usque sen-  
 simus, calamitatum publicarum plagæ, expedi-  
 turus sit & scorpiones suos Deus, concitaturus &  
 alios insuper hostes in nos, quorum linguam nō  
 noverimus, ignotos quidem facie, at notæ inle-  
 mentix homines: donec tandem cladibus bel-  
 lorum ac tumultuum, morbis ac fame domiti,  
 diverseque agitati ad internecionē redigamur,  
 & mistum nobis divini furoris poculum integrū  
 hauriamus, planēque consumamur.

Habemus ergo nunc malorū nostrorum prin-  
 cipes causas, obstinatum nimirum Dei ac verbi  
 divini contemptū impiumque idolorum cultū, &  
 immanē insanamque in sanctos ejus ministros  
 cum pertinacissima theomachia conjunctā cru-  
 delitatē. Principes autem causas dico: non enim  
solas.



## AD BELGAS.

solas. Sicut enim Spiritus Sanctus per os D. Pauli testatur, impios idololatrias desertos a Deo tradi dediſque cupiditatibus foedis in mentem rationis iudiciiſque omnis expertem, atque ita per omne genus ſcelerum in exitium ferri precipites: ita quantum vitiorum atque flagitiorum agmen longa, & quaſi cathenata quadam ſerie, ſecum traxerit foecunda haec vitiorum mater idololatria ac theomachia noſtra, utinam minus multa inter nos documenta exſtarent. Is namque vitiorum omnium proventus apud nos eſt, iſque cunulus, ut quando jam ad fundum propè pervenimus, & præter numinis reverentiam hominum quoque famam, metum ac pudorem abieciimus, contemnamus.

His ac cedit, quod, quaſi noſtra nobis non ſufficiant, ab exteris quoque, ceu ſobolis foecundioris ergo, plura quotidie mutuamur. Quæ omnia demonſtrant, nos, dum urgemus, accumulamus & acceleramus exitij noſtri cauſas, quaſi non ſat citò perituri alioqui ſimus, imminere jam planeſque maturuiſſe (niſi eam clementiſſimus Dominus magisſque propitius nobis, quam ſumus ipſi, placide avertat) damnationi, poenæ ruineſque noſtræ. Verum ego præcipuas, ut dictum eſt, malorum noſtrorum, & cubantis jam in ipſis prope modum foribus exitij cauſas, ut fontes, oſtendiſſe contentus, obiter indicare hæc tantum volui, non etiam perſequi longius.

D. iiii

Nunc



# ORATIO

*Altera  
pars de  
remedijs  
malorum  
Belgico-  
rum.*

*Ibren. 2.*

*1. Thef. 5*

*Hebr. 2.*

*12.*

*Isai. 10.*

*Rom. 2.*

*Apoc. 6.*

*Luc. 23.*

*Apoc. 6.*

**N**UNC autem, quia causas, vim ac magnitudinem morborum nostrorum tenemus, tempus est, ut de medico ac remedio propere cogitemus. Moram enim non patitur celeritas appropinquaris vindictæ, & immensa veluti maris exundantis contritio imminens cervicibus nostris. Quis ergo medebitur nobis? Prophetæ enim nostri viderunt nobis falsa & stulta: nec aperuerunt nobis iniquitatem nostram, ut nos ad poenitentiam provocarent: viderunt nobis onera vana & expulsiones. Nos præterea & cælum & terram impietate ac sævitia nostra offendimus. Et novimus vindictam in manu, inque promptu esse ei, quem læsimus. Certum quoque, nullum esse in terris neque sub sole nobis refugium adversus eum, qui potenti manu sua & cælum & terram & universum hanc globum ac machinam mundi uno momento impellere in nos ac sternere, confundere disperdereque nobiscum potest. Quis igitur conserve nos adversus iram non venturam, sed jamjam presentem Dei sedentis in throno Majestatis, proque tribunali terribilis judicii sui. Nulla profecto neque hominū neque angelorum, neque etiam deorum divorumque, quos fecimus, potentia: nulla nec regum edicta, nec bullæ Pontificum, quorum libidini in affligenda Ecclesia morem gessimus: atque adeo ne ipsa quidem collium montiumque vasta ponderosaq; moles abscondere



## AD BELGAS.

dere nos atque protegere gremio suo poterit.

Cum verò nec effugij locus, nec spes auxilij, nec mora supplicij, tenente jam atq; intentante nobis potentem præsentemque ultionem suam Domino Deo, usquam affulgeat, ipsa nos necessitas, Belgæ, si minus voluntas, ipsa magnitudo periculi quo nos vocet, ducat, rapiatque, videtis: nempe ad ipsum, qui offensus est, quiq; pœnis jam nostris admovit manum & ni deprecatum mature venimus, non a movebit antè, quam nos ad interuersionem consumptos, ac damnationi supplicijque sempiternis addictos traditosque cum stirpe adeoque nomine nostro ex ipsa terra ac memoria viventium prorsus funditusque deleverit. Hic nobis adeundus ac deprecandus est ipse, & nemo præter ipsum, nemo itè cum ipso, aut præ ipso. Hoc nobis adhuc unicum verum fidumque, rebus alioqui perditis ac deploratis, perfugium, hæc sola certa, firma verèque sacra anchora inter sævos desperationum dubitationumque fluctus jacienda figendaque, hic denique solus certus æternusque æternæ salutis ac vitæ portus subeundus erit. Idem quoque medicus erit, qui vulneravit: idem patronus ac defensor, qui & iudex vindexque tribunal jam conscendit: idem servator, salus vitæque nostra, qui alio, qui perdere nos æternoque exitio dedere, & hostibus nostris de calamitatibus interitūque nostro grata ac sperata gaudia triumphosque, nisi

*Act. 4.*

*1. Tim. 6*

*Luc. 5.*

*Iob. 5.*

*Esa. 61.*

*1 Ioan. 2.*

*Luc. 10.*

*Ec.*

*Matt. 10*

*Ec.*

*Esa. 106*

D v

serio



## ORATIO

*Psal. 51.* seriò resipiscimus, concedere decrevit. Caterum  
 ut solus ille obligare vulnera nostra, & sanare  
 morbos languorèsq; & ab interitu in salutem  
 asserere nos porest, ita nisi contritos corde, con-  
 fractos spiritu, & morbum ingenuè agnoscen-  
 tes, ac medicam ipsius manum ex animo implo-  
 rantes, sanare ac servare non volet. Quoniam  
 autem non aliter morbū satis agnoscimus, quā  
 expensa ad trutinam verbi Dei vi & magnitudi-  
 ne peccatorum nostrorum (hi namque revera  
 morbi nostri sunt) necesse est, siquidē bona fide  
 sanitatem querimus, ut non circumspiciamus te-  
 nebras tegendis peccatis, non fumos, aut fucos,  
 aut folia ficulna, aut strophas sophismatum ad  
 fallendum configendumque insomne oculum  
 Domini Dei, ac sapientissimi medici nostri Chri-  
 sti: sed prodeamus in ipsam verbi divini lucem,  
*Rom. 7.* & examinata ad ejus, non nostram, normā mi-  
*Psal. 19.* seria magnitudinēque delictorum, agamus verā  
 ex intimis animorum penetralib' pœnitentiam:  
*Galat. 3.* demittamus cristas & supercilium proprię justi-  
*4.5.* cię, dignitatis meritorumque: humiliemus cor-  
*Rom. 4.* da, nosque ad pedes Dei nostri prosternamus:  
*Eccl.* ac meruisse nos extrema quęque bellorum, ca-  
 lamitatum, famis, morborum, ac mortis denique  
 æternę perpetua tormenta profiteamur. Imitemur  
 laudabile & æterna dignū memoriā exem-  
 plum Ninivitarū, qui ad legationē Ionę prophe-  
*Iona 3.* tæ non modò non obfirmarunt animos: sed etiā  
 (ut hi-



## AD BELGAS.

ut historia sacra testatur, conspersi cinere, sac-  
 cosque induti (in signū veri doloris) publico lu-  
 ctu egerunt pœnitentiā. Proponamus nobis Is-  
 raëlitarū in exilio Babylonico etsi serā, tamē ve-  
 ram seriāq; idololatriæ ac delictorū suorū con-  
 fessionem. Sanctificemus jejunium, rumpamus  
 nō vestes, sed corda, non postes, sed pectora: De-  
 mus hanc gloriā Deo justo, vero & veraci, dam-  
 nemusque nos ipsi antē, quā ab illo condemne-  
 mur. Compungat nos, angat crucietque horror  
 iræ judicijque divini adversus immēsam magni-  
 tudinē & profundā abyssum peccatorū nostrorū.  
 Ne purgemus facinora: néve peccata vel hypo-  
 critarum more elevemus, vel obstinatorū idolo-  
 latrarum exēplo defendamus, patrocinantes hoc  
 modo blandientēsq; haud dubiæ miseriæ atq;  
 condemnationi proprię. Sed si sapimus, cum Da-  
 vide, Ezechia, Manasse, Paulo & Petro, atq; alijs  
 pijs hominib; pœnitentiā verā quā publicē quā  
 privatim agamus, verā peccatorum confessionē  
 agamus, dicamūsq; in hunc vel similē modum:

Peccavimus, ō Deus, nos & patres nostri, at-  
 que impijs ac sævis nos facinorib; obstrinximus,  
 & peccata nostra nunquā non obversantur no-  
 bis, nōsq; coram judicio conscientię nostræ, &  
 imprimis ante justissimum severissimumque tri-  
 bunal tuum accusant. Et si vel maximē nos ta-  
 ceamus, celare ea cupientes, clamāt tamē con-  
 tra nos & vindictā tuam divinā penē clara voce  
 depo-

2. Esd. 10.

1. Cor. 11.

Dan. 3.

Psa. 106.



# ORATIO

**Apo. 6.** deposcunt spretum à nobis repudiatumque san-  
**Gene. 14** ctissimi foederis tui sacrosanctum volumen, ac  
profanatum impio idolorum cultu templum tuum,  
& crudeliter injusteque profusus à nobis inno-  
centium tuorum & fidelium servorum ac mar-  
tyrum sanguis. Clamant contra nos & ipsa ter-  
ra, flumina & maria, quæ nostris ex manibus hau-  
rire innoxium sanguinem, & idcirco divinam  
exsecrationem nostro merito sustinere coactæ  
**Mat. 2.** sunt. Clamant denique & ligna ipsa & lapides,  
aurum & argentum & gemma: ipsa quoque ossa,  
pulveres ac reliquiae sanctorum Ecclesiae primi-  
tivæ martyrum, quæ nos impie eruta sepulchris  
idololatriæ nostræ, ad inflammandum in nos i-  
psoque iram zelumque tuum, servire coëgimus.  
**Psal. 40** Peccata itaque nostra, quorum numerus & capi-  
**Eccl. 19.** tum nostrorum pilos, & ipsas littorū arenas exce-  
**Mat. 23.** dit, quæque coelum terramque & eorum omnem  
plenitudinem servitio tuo dicatam, in nos exa-  
cerbarunt, exulare amplius neque possumus neque  
volumus. Non sumus autem, o Domine, digni  
amplius hujus suavissimæ lucis usura, neque a-  
spectu convexi altitudinisque coelestis. Scimus  
quoque, & jam nunc sentimus, te justum atque in-  
**Hebr. 12** corruptum esse iudicem, oculatum ac præsentem  
**Rom. 2** testem inspectoremque actionum cogitationum  
que nostrarum, & præpotentem vindicem cum  
aliorum scelerum, tum & inprimis idololatriæ  
& contemti projectique cultus tui. Itaque si in  
judicium



## AD BELGAS.

judicium intrare nobiscum, pro quoque jure tuo statuere de nobis velles, non dubium, quin despondendum nobis, ac pereundum de terra numeroque viventium extemplo esset.

Sed quoniam ex adverso de tua quoque clementia, benignitate ac misericordia erga eos, qui in mole peccatorum suorum, atque comminatione horribilis judicii tui pressi territique, vera eundem poenitentia ac dolore contusi fractique, ad gratiae tuae thronum confugiunt, & clementiam tuam in Iam salutis suae fiduciam supplices vera fide implorant, ita persuasi sumus, ut quantumvis ingentem miseriae nostrae magnitudinem longe superent immensi atque inexhausti gratiae bonitatisque tuae thesauri: nos quoque calamitatum peccatorumque nostrorum sensu, dolore, & justissimi judicii tui terrore paventes atque consternati, supplices tibi manus tendimus, & ad gratiae tuae thronum abjecti veniam delictorum oramus. Neque dubitamus, quin exoraturi etiam simus. Tu enim, ut clementissimus pater, multorum reorum, & imprimis Pauli, Petri, Davidis & Ninivitarum exemplo contestatam nobis vere paternam & infinitam tuam misericordiam fecisti, nolle te videlicet pertinaciam & mortem, sed poenitentiam & vitam miserorum peccatorum. Etsi ergo te, justissime Deus, & magnitudine & multitudine scelerum nostrorum gravissime offendimus, planeque digni sumus,

*Psal. 51.  
Ezec. 18*

*Isai. 6*

*Ezec. 23*



## ORATIO

mus, in quos universas ultionum tuarum plagas  
semel ac simul effundas: hac tamen infinitę bo-  
nitatis tuę fiducia, clementissime Pater, ad thro-  
num gratiæ tuę accedere audemus. Ignosce igi-  
tur, ó Pater, ignosce, agnoscentibus peccata, par-  
ce prostratis, & redde vitam perditis, lumenque  
salutare benigni vultus tui obverte infelicib' no-  
bis. Spiritum quoque tuum, Spiritum veritatis  
& iudicii da nobis. Spiritum novum rectumque  
nostris in visceribus innova, ut te solum post-  
hac & agnoscamus & adoremus verum Deum,  
& quem misisti Iesum Christum. Sic nos ne-  
que ab obedientia, fide, amore cultuque tuo ad  
aliena cõmentitiaque numina ullis unquã præ-  
stigijs ac sophismatis abduci nos patiemur: & in  
Ecclesia tua perpetuo habitabimus, ibique cele-  
brabimus nomẽ tuum, & canemus ac recinemus  
benignitatis ac misericordiæ erga nos tuæ im-  
mensam magnitudinem laudibus sempiternis.

Hac sanẽ, aut huic non multum dissimili, Bel-  
ge, confessione ac deprecatione, opus habent res  
nostræ, non autẽ sophistica vel extenuatione vel  
defensione tantorum criminum. Nam ut fumis  
ac præstigijs sophistarum non fallitur, sed magis  
irritatur Deus, ita cõfessionis ingenuitate ac fide  
placatur, inclarescitque nobis salutiferum lumẽ  
vultus eius. Utque iam nõ fucis ac tenebris locus  
est nobis, quorum peccata atque ignominia tam-  
res, quam dies ipsa suā lucem protraxit: sic neque  
fugas.



## AD BELGAS.

fugæ aut latebris, ad quas nulla velocitas proderit, neque effugio, cuius omnis vana spes erit, nisi ad ipsum confugere Deum nostrum contendamus, vanæ fallaces ac præcipites quærendæ sunt viæ.

Valeant itaque sophismata, valeant & sophiste, idolorum nostrorum cediumque patroni atque architecti. Valeat immò doleat, egeat, oleat ac pereat malè, angatur, ringaturque salute nostra, successu Ecclesiæ & adventu Regni Christi universa illa palustrium, ranarum, locustarum, hypocritarum, sycophantarum ac sectorum malefica, venefica ventri abdominique dedita turba dum nos, spretis illorum calumnijs ac vocibus Sireneis, rectum clavum tenentes in portum salutis dirigimus navem. Pereat, intereat (servari enim nō vult) & de terra viventium extirpetur nefaria ista & exitialis Ecclesiæ patriæque fax, pestis, pernicies, morsque omnis pietatis ac virtutis, rebellis in Deum, crudelis in genus humanum, infamis ad omnem posteritatis memoriam, ebria non vino, sed sanguine, devota jurataque obsequijs magnæ meretricis, Inquisitorum, Jesuitarum, Franciscanorum, Dæmonianorum & reliquorum (exhaustire enim foetidam istam ultroneæ mendicitatis sentinam molestum est) tetra tetricaque progenies. Pereat, inquam, (quoniam Deo ipsi ore blasphemio laqueum mandat) ruarque in præceps, & letheis porius mergatur

*In Inquisitorum & monachorum savi-  
tiam & hypocri-  
sim.*



## ORATIO

mergatur aquis, impius ille atque infinitus risorum, atheorum, ventrum, nebulonum, leonum & lenonum, luporum, urforum & pardorum exercitus, quam nos fraudibus ac furoribus illorum, postquam divinitus meliora didicimus, amplius obsequendo pereamus & ipsi male cum malis.

Vtinam autem hanc nobis mentem det Dominus, ut salutaribus ipsius consilijs admoniti, & euangelij luce illustrati abijciamus tandem omnia opera tenebrarum ac pseudoprophetarum: & fugiamus, vel potius fugemus tristes istos & graves, atque vel solo obtutu lethales, vitæ nostræ basiliscos aspidesque, quorum virulentis oculis, & perniciosis consilijs immane quantum hætenus læsi sumus: & quorum sevicia non solum omnium tyrannorum ac ferarum inhumanitatem superat, sed ipsis quoque terrarum, undarum, & flammarum elementis gravis est. Nam cum iam appropinquante iudicii die ipsa tellus undeque reddere atque eructare gestiant, quæ invita hausere, piorum Iesu Christi testium corpora sanguinemque: tam hæc teterrima monstra naturæ, hæcque insatiabiles furæ & vultures avidissimi crudelissimi que ne his quidem tantis citioris humani fluminibus ac maribus exsaturati, sed insuper ad plures majoresque adhuc cædes ac strages superioribus lanienis quasi escis illecti, & internecioni Ecclesie Christi ac demum ipsius totius humani generis inhiantes atque invigilantes, spargere-



## AD BELGAS.

spargere venena sua & consilia sanguinaria suggerere magistratibus ne nunc quidem cessant. Cum enim qualemcunque hanc Ecclesiæ quietem, vel potius inducias, pro innato ipsis odio gloriæ divinæ, & dolore invidiaque successus regni Christi, non ferant maligni catoblepæ nostri, anguntur & quiritantur, turbati orbis, hoc est, commotæ ac periclitantis tyrannidis suæ solam esse causam, ignaviam ac negligentiam magistratuum parentium hæreticis.

Agnoscit enim, ni fallor, quæ vestra prudentia est, Belgæ, veterem cantilenam & feralem negniam infauitissimarum avium. & quos dent gemitus, quas cieant lachrymas, quæ vobis tendât retia laqueosque, videris. Dolent, scilicet, & illachrymantur vulneribus orbis clementes lanistæ, vel potius crocodili, quæ ipsi inflexerunt: & eripi siti suæ cruentæ à meditata laniena tot tamque præstantes ditiones ac provincias moleste ferunt. Et mirum, ni vel feralia nobis convivia nuptiasque, quales non ita pridem Gallis fecerunt, apparare satagant, vel universis Christianis unam optent cervicem, quando singulos confectari longum est. Hinc illæ, nimirum, lachrymæ fletusque crocodilorum nostrorum. Hinc suspiria illa gemitusque Acherontiorum dæmonum, stygiæque paludis ranuncularum. Hæc illa funesta Belgio totque malorum conciliatrix Helena, quam ne sic quidem, nisi post internecio-

E

nem



## O R A T I O

nom & patriæ & suam reddere marito, vel potius lenoni suo volunt.

Vos igitur, Belgæ, ad perdendum Belgium appellandi atque impellendi estis, hoc est, ad explendam carnem ac sanguine vestro, vestrorum famem, sitim, rictum & ingluviem inexplebilem immitissimorum vulturum. Credite autem, si placet, non mihi, sed vobis, immò ipsis inquisitoribus, eorumque actionibus quotidianis, & videbitis id quod res ipse clamant, ad satiandos istos nihil omnib<sup>9</sup> supplicijs actum esse, nisi uno compendio unoque incendio flammarum sacrificetis desiderijs istorum: aut, si mavultis, uno undarum diluvio diuturnam tristitiam & cruentitas lachrymas istorum abstergetis abluatisque. Scitote vos hactenus ludos tantum fecisse istis, nisi & cognatos & fratres, & uxores liberósque vestros (quotus enim quisque apud nos non aspicit hodie lucentem gentibus, regnis ac provincijs vicinis clarissimum euangelij solem?) ut hereticos, atque ad extremum & vosmetipsos, gratissimam istis præter omnes superque omnes alias hostiam (nam & vos jampridem parcendo hæreticis & paciscendo cum hæreticis illorum iudicio labem hæreseos contraxistis, deosque eorum irritastis) una in ara juguletis mactetisque, eoque demum cruento sacrificio placatis istis numinibusque istorum regnum ac monarchiam mundi desertam consecratis.

Huc



## AD BELGAS.

Huc enim tendunt consilia istorum, huc affe-  
 rant viam, ut relegato ad Epicurum atque De-  
 mocritum Deo, ipsi vacuum orbis possessionem  
 cum dijs suis occupare, trucidato genere homi-  
 num, possint soli. O furias infernales, o se-  
 pulchrales dæmones, o serpentes draconesque  
 immitissimos perditissimosque. Irritatus est, sci-  
 licet, Deus, quod segnius mactavimus hereti-  
 cos, quodque fiti cruoris humani exarescunt in-  
 saturabiles fauces vestre? Audimus, o boni, &  
 quidem credimus. Sed quis Deus, dicite o sacra-  
 myste implacabilis Acherontis. Nimirum ve-  
 ster ille, qui sua vobis arcana communicat, Deus  
 Venter, vester ille Plutus, vester summus ille, &  
 cui hæc omnia sacrificia paratis, tenebrarum ne-  
 quitiarumque coelestium dominus deus Abad-  
 don, efficax in contumacibus, mendax, homici-  
 cida, rex locustarum & pseudoprophetarum: qui  
 mulierem parturientem in deserto persequutus  
 est, cui caligo tenebrarum vobiscum in æternum  
 servata est, qui que tandem cum devotis manci-  
 pijs suis ad sempiternos cruciatus in stagnum ful-  
 phureum abjiciendus erit.

*Ephes. 2.*

*Apoc. 9.*

*2 Thes. 2*

*Apoc. 12*

Hic est videlicet perditus ille seculi hujus  
 Deus, qui cæde & mendacio gaudet, qui san-  
 guine Christianorum potatur, pascitur ac vivit.  
 Huic si ritè litabimus, non nisi totius Ecclesiæ  
 Christianæ patriæque nostræ, & universi homi-  
 num generis panoletiria, uti jam dictum est,

E ij

defun-



## ORATIO

defungemur. Qui si ad intermissam mactandi consuetudinem turbatur, & maturitatem iudicii supplicijque sui adeo propinquā aspicere equis oculis non sustinet, quid mirum? Quid mirum, si consuetum incendiorum nidorem, & suaviorum vino sanguinis potum, & quætuosas sectiones, & quadruplationes, seu triplationes erepras sibi Abaddon, Venter, Plutusque dii vestri doleant anganturque.

Sit ergo hæc ira deorum vestrorum, & accusate, incusate atque arcescite, quā vultis diu, magistratum ignaviā turbati regni tenebrarum: ruere tamen vos vnā cum dijs ac tenebris vestris adventu solis iusticiæ, fierique tandē vobis ceu decrepitis araneis, proprias perniciosorum consiliorum telas, retia, fossasque necesse est.

At noster hic cœli terræque conditor Deus vivus, veræque Optimus Maximus, clemens, amans hominum & servator, non perditor humani generis, qui orbi servando, non perdendo, inaudita bonitate unigenitum filium dedit, qui ad docendos, non trucidandos errantes doctrinam salutis per prophetas & apostolos conscriptam servandā Ecclesiæ & sancte custodiendā, non adulterandā nec augendā minuendāve tradidit: & huic ministerio magistratū in terris suo loco constituit ac maiestate ornavit: is adeo non irascitur magistratui abstinenti manus à sanguine piorum afferentiū afferentiumque eandē

hanc

*Ioan. 3.*

*1 Ioan. 4*

*Rom. 5.*

*Eccl.*

*Ephe. 5.*

*Deut. 4.*

*Psal. 119*



## AD BELGAS.

hanc non aliam doctrinam, quam ab apostolis quidem bona fide traditam, sed nostra ingratitude neglectam, scelere corruptam, impietate amissam, vix inter chartas & pulveres monasticæ barbariæ ac misanthropiæ nostris temporibus reperiébamus, ut etiam gratia sua atque omni donorum genere prosequatur eos, qui hospitium Ecclesiæ dederint: & contra oderit, exsecratur, malosque male perdat, qui non dederint. Matt. 1. 2  
&c.

Huic autem Deo nostro forti & gloriæ suæ zelotæ nō modò non molesta, sed contrà mirificè grata potius est, mirisque laudibus & benedictionibus ornata magistratus pietas monstratos errores abrogantis, veramque doctrinam, germanum sacramentorum usum, & legitimum ejus cultum publicè restituentis. Docent id exempla Moysis, Iosue, Iudicum, Regum, Esdræ, Nehemiæ & Machabæorum.

Sed hæreticis, inquit, & schismaticis parci non vult Deus. Audimus & istud. Quia verò & veri Dei nomine ac titulo nequiriam vestram & sæviciam velare non desinitis, agite, descendite in harenam, & pedē conferte in plano, & ostendite, si potestis, hæreticam esse hanc doctrinam, cujus lucem oculi & tenebræ vestræ non ferunt neque comprehendunt. Ostendite schismaticos esse eos, qui, ut ad Christum Servatorem accedere possent, salutem & pacem inventuri, à vobis perditis ac perditoribus male tractati, ne planè

E iij

ad in-



## ORATIO

*Apoc. II.*

ad internecionem redigerentur, recedere necesse habuerunt. Id quia non facitis, ne infinitis quidem fumis ac flammis, iris atque diris, commentis ac tormentis, ranis & locustis è puteo abyssi vestrae in terram ad obscurandum solem & miscendum bellis auxilio bestiae terrarum orbem emisistis: sed contra vobis frementibus gementibusque salutiferam hanc doctrinam, verèque catholicam ipsius Iesu Christi & apostolorum nunc Dei beneficio reducem & jure postliminij priscinum decus recuperantem læta hodie excipit Europa, fumorum fucorumque vestrorum jam pridem pertæsa, quo tandem jure, quo item ore negare potestis, catholicam esse, quam tot artibus viribusque, tot bellis ac cædibus non tantum non expugnastis, sed & confirmastis & munivistis magis? Itaque vobis vel invitissimis conscientiae vestrae judicio fatendum erit id, quod Deus ac dies ipse ostendunt & evincunt, ipsissimam Christi & apostolorum doctrinam virulentis morsibus vestris peti atque ore impuro blasphemòque damnari hereseos ac divisionis. ejusque odio totum terræ, solis cœlique orbem à vobis ipsis, non nobis, perturbari atque commisceri.

Quia verò ad cædes faciendas (unum enim hoc remedium solumque fulcrum ruiturae tyrannidis Antichristi videbatur, ut cum jure causæ non posset, vi metumque confirmaretur) parum æqui videbantur superi, parumque in mala causa præsidii.



## AD BELGAS.

Adi, movendus Acheron & evocanda ab inferis  
Alecto quæpiam fuit. Itaque concitari primum  
imperij vires in Ecclesiam placuit. Postea ubi  
hac res successit, & in Anglia, Scotia, Gallia, tan-  
demque & apud nos, ubi re ipsa cognitum est,  
nihil profici supplicijs, verissimumque esse quod  
quidam dixit: Cineres martyrum esse semen Ec-  
clesiæ, publicè capta sunt arma.

Ceterum ne sic quidem vel hilo facilius esse  
contra stimulum calcitrare, aut felicius omnia  
arma sumi adversus Dominum armorum &  
exercituum, tristissimi casus tyrannorum, qui  
in hunc invictissimum Monarcham experiri vi-  
res suas ausi, simul & calces & cornua sua per-  
fregere, plus satis apertè declararunt: & ipse  
dies Domini jamjam porro declarabit, qui ut  
omnia occulta revelaturus est, sic & pseudo-  
prophetarum blasphemias in jugulum fremen-  
tibus gementibusque ipsis recoacturus, & du-  
plum eis meritumque iræ suæ poculum prope-  
diem misturus. Quoniam validus est Dominus, *Apoc. 18*  
qui jampridem damnavit eos.

Angantur itaque glorioso adventu Domini  
nostri Iesu Christi, & ringantur, si libet, omnes  
ranæ locustæque, dum & rumpantur: fremant,  
dum gemant: screent atque exscreent quæ  
possunt in Deum Christumque ejus convitia,  
dum fleant ac defleant jam vilium ac putida-  
rum mercium escarumque suarum justissimum

E iij

contem-



## ORATIO

**Apo. 18.** contemptum atque fastidium, & meritas tandem  
contempti numinis, impugnatu Evangelij, & illu-  
si confusi que orbis pœnas exsolvant. Corruere  
enim illos atque ire præcipites unâ cum Baby-  
lone, quæ eos diravit, ebriaque sanguine sancto-  
rum meretrice, quæ seduxit, fascinavit ac demer-  
avit eos, decretum est signatumque divinitus.

**Hebr. 4.** Verum, ut istos jam ad stagnum suum pu-  
reumque, vnde egressi sunt, remittam, vos mihi  
iterum appellandi obsecrandique estis, Belgæ, ut  
si verbera divina, quæ modò sentimus (sensuri  
magis, nisi cavemus) eorumque causæ verè no-  
bis dolent, ne cogitemus de fuga, nec vana qua-  
ramus effugia: sed confugiamus potius ad ipsum  
qui nos ferit, accidamus atque procidamus ad  
thronum immensæ gratiæ ac misericordiæ ejus  
vera cum animorum dejectione atque fide, di-  
gnosque pœnitentiæ fructus edamus. Et quem-  
**Luc. 3.** admodum Deum nostrum hactenus impio ido-  
lorum cultu, stulto contemptu verbi, & injusta  
laniena populi sui in nostras pœnas provocavi-  
mus: ita jam hinc inde profligatione idolorum,  
& restitutione veri cultus ac doctrinæ, & pio in  
Ecclesiam ejusque ministros amore, inflamma-  
tam in nos iram Dei mitigare, ac dolorem no-  
strum veræ pœnitentiæ testem veris quoque pœ-  
nitentiæ Christianæ documentis demonstrare  
atque exprimere contendamus.

Non dubiū autē, quin si his animis ad Deum  
nostrum



## AD BELGAS.

nostrum venerimus, fida interpellatione Servatoris nostri Iesu Christi subnixi, non solum veniam à Patre clementissimo impetraturi, sed & imposterum divinitus adversus quas libet minas Satane ac mundi certissima promissimaque auxilia habituri simus. *Rom. 8.*

Et quod ad veniam quidem attinet, eam hac lege certo sperabimus, si non desperabimus: certo quoque consequemur & assequemur, si sequi eam bona fide, ac persequi non cessabimus. Et enim ille immensæ bonitatis atque clementiæ Deus Pater Domini nostri Iesu Christi, qui à limine misericordiæ suæ neminem submovet, immo verò, qui quosvis ad se peccatores invitat, *Matt. II* quique veros veræ poenitentiae stimulos electis suis subdit, ut poenitentiam non fictam agere queant, is nos quoque ad pedes divini benignitatis suæ provolutos minimè repellet. Et si nos malum cogitationum nostrarum auferamus è conspectu Domini Dei nostri, lavemusque manus rapina & sanguine plenas, causam innocentis, oppressi, vidue & pupilli suscipiamus: & exstantia adhuc adhærentiaque rotis, postibus ac paribulis, ad fœdum indignumque spectaculum visentium & escam alitum ferarumque, corpora sanctorum martyrum piæ sepulturæ mandemus cum ingenua veraque nostræ crudelitatis tristitia ac dolore, dubitare non oportet, neque disputare adversus Dominum: quin, si vel coceum vel *Esa. I.* purpu-



## ORATIO

*2. Cor. 1.*

purpurā rubedine vincant peccata nostra, ipsam  
lanam nativam nivemque candidissimam per  
gratiam Dei candore sint superatura.

Et si ergo ob oculos nobis versatur & nume-  
rus & magnitudo miserationum & iniquitatum no-  
strarum, quibus patientiam ac longanimitatem  
divinam tam diu fatigavimus, quia tamen infi-  
nitus, immensus inexhaustusque gratiæ illius  
thesaurus est, quem superare numerus quamli-  
bet ingens non potest, moderandus ita dolor  
est, ne nos absorbeat ægrotudo, ne de gratia  
desperantes exemplo Caini, Iudæ ac similiū, &  
contumaciter accumulātes nobis iram Dei, rui-  
nam nostram acceleremus: sed ut veram & sa-  
lutarem resipiscentiam efficiat & fidem accen-  
dat is, qui ad salutem deducit dolor, quem Deus

*2. Cor. 7*

ipse facit: cum ē contrario mundi dolor stimulis  
diaboli mortem afferat. Remissa itaque peccata  
nostra erant, si remissionem, non aut impie de-  
sperādimus, aut repudiābimus arroganter.

De auxilio divino fidæque protectione cul-  
torum ejus tum demum cogitandum nobis erit,  
quum nos, quod nostrarum est partium, ipsi præ-  
fiterimus. Nisi autem ad obsequium voluntatis  
ejus, & officium vocationis nostræ bona fide  
simus comparati, non video, quomodo de auxi-  
lio ejus tempestivo certoque certi esse possimus,  
cujus consilium fidissimū saluberrimūque re-  
pudiamus. Quò enim Deus vocat (vocat autem  
ad glo-



## AD BELGAS.

ad gloriam suam & salutem nostram) intrepide  
alacritérque citra hæsitacionem, tergiversationē  
ac respectationē per omnia impedimenta per-  
rumpendum, sequendū, ac pede fausto pergen-  
dum, siue æqua sit via, siue iniqua. Ipse enim, qui  
vocat, dirigit & cōplanabit omnes vias nostras. *Luc. 11.*

Quamobrem commissa ipsi Domino Deo  
omnipotenti, veraci, & soli sapienti eventus cu-  
ra, ad repurgandum idololatrię templum ipsius  
& restaurandum verum Dei cultum, Deo ipso  
adjutore ac duce, accingamur & accedamus  
cum certa boni exitus fiducia. Accersamus er-  
go primū doctos, fidos piōsque ministros, quē  
moribus ac doctrina sana rectē atque ordine do-  
cendo faciendōque, Ecclesię fundamenta ja-  
ciant, & cum sana doctrina verum sacramen-  
torum usum ex institutione ac mandato Christi  
ad regulam Scripturę demonstrent. Deinde ne  
quid interim confuse ac perperam in ipsis ini-  
tijs, quasiq; primordijs Ecclesię, ad offendicu-  
lum ignorantū fiat, ordinem aliquē ac politiam  
ecclesiasticam seu disciplinā coercendis enormi-  
bus virijs ē scriptura, qualem ab apostolis acce-  
pimus, aut saltem proximum ei instituamus.  
Tum etiam avidos doctrinę nos ipsos, dociles  
& obsequentes Christo atque euangelio redda-  
mus. Sic etenim & domum Domini, id est, Ec-  
clesiam edificabimus, & factiones & hæreses via-  
rabimus facilius.

Ne



## ORATIO

**Mat. 20**

Ne autem pudeat nos vel serò tandem, vel etiam undecima diei hora in sacrosanctam Domini vineam, non tam ad suscipiendum laborè ac molestias, quam ad percipiendum verum fructum & gaudia immortalia prodire. Satiùs nobis sit serò venire, quam non venire unquam. Quanquam ne serò quidè venturi sumus, si saltem venire serò, & intonantem auribus nostris verbi coelestis tubam vel nunc tandem exaudire non detrectabimus. Non enim vel horarum, vel articulorum, vel etiam locorum ac spaciòrù, sed Domini Dei Patris & Servatoris Christi, qui nos invitat, est salus & vita nostra in cuius sanè rationibus primi pro ultimis, proque primis ultimi persèpe reputantur. Gratia enim suæ præmia, non temporum laborumque nostrorù precia suis adnumerat Dominus, cuius sunt omnia.

**Ps. 2.**

Properandum est ergo occurrendumque adventanti sponso. Maturandum figendumque pacis osculum clementissimo Principi ac Regi nostro Iesu Christo. Festinandum autem non ideò tantùm, ne expeditam in nos ultionem, & jam sublatam virgam ejus ferream gladiumque extensum à cervicibus nostris avertamus, verum etiam ut voluntaria alacrique obedientia liberaliter ac libenter, ut filij, serviámus, & gloriam demus Deo vivo, Patri & Redemptori nostro, cuius gloriæ tantum nati creatique sumus. Gratum enim Deo quidem est servorum suorum obsequium



## AD BELGAS.

quum, & metus iræ ac vindictæ ipsius. Sed gratior, immò bis gratus est filiorum liberalis pudor, quem non tam metus supplicis, quàm amor officij conciliat. Duplici itaque jure ad placandum Deum accingi nos oportet: tum quia Dominus servorum potentissimus, tum quia Pater amantissimus filiorum suorum est: Iudex quidè & vindex rebellium atque fugitivorum servorum; at propicius, clemens & munificus remunerator fidelium liberorum, etiam eorum, qui post agnititas errorum offensas ad Optimum Clementissimumq; Patrem confugere, quàm ad Satanam perfugere, malunt. Ejus ergo cultui gloriæque deditos nos esse par est tam promptè, quàm necessariò, cujus & servi sumus & filij. Cum enim solus ipse sit & Pater & Deus noster, & solus condiderit nos sine ope idolorum: sibi soli, non idolis: ad imaginem suam solius, non idolorum: nos- que post amissam hanc imaginem solus sola gratia per Christum unigenitum suum solum reconciliatos, & per Spiritum Sanctum solum in eandem, non aliam, imaginem regenitos denuò adoptaverit in filios & heredes, ad gloriam suam & salutem nostram: sitque per hæc tam redempti, quàm creati, tam regeniti, quàm facti hominis solus in solidum author, indignissimum profectò fuerit, vel præter ipsum, vel cum ipso, vel æmulum vel socium tantarum laudum ipsi surrogare conjungeréque.

Quod

Genes. 8.

1. MATT



## ORATIO

Quod si verò de cultu Dei nullum prorsus aliud in sacris literis testimonium exstaret, tamen meo quidē iudicio, vel sola hac ratio plus satis convictas captivasq; tenet conscientias nostras, redditura inexcusabiles coram Deo omnes vanorum iuminum adoratores, quod gloriam Dei creatoris ad res creatas impie sacrilegèque transtulerint.

Iam cum de debita veneratione Dei tam multa tamque illustria per totam consentientemq; scripturę seriem existent testimonia, quam ignorantiam nisi affectatam atque accersitam voluntario errori obstinataque impietati prætexem? 2. Cor. 4 Nam de hac ita Paulus: Quod si rectum est, inquit, euangelium nostrum, ijs, qui pereunt, rectum est: in quibus Deus huius seculi excavit mentes, nempe infidelibus, ne resplendeat ipsis lumen euangelij. Ne recusemus ergo debitam meritamque gloriam reddere Deo nostro, qui indebitam immeritamque gratiã suam tribuere nobis non recusavit.

Loquor autē vobis, Belgæ, cum singulis, tum universis. Singulis quidem, ut non modò templum suum unusquisque, hoc est, conscientiam suam, seque ipsum totum diligenter repurget, sibi que caveat ab idolis: verum etiam ut pro suis quisque dotibus, vocatione ac munere, ad gloriam Dei sui, ad incrementum Ecclesiæ Regni-que Christi Domini ad publicam cum totius hu-  
mani



## AD BELGAS.

mani generis, tum imprimis patrię salutem & incolumitatem conferat impendatque omne studium, opem, consilium, & se denique ipsum, si sit opus. Videant ergo Princeipes, procures, rectores ac præsides populi, civitarum & provinciarum, quid hac in parte supremo Principi, Rectori, Præsidi que totius hujus universi Deo, quid item saluti subditorum suorum debeant, & quomodo fidē suā apud eum liberent.

Videant & Ecclesiastici, Præsules, Episcopi & Pastores, quid ab eorum fide Christus pastorum princeps, quid Ecclesiarum suarum numerosi greges, quid item nomina ipsa tituli que tam onerum quam honorum pleni deposcant. Nimirum ut, quemadmodum huc usque vel errore, vel studio partium, quæ non raro etiam bona ingenia abripuere, placere Romuleo idolo sategere, ita placare nunc verum Deum omni ope studio que contendant, ejusque cultum gloriam que inter homines restituere ac propagare laborent.

Vniuersis autem, ut de communi consilio ad exemplum optimi maximęque pij Regis Iosifæ & populi Israëlitici, & præstantissimorum ducum Esdræ, Nehemiæ, & ceter. templum Dei ædificetis, & erroribus & superstitionibus repurgatis, vosque ad excipiendum æternum Regem, & Sponsum vestrum Iesum Christum sedulo, prout ipsius maiestate dignum est, comparetis.

Recipi

2. Re. 22



## ORATIO

*Isai. I.*

*2. Cor. 6*

Recipi autem ille nisi mundum nitidumque in thalamum nequaquam poterit. Quare mittendum spurcissimo Beliali, crudelissimo Abaddon, perfidissimoque draconi, atque audacissimo nequissimoque Antichristo confestim sineque tergiversatione repudij libellum censeo, & turbanda tollendaque è medio omnia spiritualis turpitudinis atque abominande cum eo consuetudinis & contaminationis vestigia: quando nulla societas Christo cum Beliale, neque templo Dei vivi cum mortuis simulachris esse potest.

Nec me hoc loco commover, quod quibusdam fortè morosior parùmque civilis monitor videar, qui me hoc ipso contentum esse iubebunt, quod jam non solum à supplicijs innocentum beneficio pacis abstineantur manus, sed etiam pax & quies ipsis Ecclesijs renascentibus quibusdam in locis concessa sit. Namque equidem, qui nihil hic mea sed omnia Christi, Ecclesie & vestra, ô Belgæ, causa laboro, nullam hic calumniam aut convicium reformido, dum & vos & patriam universam incolumem & salvam Christo lucrifaciam. Fateor itaque ingens esse hoc Dei beneficium, quod post tantam prosequutionum tempestatem ac procellam, tamque densas ac diuturnas errorum tenebras lux tandè & serenitas affulserit Ecclesie Belgicæ, quodq; flammarum, vndarum, gladiatorum terror à cervicibus Ecclesie Christi in ipsos Ecclesie patriæque crudelissi-



## AD BELGAS.

delissimos adversarios conversus sit: eoque nomine Deo ingentes gratias deberi profiteor, qui sereno vultu suo tandem respexit populum Belgicum, jamque sibi ad majora munivit viam. Nam & hæc ipsa mutatio abstinentiæque à cede, quasi confessio quædam malæ causæ & injustæ Ianienæ non sine causa videri queat.

Sed sicut hoc est maximum procul dubio beneficium Dei nostri, ita & maximas ei gratias agere nos vicissim, & gratis animis oblatam gratiam amplecti, & divitias benignitatis & longanimitatis ejus non repudiare decet. Non enim, ut magnū est Deo, quod ad nos venerit conservandos, ita vicissim satis erit nobis, quod ipsum venientē ad nos non prohibeamus, nisi & ultrò amplectamur & osculemur filium ejus Christū, & regno ejus nos ac sceptrā nostra subjiciamus. Nec satis est Moysi & ducibus Israëlīs, concedere populo exitum ex Aegypto, & liberum religionis exercitium, nisi & ipsi præcedant in utroque, & exemplo suo viam sternant exæquentque populo. Quid enim magnum & laude dignum alioqui præstitissent David, Salomo, Iosias & alij reges, nisi quod ite populū jubebant, eodem & ipsi populo prævivissent? Vobis ergo eundum esse primis, Belgæ, principes, præsules & antistites, vel nomina vestra testantur: ut taceam interim, ad quid honorum & munerum vestrorum ratio fastigiumque vos Deo vestro Christoque tant

F

princi-



## O R A T I O

principum, quàm sacerdotũ præsulũque Principi ac Præsuli obstringat.

Hoc ergo vestrum est primum atque propriũ munus. Vestra, vestra, inquam, hæc prima, præclarissima, & imminenti periculo maxime necessaria, & salutaris cura. Vester hic labor, Belgæ, vestrum hoc opus, vestra provincia est, debita Deo ac vestrę totiusque patrię periclitantis incolũnitati: quam non alijs delegare, neque ab alijs expectare, sed ipsimet suscipere perficereque gnaviter debetis: siquidem averfam à vobis ipsis, à liberis & conjugibus, & ab universa patria gravissimam præque omnibus terroribus maxime terribilem iram Dei cupitis. Ecce jam nunc tempus salutis oblatũ monstratumque divinitus, obvijs vobis amplectendum prensandumque manibus pedibusque, atque omni conatu.

Hodie ergo, hodie, ô Belgæ (non enim procrastinare præcipitem salutis occasionem perituri licet, quam frustra postea sperabimus, si modo spreverimus) si vocem ejus audierimus, ne obduremus corda nostra. Ne obturemus aures, neve obnubilemus oculos nostros fallacibus Sirenium voluptatumque vocibus, aut vanis sophistarum præstigijs ac fumis, quò minus & vocem Domini clamantis audiamus, & illucescentem nobis iusticię solem aspiciamus: ne & ipse vicissim pereuntibus nobis seroque vociferantibus obstruat aures avertatque oculos suos.

Sed



## AD BELGAS.

Sed sentio, planèque intelligo, nonnullis vestrum ad tam præclaram prorsusque necessariam provinciâ capescendâ impedimento esse vanum quendâ, neq; satis exploratû, ne dicam stultum, metû offendendi regis, si quid absente ipso, & (ut credibile est) invito, in religionem, quam pro catholica ipse habet, tentare novarèque ausi fuerimus. Equidem, si in præsentia de majestate aut jure aliquo ipsius Regis ageretur, de quo absente inconsultòque ipso constitui nihil posset, & in quo publica salus minimè verteretur, non modò non suaderè, sed omni etiâ studio dissuaderè, ne quid in fraudè præjudiciûmq; regis committeretur. Scio enim, & ex animo agnosco, hæc principem esse curâ principum, ut ad verum Dei cultum institui populum, & collapsum eum restitui populo satagant. Scio & honorem & obedientiâ imprimis magistratui deberi: tum etiâ vestigal, tributû ac similia: eaq; quoad vivam, magistratui meo lubès gaudensq; præsto ac præstabo.

Et testes erunt mihi locupletissimi, civitates, populi, & regna, quæ Dei benignitate jam restaurârunt, unâ cum collapsa magistratus doctrina, & veritatem Evangelij: reformârunt Ecclesias, & germanum sacramentorum, disciplinæ cultûsque divini usum, quàm piè sanctèque ibi colatur Magistratus, ubi hæc doctrina recepta est publicè: ubi à Magistratus imperio nulla populi Christiani pars ullo prorsus

*Obiectio.*

*Regis in  
Ecclesia  
auctoritas*

F ij

prætextus



## ORATIO

*Rom. 13.* prætenu conditionis, muneris aut ordinis subducere se audeat: sed, juxta Apostolicam doctrinam, quævis anima potestati supereminenti, tanquam Dei ordinationi, non tam metu ac necessitare, quam libenter & amore ordinationis Dei, propter conscientiam subjecta est. Quin etiam ipsis magistratibus nostris hanc laudem merito tribuo, quod ex eadem hac doctrina ita moderari sub Deo supremo Principe potestatis ab eo acceptæ habenas didicere, ut, quemadmodum norunt, nec imperia sua nec obedientiam populi ulterius, quam ad aras usque, pertinere, ita & se & sceptræ suæ unâ eum subditis omnipotenti Deo ac Monarchæ omnium, per quem regnare se credunt, subicere non graventur.

At hic, quia de jure ac majestate summi illius Regis agitur, qui est caput omnis principatus ac potestatis, qui confert ac transfert, quocunque vult, imperia: & quia ab hac deliberatione dependet salus publica, quæ secundum jurisconsultos suprema lex est, & si moram fecerimus, excidium patriæ præsens, optima deliberandi faciendiq; ratio erit, quæ divina majestate dignissima, publicæque saluti tutissima fuerit.

Et si verò maximopere optandum esset, ut ipsum Regem præsentem, atque, si fieri posset, quod ne sperari quidem licet modò, ceu Iosiam aut Ezechiam aliquem præeuntem populo suo in re tanti momenti, & ad primâ Regum curam haud



## AD BELGAS.

haud dubiè pertinente haberemus: quia tamen,  
ut prima ea cura est principis, conservare & re-  
staurare cultum Dei sui, sic vicissim solius prin-  
cipis non est, sed & totius populi in universum  
publicè, & singulorum privatim inque commu-  
ne, pro vocatione cuiusq;, agite videamus, quod  
hic sit populi munus ab ipso vel etiam cessante  
principe. Et quoniam in nostro principe, quod  
ad restaurandam Evangelij doctrinam ac red-  
dendam Deo gloriam attinet, in presentia opta-  
re id magis, quàm sperare possumus, cum ob  
alias, tum ob hanc maximè causam, quòd ille po-  
testatis penèque mancipij alieni, & quodammo-  
do alieno in regno tantum non captivus pro li-  
bidine publicorum Dei & generis humani ho-  
stium, ne aspirare quidem ad libertatè veri prin-  
cipis, nedum de tanta re deliberare ac statuere no-  
biscum possit, frustra id principem nostrum ex-  
spectabimus nunc, quod nobis universis in in-  
columitatè divinitus differre non licet amplius, quod-  
que ipsum ne præstare quidem posse, ut maximè  
velit, & nec velle omnino, ut fortè possit, nemo  
omnium ignorat.

Enimverò illud, quæso, mecum unusquisque  
vestrùm expendat, si vel Iosif, vel Davidi simi-  
lem & repente, non quasi loto aliqua gustata,  
sed coelesti quadam divini Spiritus aura, & præ-  
sentis Christi splendore ac fulgore mutatum ac  
transformatum regem haberemus, quid tamen

48. 9.

F iij

ab eo



## ORATIO

ab eo sperandum putemus, qui non sui, sed hostium publicorum, juris & mancipij, eorum stimulis ac furijs agitatus in proprium unicumque filium innocentem, regia atque heroica indole juvenem, tot tantorumque regnorum spem certam, nostrumque Principem, confecto crimine scire contra naturam patris coactus est: quod Belgicis injurijs ac cedibus, quae jam tum parabantur contra praeterque erant, gravius indoluisse visus esset.

Et ut uno verbo libere ingenuaque tandem, quod res est, fateamur, nec falsa spei imagine nos ludificemus ipsi, quid (inquam) aut veri auxilij, aut sani consilij, aut bonae unquam spei de hoc rege nobis pollicebimur, qui jam & pactorum omnium, & iuramentorum tam solennium, & officij sui regalis, & nostrae majorumque nostrorum perpetuae fidei, obedientiae, patientiae ac meritum omnium prorsus oblitus, nullo non conatu ac summo pertinacissime theomachiae suae periodum compendiosa totius Belgij internecione absolvere contendit? Quam clementiam exspectemus ab eo, cujus in consilijs soli regnant impij illi & immanes Busrudes ac Sylvani, nil nisi compendia caedum, flumina sanguinis, interneciones populorum, & imprimis Belgarum, somniantes: quorum facibus funestis incensus rex, quasi una in pyra universam gentem nomenque nostrum concremare ac perdere, quam vel vngue latum de furore precipiti remittere mavult? Quid autem queritis, o miserrimi



## AD BELGAS.

Fortissimi Belgæ, quid non speranda speratis? quid, rebus ipsis contra clamantibus, fictæ clementiæ fallaces umbras persequimini? Aperite saltē oculos auresque, abijcite fascinum. Detrahite personam tyranno, quam jam tandem & ipse post tot iudificationes detractā sibi projecit palam, dum vos apertō Marte idē perdere ac iugulare universos constituit, quod ipsi, ne simul mutuis ictibus vosmetipsos perderetis, & carnificum suorum ensibus iugalaremini, funestissimo bello civili finem tandem imponere non tam ausi voluntario, quam necessario coacti estis. Tanto, videlicet, crimini apud Regem suum Belgis est, quod necessariam pacem bello intestino atque internecino præferentes, vitæ & salutis suæ sine rege consulere, quam immanissimarum ferarum ritu in mutuas cedes ruendo perire, ac iugulari universi sub rege, à rege, & fortē etiam cum rege ipso, maluerint.

Quamobrē ne, quæ ad gloriam Dei, ad salutē nostrā, patriæque universæ incolumitatē pertinent, quæque nostri & juris & muneris sunt, & à fide nostra patria ipsa suppliciter edita voce atque comploratione requirit, ea stultē ab Hispaniis expectemus, ubi nil, nisi cedes & exitia, boletos & aconita odijs plus quam novercalibus parari nobis, heu nimium sanē diu, nimiumque certō (utinam autem minore cum clade nostra) jam ante hac didicimus.

F. iij

Ergo



## ORATIO

Ergo ab ista noverca, cuius ira fervens, odium  
flagrans, grātia fallax, os linguāque mendax est,  
ad clementissimum Principem, optimum indule  
gentissimumque Patrem, solum vere Optimum  
Maximumque Deum spe animisque conversi,  
debitos ei honores dignumque maiestate eius  
cultum exhibētes, consulamus saluti ac paci pu  
blicæ, memores tam vocationis, quam creatio  
nis nostræ.

Quod si a colendo Deo vero ac vi vo universa  
etiam mundi potentia, zelus & furor impius ad  
impios factitiorum deorum atque idolōrum cul  
tus avocare nos velit: terreri nos tamen illo me  
tu quò minus memores beneficiorum Dei & no  
*Matt. 22* stri vicissim officij, plus Deo, quàm hominibus,  
*Lucæ 10* obsequij præstemus, minimè æquum erit. Nam  
cum omne piorum hominum munus decalogo  
comprehensum, in duas sit partes, cœu tabulas,  
distinctum, quarū priore Dei cultus, altera pro  
ximi, id est, hominum cōtinetur: prior cura Deo  
colendo, posterior hominibus, inter quos sunt &  
principes, debetur. Verum tanto hæc interval  
lo post illam, quanto Deus immortalis universa  
mortalium stirpe major præstantiorque est: hoc  
est, quanto divina, sempiterna, immensa atque  
incōprehensa Majestas, misello, caduco exiguo  
que homuncionum numero, pulvere ac putre  
dine terræ excellentior, magnificēior, augustior  
que in operibus manuum suarum conspicitur.

Porro



## AD BELGAS.

Porro huius æterni Principis æternam legem  
cedere placitis edictisque mortalium principū,  
hoc est, miserorum hominucionum commentis,  
indignissimum sanè fuerit. Cum autem æter-  
næ legis Dei præcipuum caput sit cultus ejus,  
merito & suprema lex erit, ad cuius observatio-  
nem nihilominus, & ut verum dicam, teste Scri-  
ptura, magis etiam reges ac principes, quàm sub-  
jecti, sempiterna & indissolubili lege ligati sunt.

Sed enim & Iurisperiti locupletes authores  
sunt, contra naturam rationemque ipsam esse, ut  
legem divinam abrogent edicta placitaque prin-  
cipum: vel, ut rectè illi loquuntur, servus tollat  
legem domini sui. Idem colligunt ex para. tempe-  
stium. l. Ille. à quo. ff. ad Senat. Trebell. legem  
superioris ab inferiore tolli non posse. Quod  
adeo verum esse dicunt, ut ne in parem quidem  
par habeat potestatem, nisi alter alterius jurisdi-  
ctioni sese ultrò subjecerit. Hoc autem de  
Deo, qui solus dat, non accipit imperia, neque  
in hominum concedit jurisdictionem, dici, nisi  
impie, non potest.

Ante omnia ergo venerandus, invocandus ad-  
orandusque est Deus, creator omnium, Rex  
regum, Princeps principum, Dominus dominan-  
tium: qui ut filijs hominum terram attribuit, &  
regna mundi distribuit, ita sibi & coelos in thro-  
num, & terram in scabellum pedum, & omnium  
imperatorum principatū soli reservavit. Maneant

F V

itaque

Psal. 2.

&c.

Glos. in l.

ad hac. C

de usuris

Ibidem.

Psal. 72

& no.



## ORATIO

itaque animis infixa nostris salutare illa ver-  
 que catholice regulæ, quas quæ convellit, catho-  
 lica esse Ecclesia non potest: Deum tuum adora-  
 bis, ei que soli servies. Non habebis Deos alie-  
 nos. Non facies tibi sculptile, neque ullam ima-  
 ginem. Non adorabis eas neque coles. Et hæc:  
 Date quæ sunt Cæsaris, Cæsari: & quæ Dei, Deo.  
 Item: Oportet Deo magis obedire, quàm homi-  
 nibus. Quibus efficitur, neque liberum neque li-  
 citum esse populo Christiano, remittere vel omit-  
 tere Dei sui cultum, aut metu, aut reverentia ho-  
 minum principumve suorum, vel ullius omni-  
 no angeli aut rei creatæ. Et, principibus quidem  
 alacrem promptamque obedientiam, honorem, cen-  
 sum, tributum, vectigal & reliqua id genus deberi:  
 obsequia autem impia, contraria gloriæ Dei, cui pri-  
 ma quæquæ, vel potius, cui omnia debemus, non  
 deberi. Nam cum ad ejus gloriam totum mortaliu ge-  
 nus conditum sit, eo quæ tam principes, quàm subditi fa-  
 cti ac vocati sint: & principes quidem populi non  
 autem populi principum causa instituti divinitus, sa-  
 crilega erit illa vel obediencia vel reverentia, neque  
 minus regibus ac populo perniciofa, quæ ad gratiam  
 obsequiumque mortalis hominis frangat spoliaturque  
 Deum eternum eterno cultu & honore suo. Nam  
 Deus, qui solus imperium tenet eternum & infinitum,  
 tam regum potentiam, quàm populi obedientiam certis  
 legum finibus limitavit: & certam tam illis do-  
 minandi, quàm his parendi metam præfixit: neque, ut  
 gloriæ



## AD BELGAS.

gloria ipsius & publicæ salutis serviant utrique.  
Cum autem hos terminos constituerit utrisque,  
apparet tam obediētia, quam imperij illic fines  
esse oportere, ubi gloria Dei, & populi cōservatio  
vertitur: ultra quos egredi nefas est utrisque.

Vbi ergo princeps muneris sui nominisq; me-  
mor ad honorandum Deum suum impigrè præt  
populo; magna fanè felicitatis reipublicæ pars  
existimāndus; & dilecta Deo procul dubio ea res-  
publica judicāda est, cui tam insigne ac rarum di-  
vinitus contigerit bonum. Talis verò princeps,  
ut pastor populi, patriæ parēs, alumnus Ecclesiæ,  
& verus Dei minister, ac publicæ salutis admini-  
ster, juris legumq; custos, impietatis, tyrānidis  
ac scelerum vindex, omni amore honoreq; di-  
gnus (idque duplici de causa: tum quia princeps  
est, & Dei minister: tum quia pius princeps, &  
gloria Dei & salutis populi sui administer) pia  
haud dubiè promptaq; obediētia ad omnia non  
impia obsequia ministeriaque sequendus erit.

At ubi oblitus officij princeps vel cessat, vel  
etiā a Deo populum abducit, & p Deo idolum,  
pro religione superstitionem tyrannicè obtrudit  
populo; & insuper Ecclesiam Dei vastare, macta-  
re perdereque, quasi immanis draco, publicè con-  
rendit: meminerit quisq; tam tristi tempore Ec-  
clesiæ talem tempestatē, vel ad exercendum ac-  
cendendu nōq; pietatis studium, vel ad plecten-  
dam negligētiam ac frigus odiumque veritatis;  
ab ipso



## ORATIO

ab ipso Deo concitatum esse. Interea cogitet, ad quid potissimum Deo, ad quid item Ecclesiae ac patriae sit obstrictus. Sciat sibi fas non esse, non colore Deum, non profiteri foedus, non adesse atque adherere Ecclesiae omnium matri. Si enim ejusmodi procella, vel ad accendendum studium, vel ad puniendum odium pietatis, commota est, dubium non est, quin saevior etiam tempestas adortura obrutaque fluctibus nos sit, si quid ignaviae ac desidia temporis dederimus: & nisi omni fide ac studio, velis remisque in portum salutis atque gratiae divinae periclitantem Ecclesiam navem impellimus.

Meminerit populus universus, nec liberum, nec integrum tutumque sibi esse, honorem summi Principis sui metu ac reverentia mortalis hominum (quosunque tandem gerat ille titulos) abjicere, vel abjectum non resumere, aut publicam Ecclesiae patriaeque salutem prodere. Meminerint procures ac principes populi, civitates, municipia, universitates, & quotquot ordinem in republica ducunt, ac magistratum gerunt, se quoque gladium publicum non frustra gerere: ut, scilicet, neglectum & projectum Dei sui cultum & interitum populi secure atque ociose despiciant: sed credant & se esse ministros Dei, os & manum regis, duces ac defensores populi, vindices tyrannidis ac seditionum, custodes legum ac disciplinae, qui & ipsi gladium ad defensionem

20m. 13.

3. Pet. 2.

sigida

tionem



## AD BELGAS.

honorem bonorum & vindictam malorum tenent.

Memineritis & vos Præsules, Episcopi, Abbates, & quotquot Ecclesiastici ordinis estis existitis, muneris & titulorum vestrorum, quibus, propter dolor, etiam abusi sumus hactenus, non tamen frustra ab initio insignitos vos esse certissimum est. Cogitate & respicite per omnes amplissimarum dioceseon vestrarum regiones, quid a vestra fide & autoritate expectent tot ecclesiarum curæ vestre commissarum numerosissimi greges, qui pabuli coelestis, cuius jam gustum perceperunt, ardenti desiderio, copiam una voce a vobis supplices exposcunt. Scitote jam hoc ipsum esse tempus, quo, quod multis in regnis ac provincijs paulo antè, hac eadem in causa, in viris Ecclesiasticis extortum est, id nunc bonitate Dei, & pietate ac modestia populi Belgici vos vestri beneficij facere possitis: & quod recusarum alijs dedecoris & excidij causa fuit, idem vobis, amplissimi præsules, prestitum populo labentis & occiduae dignitatis atque incolumitatis vestre confirmationem ac certitudinem vicissim prestare queat. Quod si ergo unquam vera fuisse putatis hierarchiae vestrae axiomata illa, quibus a brachij secularis potestate jurisdictiones vestras spirituales huc usque subduxistis, nunquam certe verius esse poterit (quod tamen verissimum semper fuit eritque, dum erit veritas ipsa) quam hodie inter Belgas illud: Pastoribus & Epi-



# ORATIO

**Mar. 10** & Episcopis Christianis curandum & pascen-  
**et.** dum verbo Dei esse gregem Christi, non solum  
volentibus ac iubentibus, verum etiā (ubi sic Deo  
visum fuerit probare suorum fidem & constantiā)  
invitis ac tumultuantibus inferorum portis.

Quamquam ne illud quidem negligendum  
vobis, o boni, quod sicuti semper frustra, ne di-  
cam scitè, quæsitum est: an fas licitumque sit il-  
lud, quod est necessariū & inviolabile imperiū  
Dei: sic nobis id hodie eò minùs requirendum  
esse, quod ea modò inter nos paciſque ac salutis  
noſtræ hostes jacta sit alea, ut nobis per ipſos  
quidē æquē, ne dicam magis, dare gloriā Deo no-  
ſtro, quā non dare jugulum licitorib. ipſorum, li-  
ceat. Neq; enim credibile est, rebus ipſis recla-  
mantibus, magis religioni, quā vitæ noſtræ in-  
festos esse istos, quibus non minùs tollere nos  
ipſos, quā thesauros noſtros propositū est, quo-  
rum vacuum desertamque poſſeſſionem quò  
minùs jamdiu invaſerint, magis vitam virēſque  
noſtras, quā religionem obſtitisse norunt.

**Prez. 8.** Ad hæc tenendum & illud: Imperia primū  
**l. 1. ff. de** Dei esse, per quem reges regnant, & superbi de  
**constit.** sede deturbantur: deinde & populi, qui publi-  
**princip.** eos fasces & majestatem suam principi, & in prin-  
cipem contulit: idque non solū in maximo illo  
**Fr. Hoto** Romanorū imperio, sed & in alijs bene consti-  
**manni** tutis rebus publicis verū est. Nā immoderatas &  
**Fræcog.** legibus solutas dominationes, ubi principatus  
**Proſſard.** rapti



## AD BELGAS.

capti captique potius, quā dati & accepti fuerūt, *Phil. Ro-*  
 (eiusmodi olim Persica, hodie Turcica imperia *roaldus.*  
 videmus) tandemque in tyrannides apertas eva- *& c.*  
 serunt, non moror. Cū enim, ut jam dictū est,  
 imperiū suū in eos populus contulerit, & ipsi  
 legibus vivant, non propriā, sed publicā pote- *L. digna*  
 statem gerere ipsos: neq; tam dominos populi, *vox. Cdo*  
 quā Dei & reipublice ministros esse manifestū *legibus.*  
 est. Qua de causa & additi summis imperijs sem- *Rom. 15.*  
 per fuere minores magistratus, ac senatus princi-  
 pum, non solum iuvandæ, sed & frenandæ pote-  
 statis (si fortē ad tyrannidē aspiraret) causa, tradi-  
 tāq; non minū imperandi, quā parendi leges.

Certē extra controversiā est, & in imperio Ro- *L. ut in*  
 mano, cuius hodie dignitas apud Germanos est, *troitus.*  
 Cēsare: & in nostra Belgica principē, nō nisi cer-  
 tis conditionibus, legibus, privilegijs, ac principū  
 ordinumq; senatu circumscriptā potestātē te-  
 nere: ut multis testimonijs pactorum & exēplis  
 rerū ostendi potest. Adeoque hic mutua est obli- *De feud.*  
 gatio inter principem & subditos, mutuumque *lib. 2. de*  
 perduellionis (vel, ut leges loquuntur, felonix) *forma fia*  
 crimen: ut non tantū Imperator Imperij, & Rex *del.*  
 regni, primus sit cliens, verumeriā propter deli- *lib. 2. de*  
 cta sua tum Imperatores tum Reges loco mo- *feu, quae*  
 tos, & in ordinē redactos testentur annales. Et si *lit. dom.*  
 autem in principes suos exorbitātes mitius con- *prop. feu*  
 sulverint maiores nostri, jus tamen suū adver- *di. pri. &*  
 sus eos non uno sanē exemplo persequuti sunt. *alibi.*

Quod



## ORATIO

Quod autem ad nostrum modò principem attinet, planè invitus dico, invitus credo, nec lubens audio, quòd jam res ipsa, & tantus in nostrum exitium armorum apparatus, ad perdendum, quicquid superioribus calamitatibus in Belgio adhuc superest, comparatus non tam aditæ voce, quàm rebus, hoc est, ferro & flammis, medio in Belgio grassando, vociferantur. Hæc & credere nos, & audire, & videre & vociferari cogunt vicissim, atque implorare alienam opem adversus proprium non jam principem, sed perniciem ac pestem nostram, quiq; tempore tam tristi nos non solum prodit deditq; hostibus, verum etiã perdit mæstâtque cum hostibus, ceu rabida fera proprium corpus. Sed quid ni tandem, ô Belgæ, talem accipitis leonem, qualem ipse nò solum publicis edictis, sed & rebus tam apertis à vobis æstimari se jubet, remissis ad internecionẽ omnium sævissimis ac perfidissimis latronibus, in quos ob perpetratas hinc cedes & infinita flagitia animadversurum se falsò promiserat. His cum priores lanienæ atque rapinæ nunc sint, ut omnes videris, authoramẽta novæ militiæ, atque exitij totius nominis Belgici, dicendum ne, aut omnino credendum, fieri hæc vel nescio, vel invito rege? Verum nesciat hæc rex, & fiant (si placet) nolente ipso, quæ faciunt adversarij. An vel sic sperare unquam justiorum actionũ ac defensionis nostræ occasionem possu-



## AD BELGAS.

possumus? Defendemus enim tam illius, quam nostram causam in communē hostem Sed videt ille haud dubie probatque, quæ patimur: & interim dum patimur, dum consumimur, dum opem ab ipso frustra imploramus, ipse se, ceu Sardanapalus aut Heliogabalus quispiā, abdens in ultima Hesperia inter scortorum lenonumq; greges, surdas & furiarū sycophantarumq; calumnijs obseptas aures à clamoribus & ejulatibus afflictæ oppresseque reipublicæ avertit, precesque nostras ac libellos supplices Sylvanis carnificibus laniandos, non legendos tradit. Ut verbo dicam, ita jam se nobis patefacit, ut qui hactenus nihil non malè, jam illud unum optimè in Belgas consuluerit, quòd larvam ac personam clementiæ invito à nobis afflictam palam tandem projecerit, cui si vel oculos nostros effossos unà cum opibus ac patrimonio dederimus, quin tamen rebelles & ultima quæque cōmeriti ei videamur, nullo unquam obsequio conseqnemur. Nisi ergo causam ipsi nostram damnamus, quo jure nos in tanta tamque necessaria causa retineri ab eo, tamquam principe, patiemur, cui nulli in re (siquidem salvi esse cupiamus) subditi esse possumus?

Verum illa scrupulosius investigare modò, hujus instituti non est, ubi non de redigendo in ordinem Rege nostro (nisi se ipse in tyrannorum ordinem fatumque præcipitet) quem secundum

G

dum



## ORATIO

dum Deum obsequio colere, non cogere Imperio volumus: sed de non cogendo in ordinem ac pulvinaria deastrorum idolorumque Domino Deo nostro, deque salute, pace atque incolūmitate reipublicæ deliberatur: quæ consultatio sicuti cum Rege præsentē rectē atque ordine, sic sine eo, vel absente, vel ægrotante, vel alienæ tyrannidi subiecto, piē ac necessariō suscipietur.

Valeant ergo insipida putidaque quorundam malē feriatorum deliria, qui ita infinitē unius domīnatui immodico subiectum universum Belgicæ reipublicæ corpus imaginantur, ut nihil valeant leges & pacta conventa juratæque: ut omne discrimen singulorum atque universorum, cædonum & procerum, idiotarum & principum, plebis & populi, prorsus confundatur. Faceessant atque evanescant vanissima, ignavissima, ingrata in Deum, inimica patriæ ac salutē publicę somnia delicatōrum istorum ollæ & aulæ, ventris atque inguinis mancipiorum, qui invitīs legibus & ratione, omnia liberrimi populi iura, & commoda fisco, vel potius, delicijs mensisque principis: hoc est, libidinibus ac voluptatibus suis, ita mancipant, ut ne in summo quidem patrię ac religionis discrimine idē populo universo ad avertendam publicā perniciem concedant, quod etiā seivis in dominos leges permittūt: & juxta proverbium, misceri incendio terram, fractumque illabi orbē totius mundi, quā de voluptati-



## AD BELGAS.

ptatibus, delicijs ac libidinibus suis vel tantillum decideri malint. Nou enim hic privatam rem agimus, in qua sanè singuli à magistratu affecti injuria, vel tractati inclementer, pia patientia possidebimus animas nostras, neq; ordinē politicū turbabimus: sed de colendo Deo summo Principe, & restringendo publico patrię totius incendio, avertendaque à nostris cervicibus ira Dei in commune consultamus, cui tam necessaria consultationi preponi dominatum injustum unius vel paucorum hominum indignissimum profectò ac miserrimum fuerit.

Iam si ne ipsi quidem aulicarum deliciarum patroni æquum, aut omninò ferendum esse putabunt, ut dignitatem & jura sui principis, libidini præfecti cujuspiā in fraudem principis condonent subditi, quantò iniquius indigniusque fuerit, nos tanti Monarchę majestatem, cui adorandę peræquę princeps ipse ac populus devinctus est, libidini, sævitie, vel inscitie hominis, quamvis eximij, gratificari?

Adde, quòd omnia ad remorandam piam hanc curam obstacula, si rectè examinentur, nō tam Regis nostri justa liberaque autoritate, quàm Hispanorum & totius novitijs ac inquisitorij Hispanicique sacerdotij (quorum superstitioni præstigijsque ac tyrannidi devotus & planè mancipatus Rex vel fascinatut, vel obtorto collo abripitur in istorū laqueos) commentis,

G ij

fraudi-



## ORATIO

fraudibus, calumnijs, consilijsque funestis hue-  
 ulque nituntur. Atqui horum injusta, impia, ex-  
 lex atque usurpata tyrannis nihilo magis ju-  
 stiúsque nos astringit ad eam, quæ legitimo ma-  
 gistratui debetur, obedientiam, quam vicinos no-  
 stros, Helvetios, Svecos, Danos ac Britannos,  
 qui nō sine summa & Dei & sua laude à super-  
 bo & orbi Christiano exitiali, & polthiac intole-  
 rabili iugo papatus in pristinam libertatem Ec-  
 clesias suas asseruerunt. Hispanorum autem ut  
 injustam violentamque dominationē ac vexa-  
 tionem divinis auxilijs jure tandem excussimus,  
 sic impium & inimicum assensum stultè requi-  
 remus: quippe quos omnis pietatis expertes, re-  
 ligionis inanes, juris legumque nostrarum vio-  
 latores superbissimos, & pudoris omnis ac sen-  
 sus humani oblitos expilare scrinia nostra, fe-  
 rirē jugulos, violare virgines & conjuges, quàm  
 repurgare templa, conservare patriam, & vindi-  
 care pudicitiam virginum, juvenum ac matro-  
 narum nostrarum malle certum est.

Proinde iusta hæc religionis cura erit, quia pia:  
 licita, quia necessaria. Pia verò & simul necessa-  
 ria nemini non pio videbitur, quæ pro gloria  
 Dei nostri, & salutē charissimæ patriæ jussu Im-  
 perioque ejusdem Dei, propē edita voce ac plo-  
 ratu periclitantis patriæ & Ecclesiæ nobis publi-  
 cè injungitur. Harum autem miserari calamita-  
 tem, & illius venerari majestatem, atque ad præ-  
 scriptum



## AD BELGAS.

Scriptum verbi cœlestis salutis paciꝑue publicæ  
consulere, cum qua nostra omnium, atque aded  
(si sciret) ipsius Regis salus ac dignitas verè cō-  
iuncta est, id non ledere, sed servare: non mi-  
nuere, sed augustam reddere: non violare, sed  
vindicare est publicæ potestatis maiestatem.

Omissis ergo stultis quæstionibus, sequamur  
vocem & insignia ejus, cujus consilia repudiare,  
& imperio morem non gerere, verè maiestatem  
est ledere, certumque rebellionis crimen admit-  
tere: qui ut contemptum sui gravissimè ulcisci,  
sic & cultum & obedientiam mille in genera-  
tiones gratia sua prosequi se velle affirmat.

Quod quò melius majorèque cum fructu facere  
ac perficere possimus, ne consilium capiamus  
cum carne, nec etiam cum spiritibus impostori-  
bus seductoribus atq; immundis, qui quicquid  
simulent ac dissimulent, dicunt tamen in corde  
suo: Non est Deus. Audiamus autem illum, cu-  
jus tuta salubriaque magis sunt, quàm mollia  
blandaque prima fronte consilia. Dedamus nos  
illi totos, & citra hēsitationem soli serviamus ei,  
qui ad adorandum se solum omnes vocat.

Neque reformidemus eventum, quasi ad tu-  
tandos cultores suos aut in dextera Dei robur  
non sit, aut in providentia consilium, aut in vo-  
luntate benevolentia. Qui si stabit à nobis, (sta-  
bit autem, si filium ipsius Iesum Christum Re-  
gem nostrum verè serenissimum osculabimur,

G iij

eiꝑue

*Deut. 28*

*Exo. 20*

*Galat. 2.*

*Psalm. 14.*

*Luca 9.*

*Rom. 8.*

*Psalm. 2*



# ORATIO

Deut. II.  
28.

eiſque bona fide ſerviemus) quas aut mundi vi-  
res, aut artes Antichriſti nobis extimeſcendas pu-  
ramus? Nam ad Hiſpanos quod attinet (qui,  
quod hoſpitiſ quoque teſſerā apud ſuos hīc pri-  
dem fregerunt, perquā paucis non exſecrabi-  
les ſunt, hodie, opinor) eos, quomodo noſiſſi,  
irato nobis Deo, ignavia noſtra haecenus in no-  
ſtra viſcera feroces porius, quā fortes, fecerimus:  
utpote gentē in ſubjectos, inermes jacētēſq; ma-  
gis ſēvam atq; terribilē, quā fortē ac ſtrennuā  
adverſus ſtantes, armatos ac repugnātes, cū varia  
fortuna noſtra tū Hollandia Zelandiaque, & præ-  
ceteris Harlemiani, Alcmariani Leidaniq; muri  
fortius ſanē deſenſi, quā oppugnati, teſtabuntur.

Et nos, ſi poſthac dicto audientes fuerimus  
Deo, cuius potenti dextera tam gravi modò ju-  
go levati ſumus, ejuſque ductum ſequentes vi-  
ros nos in bona cauſa præſtiterimus, intelli-  
gemus, non tam fortitudine iſtorum, quā igna-  
via ac timiditate noſtra nos ad hunc uſque diem  
ſuccubuiſſe. Videbimus ſæviorem, quā ſa-  
niores, majoribus odijs, quā viribus, hunc ho-  
ſtem bella gerere. Sentiemus, & ſentient iſſi:  
ſentiet & orbis Chriſtianus id, quod res eſt, nos  
haecenus non iſtorum virtute, non armis ac vi-  
ribus Hiſpanicis ſed manu ultrice, & iudicio di-  
vino aſſictos eſſe: eamque ad rem iſtos nil niſi  
virgā furoris zeliq; divini fuiſſe, ad puniendā  
rebellionem noſtram contra Deum noſtrum,

non

Eſa. IO.  
Ec.



## AD BELGAS.

non contra istos atheos, quibus nullo parendi jure unquam obnoxij fuimus, commissam.

Denique sentient ipsi, adjuvante Deo, & agnoscere cogentur Hispani (quandoquidem jam iterum in nos majore, quàm unquã, aviditate sanguinis & prædæ Belgicæ præcipites, & stimulatî cum suis tum Romani Pontificis Erynnibus denudò terribili cum apparatu, ad violandam religionem, vel potius ad diripiendas fortunas nostras, ad stuprandas virgines, cædesque faciendas, cæca rabie furorêque in nos involârunt) Belgis ut ante hunc diem consilium auxiliumque divinum defuerit, non defuturum posthac: sed revicturam, propicio Deo, & jam quodammodo revixisse ac reviguisse quoque veterem illam & antiquis etiam monumentis celebratâ fortitudinẽ bellicã. Atq; hoc minùs abfuturâ reconciliatî opem, manumque adjutricẽ Dei, Domini armorũ omniũ, quòd jam seriò puniendis illis, qui adversus Christũ nimium diu atq; insolenter erexere trophæa, & baculo suo ac fortitudini sacrificavêre, sese divina comparavit ira. Unum illud etiã atq; etiã cavendũ accinctis, ne, quorũ arma virẽsque possumus non metuere, in eorũ fraudes infidiasque incauti incurramus.

Has autem quò tutius ac felicius evitare possumus, resumendã nobis atque imitandã imprimis majorum nostrorum virtutẽ judico, neque detrectanda ipsis militiæ munera, nec refugiẽda

G iij

pericula



## ORATIO

pericula pro Christo & patria: neque porro committendam peregrino ac mercenario militi salutem patriæ. Etsi enim meritò gratias agere immortales debemus illustrissimis principibus, quorum fida & necessaria ope tempore nostro tam necessario promptissimè adjuvamus, tamen hoc magis nobis pro nostris focis & aris, pro liberis & conjugibus, pro rectoris ac solo patriæ alacriter promteque dimicandū erit, quò plus à nostra fide requirit propria patria, quàm à peregrinorū auxilijs aliena. Multiplex enim experientia tam nos, quàm vicinos nostros Gallos penè omnibus in conflictibus edocuit (quod contemnendum sanè non existimo) nos, sicuti de hostium nostrorum perfidia dubitare amplius non possumus, ita vicissim de fide eorum, quos non tam publicū periculum, quàm prædæ ac stipendiorum spes (de mercenarijs ipsis, non ducibus loquor) concivit, quod certò nobis polliceamur, non habere. At quorum periculum resque ipsa agitur, quibúsque non de stipendijs, sed de vita ipsa fortunisque simul periclitandum est, hos timidos ignavosque esse necessitas & pericula nō patiuntur. Proinde & nos, o generosissimi Belgæ, excitemus in nobismetipsis virtutem ac fortitudinem majorum nostrorū: & quando omnino non absque Theseo (quod dicitur) periclitandum, periculorum magnitudo suadere nobis videtur: saltem cum Theseo pugnare pro gloria Dei



## AD BELGAS.

Dei & salute patriæ ne detrectemus. Maxime autem timendum, ne per speciem fictæ reconciliationis perniciofa credulitate notissimas nocentissimasque vyperas, aut illarum loco, quod perinde est, devota illis & mercenaria mancipia iterum gremio excipiamus. Quod sane non monerem, (quia, si Deum audiemus, non erit metuendum) nisi me moverent perditorum quorundâ & impiorum civium, tam patriæ quàm Dei hostium pestiumque, quotidiani neque occulti conatus: qui cum se neque cum Hispanis commodè satis, neque sine illis lautè vivere posse credant, piscari in turbida, servire impuris hostibus cum patriâ, superesse rogo ruineque totius reipublice ac famæ suæ, quàm adesse patriæ, servire Deo, & cum republica (ne videlicet proditoris merita pridem præmia ferant, quæ tamen potentibus rerum Hispanis dominis suis, nequaquâ poterunt evitare) sibi quoque consulere malunt.

Vtinam autem hanc nobis mentem hosque animos det Dominus, ut eorum consilia, qui hispanisant (quæ certè non sunt obscura) mature provisâ mascule dissipemus: & à fœderibus in quibus fœderibus Hispanicis (si quæ tamen salvis rebus fieri possunt) caveamus: magisque gloriæ Dei, saluti quietique publicæ studeamus, quàm fallaci, brevi, proque libidine illorum mox rumpendæ umbræ pacis, ad quam eludendam notum in nos odium ac perfidia, primam quam-

G v

que oc-



## ORATIO

que occasionem dubio procul arreptura est.

Novimus enim, atque, heu, nimium novimus, ingenium gentis crudele & sanguinarium. Novimus & studia barbaricæ ultimæque perfidiæ, non solum libris, sed & rebus crudeliter impieq; gestis tam hîc, quam ubique terrarum expressis. Non est fides, inquiunt, servanda Turcis, minùs hereticis, omnium verò minimè subditis perduellibus: Non est princeps alligatus fœderi nec iurijurando eum armatis subditis factò. Oportet principem aliquando esse virum non bonum. Ecce digna utraque Hesperia hodie axiomata. En vaticinia non Delphicæ, sed Hibericæ tripodis, & cruenta non Apollinis, sed Apollyontis oracula. Cùm autem nos omnes uno rebellium & hæreticorum loco reputemur Hispanis, quòd non statim iussas securi cervices dedimus, nemo non animadvertit, opinor, quàm fidam certamque cum istis pacem simus habituri, quorù ambiriosa & sæva consilia jam quadraginta plus minùs annis eò spectarunt omnia, ut redactò in novi regni formam toto Belgio, ad perfectam obedientiam (ut quidè loquebantur) nos adigerent: hoc est, ut ruptis omnibus legum jurisque vinculis, mancipare libidini, avaritiæ, crudelitatiq; suæ nos nostraque omnia possent. Huc nimium semper retenderunt cùm omnes infracti juris abolitarumque legum nostrarù artes machinæque, tum & mutatorum subinde rectorum

rum



## AD BELGAS.

nostrorum consilium: cum ad implendum tanti coepti votum desideriumque calidissimum, propter obstacula legum & jurum nostrorum, vix quisquam satis idoneus inveniretur. Itaque primum alienigenis, tum etiam mulierculis commissa nostri cura fuit. Credo, ut earum imperiis effeminata in nobis fractaque virtute avorum nostrorum, nullis bellis, aut magnis rebus gerendis adhiberi, sed tantum negotiationibus nostris dediti, & modò non cauponantes cum Lydis, postea à Saturninis illis Albanis ac Requiæis leonibus, quorum ungues postea (sed non nisi devorato prius hamo) sensimus, tractari, mactari ac jugulari facilius possemus. Mulierum ultimam Parmanam habuimus dominam, perutilem quidem illam Hispanorum desiderijs, & innutritam disciplinæ soceri sui, & Machiavelli magistri: sed ad perdomandos Belgas, ad sustinendum bellum, & maxime ad eam, quæ parabatur, lanienam minus masculam, quam quæ tantis sanguinis fluminibus fundendis suffectura videretur.

Huic ergo submissus est, melior pejerandi trucidandi que artifex, & sanguine Germanico Neapolitanoque adhuc rubens madensque, ac libidine perjurijsque delibutus Albanus, cujus, ut reliqua taceam, editam nuper apud nos ab immitissimo immanissimoque parricida (horrendum nefas) nobilium procerumque, & imprimis illustrium duorum principum Hornani & Egmon-



## ORATIO

Remondani injustissimam, immanissimam, tristissimam, & ab ipsis etiam Hispanis, scvissima aliique gente, defletam laqueam, incredibili ausu, detestabili perfidia calcatis & protritit legibus iureque gentium, ad ignominiam ludibriumque sempiternum victæ ac triumphatæ Belgicæ Germanicæque nobilitatis perpetrata, quis nostrum non meminit? Cujus aures re tam recenti non calent? Cujus adhuc sicci lachrymis sunt oculi? Sed & ille, rebus aliter, ac speraverat, cadentibus, cum scvioribus, quam sanioribus, consilijs non satis artificiosè epitalin urgeret ad peragendam cruentam hanc fabulam tandem inutilis est visus.

Remoto itaque Albano, vel potius Hibera in tarta a remisso, suffectus est Requisiteus, qui quod Mauros feliciter fefellerat ac straverat, Belgis quoque perdendis idoneus est visus, religioso ille quidem habitu, sed tamè Saturni & ipse proles (quippe quem & natura & mores sui, & fors. mors denique ipsa, totum atrum pinxerant) & cuius impressa Hispanijs inaudita in Mauros, & simul in suos duces fraudis perfidiæ & crudelitatis vestigia documento sunt nobis, qua fide nobiscum acturus, quas calamitates daturus, quasque editurus strages fuerit, si vacuum sine pulvere ac vulnere stationem invenisset. At istum, quod minus meditatam catastrophem conceptæ animo tragœdiæ feliciter imponderet, cum fama ipsa,



## AD BELGAS.

psa, quæ ex Hispanijs præcurrentis venturi leonis  
ungues Belgis præmonstraverat, tum & aliæ dis-  
ficultates diuturni magisque ardui, quàm putârat,  
belli, tandemque & mors improvisa, quæ incau-  
tum, & Belgarum cedes magis, quàm proprium  
fatum, meditantem in ipso actu hominem in-  
tercepit, inhibuerunt.

Tandem ergo & hic Austriacus est missus, si-  
mulandi, dissimulandi jugulandi que artibus pal-  
mam superioribus erepturus: & si minus vi aper-  
ta, saltem vel inani pompa nominis Austriaci ac  
titulo regiæ fraternitatis, vel etiam terrore belli-  
cæ virtutis, atque ostentatione trophæi Turcici,  
vel tandem fictæ cujusdam humanitatis illece-  
bra lenocinioque in antiqua, & jam Dei bene-  
ficio totiens vitata retia fascinosos Belgas, ceu  
stultas aves, incautos pelliceret simul & percuter-  
et. Qui hoc voto potitus, & victis, prostratis,  
afflictis triumphatisque reliquis provinciis cla-  
rus, ipsum deinceps cum socijs Hollandis Zelan-  
disque Aurantium principem (hunc namque ut  
unicum fidissimum fortissimumque assertæ pa-  
triæ Camillum, & repressæ barbaricæ violentiæ  
sævæque tyrannidis Hispanorum, Cacorum, Ly-  
corum aliorumque monstrorum domitorem &  
Herculem invictissimum felicissimumque pes-  
simè odit) ab alijs desertos vel virib. opprimeret,  
vel fœdere captioso illaquearet. Huc autem re-  
tendisse & quasi collimasse omnia hominis con-  
silia



## ORATIO

filia & actiones fatebitur, quisquis vel non stultè ad fatalem hamum devorandum ducitur volens vidensque, vel ex occasu ac ruina proditæ patriæ miserimum à tyrannis lucellum favoremque non piscabitur in turbida. Quid enim non fecit? Quid non simulavit ac dissimulavit? Quem non in Protea vel Chameleonta se vertit, postquam primum pedem in Belgio posuit? Et denique, ubi elusas vidit artes vitatorumque laqueos suos, quos non fluctus concitavit? quem non movit Acheronta, ut & vortorum suorum & pollicitorum, tam exercitui suo, quam Regi quoque ipsi factorum compos totum Belgium indigenarum sanguine maceratum, & habitatoribus nudatum, in prædam latronibus suis divideret? Itaque non injuria nuper quidam ex ista latronum superba atque impia manat per ludibrium jactasse dicitur, ludos tantum fecisse Albanum & reliquos hactenus. Vnum Austriacum aliorum ludis & fabellis adeò cruentam catastrophem impositurum, cui diluendæ vix omnia Belgij flumina & maria sint suffectura.

Fruantur ergo hoc Iano bifronte, bipatre, bilingui, & fidei animique, cum erga omnes Belgas ac Deum ipsum, ancipitis, tum unum mysticum illum parentem suum bona fide referentis, catulo Apollyontis, qui volent: fruatur & ipse quibus volet, mercenariis, mendacibus, venalibus canibus & corvis, sophistis & lanistis, veris  
parasi-



## AD BELGAS.

parasitis, trapezitis ac muribus palatinis, & non uno culeo & equuleo dignis amicorum, ptopin-  
quorum, liberorum, conjugum, parentum & pa-  
triæ denique ac Dei ipsius patrij (quantum in i-  
pſis eſt) proditoribus, qui verarum laudum ino-  
pia, fictis malèque conſiſitis encomijs ſuum  
illum verè illaudatum laudent Buſiridem. At  
nos, ſi ſapimus, ſi prode dederèque nos ipſos,  
unà cum patriâ, crudeliſſimis hoſtibus noſtris  
atque impijs perduellibus patriæ, unòque in ro-  
go univerſi conſagrarè nolumus: ſi denique, à  
quibus in Belgium, cum quibus, contra quos, ad  
quid, & quorum in locum novus hic Tryphon  
atque Olofernes ſit miſſus: & quid modò, quan-  
tis cum dolis, calumnijs, apparatibus in perni-  
ciem ruinàmque Belgij ac Germaniæ moliatur,  
vel aſpicere ſaltem volumus (ut taceam inte-  
rim, quomodo efferato huic rabidòque leoni ac  
belluæ fræna modò laxârît, & ſtimulos ſimul ad-  
diderit fatalis ille orbi Chriſtiano Romuleus  
draco, cujus nutum numénque ad cædes ac ſce-  
lera proclamantis ſolùm obſervant iſti, polli-  
cens Hiſpanis & hiſpaniſantibus omnibus, ſi ad  
caſtra iſtius, hoc eſt, ad prædas ac ſtrages noſtras  
impigrè accurrant, præter alia omnium quoque  
ſcelerũ veniam) vel his ex vnguibus, juxta pro-  
verbium, cognoscere leonem, & ſimul feliciſ, ſci-  
licet, gubernationis Auſtriacæ ductuſque ſpeci-  
men prævidere poſſumus.

Nul-



## ORATIO

Nullis ergo fucis verborum opus est, nihilq̃  
dicendū jā amplius causę, quo minūs nobis, hoc  
rectore summissō, non tam remissum aut miti-  
gatum supplicium, quā mutatum atque exa-  
speratum carnificem sicuti (heu dolor ac dede-  
cus nostrum) nimium haud dubie serō, ita ta-  
men aliquando apertius, quā optaremus cla-  
roque in meridie videre, vel inviti, cogamur.  
Utinam autem aversum à nobis in ipsos tanta-  
rum fraudum scelerumque confarcinatores ab-  
ominandū omni periculumque convertat pro-  
pitius providusque patronus populi sui Deus  
Opt. Max. Etenim potest ille, si volet: & vo-  
let procul dubio, aderitque in tempore causę suę  
suisque laboratibus, si per contumaciam nostrā  
poterit: hoc est, si nos & servire ipsi, & servari  
ab ipso volumus, & opem armaque ab ipso da-  
ta ad ipsius potius gloriam patrięque salutem;  
quā in leges nutumq̃ communium hostium  
deponemus.

Ad hęc autē vetera atque inveterata Hispa-  
nis odia gentis nominisque nostri accedit illud,  
quod jam irritatos mora belloque diuturno,  
tamque ipsis molesto, quā utrisque nostrum  
funesto, atque insuper inexpectata, neque ma-  
gis decora nobis (mactandi enim fuerāt, qui ma-  
ctaverant, ne juxta suam ipsorum parcemiā mor-  
dere mortui potuissent) quā ipsis laudabili mis-  
sione, multo, quā unquam, sēviores habituri  
sumus:



## AD BELGAS.

sumus: multò quoque magis foedera, quàm arma  
eorum metuenda sunt. Cum enim & fames &  
sitis & mora tam diu expectata, tandemque &  
erepta latienae ac praeda compendiariae totius  
Belgicae (Antverpianam enim quamlibet im-  
manem pro nulla ducunt) bilem haud dubie  
plurimam in nares conciverint istis, videndum,  
quo pacto, & an ullo omninò pacto tam im-  
mites feras, tam famelicos sitibundòsque urfos  
ac pantheras denuò admiittendos putemus.

Postremò, quòd omnè nobis oscitantiam so-  
minumq; excutere debet (nisi ruinae ac panole-  
thiae patriae indormiendo videntes & oscitantes  
opprimi volumus ad unum, cuius libet loci, ordi-  
nis, professionis & conditionis omnes) ipsorum  
nos Hispanorum & proditorum nostrorum perni-  
ciosissimis consilijs referta litera, jam saepius &  
pridem Dei beneficio intercepta, quid de vobis  
universis statuerint, universam fraudum scele-  
rumque inmanissimorum rationem & conju-  
rationem edocuerunt.

Sed quid literas Hispanorum interceptas di-  
co? Iam enim palam libellis editis & armis co-  
pijsque comparatis personam larvamque exuit  
belliq; diu dissimulati signum publice proposuit  
Austriacus. Quinimò & ipse, ipse, inquam, San-  
ctissimus Pontifex non jam clandestinis literis,  
sed apertis, & quidem per totum orbem Chri-  
stianum publicatis diplomatis in pradam nos  
exponit

H

exponit



## ORATIO

exponit vulturibus suis, & belli contra nos internecini signum effert manifestum, concitatis iterum sonoro classico omnibus mancipiis, fugitivis, pestibus, harpyis ac monstribus Averni. Et quia omnium rapacitati non suffecturas facultates vestras providet oculatissimus Argus, ad pristinas jamque beneficio Dei prope modum obsoletas opes suas sese convertit, & divites Pontificalis opulentiæ thesauros, largosque indulgentiarum sinus in sacrum autolycorum & latronum suorum exercitum liberalissimè pandit effunditque.

Quodque observatione dignum est, & cum omnibus nobis, tum maxime Ecclesiastico ordini seriò perpendendum, omnes in universum Belgæ promiscuè, cujuslibet professionis atque ordinis, palàm proscribimur, & immanibus infestissimarum ferarum rictibus objicimur, dum tanta cura atque impendio ad Ioannis Austriaci signa exitium præsens universo Belgio minitantiæ milites suos effundendo sanguini nostro consecratos proficisci iubet Pontifex. Et qui hæctenus omnibus in turbis bellisque civilibus mira arte ac mille cuniculis (præsertim in Germania Galliaque) Ecclesiasticum ordinem à reliquo ordinum corpore divellere semper est solitus, is modò nos universos simul adoriri tanta cum fiducia successus constituit, ut non tantum non parcere vobis Ecclesiasticis, verum ne fallere



## AD BELGAS.

fallere quidem vos velit amplius. Tanta; nimirum, sunt, tamque implacabiles sacrati peccatoris iræ: Tantus simul contemtus virtutis ac nominis Belgici. Tanta, cum in omnes Belgas, tum verò in vos præcipuè Præsules, à quibus te jam non solum deceptum, sed & delusum contemtumque indignatur, insania & rabies, ut ne dissimulandum quidem amplius more solito putet, quin universos aperto Marte citraque dolum malum, cuius consilia non ratio repudiat, sed præcipitat furor, invadere decreverit.

Nam unde alioquin huic effæto leoni, vel potius exoculato Cyclopi nova hæc atque, tam ipsi, quam omnibus Pontificibus inusitata generositas, nisi quod jam exhaustam Germanicis, Anglicis Gallicis, Belgicisque bellis ac tumultibus ipsam omnium insidiarum fraudumque nimis notam jam omnibus perdidit, desperatio ipsa dolorque erepti Belgii, hoc est, unici sui per Germaniam luminis, in ipsos Belgas solo indulgentiarum flatu crepitantem, id est, vanam omnino sine veris armis, consilijs, animis ac viribus iram cæca ac furiosa manu projicit potius, quam coniecit. Neque enim credibile est, hominem repente factum terribilissimum ac tortuosissimum hoc monstrum, cuius exitialibus facibus & flammis tot jam annos turbatur, permiscetur & ardet orbis Christianus, deflagrat planèque consumitur Gallia & Belgium: ut reliqua regna omittā.

H ij

Cujus



# ORATIO

Cujus perniciosissimis consilijs fraudibusq; per  
infinitas cædes ac strages, prædas & libidines,  
cum alijs in locis, tum nostro in Belgio & Gal-  
lia vicina per multos jam annos exercitis cede-  
re coguntur omnes & veterum & recentium  
historiarum ac tragœdiarû Ochi, Bursides, Ne-  
rones, Atrei, Bajazerthes ac Selyni parricide ac-  
que tyranni.

Furor ergo hæc arma non ratio, desperatio  
non virtus in vos maximè, Præsules, extorquet  
Pontifici, nõ ideo tantum, quòd nec amicis qui-  
dem parcitum velit, dum una pereant & inimi-  
ci: sed maximè, quia (quòd semper tam Romæ,  
quàm in Hispanijs jactatum fuit): Omnes Bel-  
gas hæreticos & Lutheranos esse citra ullam ex-  
ceptione loci atq; ordinis cõstet, quandiu, quod  
in miseros Hispanos potest solus Pontifex cum  
suis, non idem etiam in Belgas simul & Ponti-  
fex & Hispani inquisitores possint. Ad quem co-  
natum suum omni ope juvandum, quanto vos  
magis, quàm reliquos Belgas, sibi devinctos cre-  
didit, tantò nunc, delusus ac spe sua dejectus, vos  
odit ardentius infensusque.

Vt ergo mirum non est, amplissimi Præsules,  
vos omnes omnibus hodie, non modò Belgis,  
sed & canibus pesus & anguib; exosos esse Pon-  
tifici: ita magnoperè profectò mirum, absurdū  
& incredibile dictu est, quisnam nos miserabi-  
lis Eros, quæve feralis Cupido in istius inamabi-  
lis,



## AD BELGAS.

lis Acherontij ac Scygi Charontis amorem fascinaverit ac dementaverit. Quid juvat, o boni, vel cum injuria vestra ac publica, emendicare favorem saevissimi Cyclopi, & placare frustra Romuleum illum Gigantem implacabilem, cui calcanti leges & religionem, oppugnantem coelum ac terram, nulla alia lege, nullo omnium superstitionum cediumque obsequio placere poteritis, nisi protrititis & ipsi legibus omnibus proscripta & numinis ipsius reverentia ac sensu, prodita deditaque in miseram servitutem & horrendam lanienam patria, tandem & vos ipsos vinciendos, vexandos, mactandos jugulandosque in sacrificium manibus faucibusque crudivori & anthropophagi istius Cacolyci ultro objiciatis? Neque enim ulla quamlibet immani hostia, nisi eade promiscua atque internecone universi Belgij furiali huic Gregorio, nec alijs, quam funestarum nuptiarum cediumque humani generis curis tot jam annos invigilanti, litari posse certissimum est, quippe cui nullus, nisi universo Christi grege jugulato ac perdito, somnus jucundus gratisque rigentia scelerum cediumque pervigilijs lumina in quiete componere potest. Et quoniam pridem cognovimus, quo loco simus omnes Pontifici, qui internecone nostra colophonem imponere occiduo pontificatui, & parentare immanibus manibus suis gestit: quo item Hispanis & maxime Albano lictori, &

H iij

hujus



## ORATIO

huius fœviffimi Busiridis quondam carnifici, qui nemine Belgarū crimine majestatis eximi posse dictitabat, fallitur quisquis vel addi quicquā peccatis suis, vel placari sibi Pōtificē posse existimat. Satis enim vel eo solo peccavimus, Belgæ, quod vivimus, & vivēdo morā bilem q̃ effœto ac moribundo leoni, cui ipsi jam anni morsq̃ propinqua morositatē addunt, commovemus: quod vastantē, perdentē, mactantē, omniāq̃ bellis ac seditionibus turbantē minūs, quā ipse vellet, impigre omni ope adjuvimus, nec ad extremum post omnia obsequia jugulum porreximus ipsi.

Non est igitur, quod in promovēda gloria Dei & procuranda salute publica ideò quisquā nostrū, cuius libet loci atque ordinis, vel fathiscat, vel remissius agat, quod secum mitius actū iri Pontifice & carnificibus istis rerum potenti- bus, ob hanc patriæ & bonæ causæ vel proditio- nem vel desertionem existimet: quoniam uno prorsus loco utrisque reputamur Achiui. Nam non esse nos hereticos, non esse rebelles, non esse Verpis, Turcis, Tartaris ac Saracenis magis con- sceleratos & impios, quotquot arcas & scrinia, uxores & filias filiosq̃, sensus atq̃ animos homi- nū habemus, Belgæ, nunquā psuadebimus illis, ne si persuaferimus quidē. Iam enim tollere nos ē numero viventū, infrāq̃ mortuos, si queāt, de- mādare statuerunt: ut fraudi sit nobis, non q̃ in Deū credidimus, aut quod Regē offendimus, ut  
ajunt,



## AD BELGAS.

esunt, (neutrū enim istorū fecimus: & neutrū curat impia & perfida, nec min⁹ in Regis, quā nostrū sanguinē crudelis theomachia) sed q̄ vivimus: q̄ suæ inexplebili crudelitati superstitē adhuc sanguinis guttā retinemus: q̄ salutē nostrā, post infinitas cædes, libidines, extorsiones, vexationes, tandē læsa fractaq; tot cōtumelijs patientia nostra, defendere conatī sumus, quodq; ipsis cū ingenti atq; insolenti insultatione omnia nostra tam corpora quā fortunas atq; ornamenta donatione Regis suam esse prædam ac stipendia emeritę militiæ præmiaque virtutum affirmantibus, & proinde jugulū simul cum patrimonio porrigere iubentibus, amplius non credidimus.

Hæc autem sunt, Belgæ, (mihi credite) atrocissima, scilicet, ac ter quaterque maxima illa crimina vestra, Priami cur evertere gentem immeritam visum Hiberis nostris: non seditionis, minus rebellionis, atque omnium minimè religionis offensæ. Quid enim ista Venus ebria curat? Inguinis & capitis quæ sint discrimina, nescit.

Quare cum nemini dubiū aut ignotū esse possit, nisi qui & Dei & patrię & Regis & suæ ipsius animæ hostis esse velit, quam pacis fœderumque religionē ab hoc hominū genere expectare debeamus, quibus hoc ipsum, quod vivimus, adeo grave molestumq; est, ut omnē religionis fœderumq; mentionē, quasi remorā avaritię crudelitatisque suę, extremè oderint: jamjam tēpus est,

Hic

atque



## ORATIO

atque ipsa necessitas huc nos adigit, ut positis domi sepultisque omnibus odijs ac similitudinibus. (si quæ adhuc supersunt) intestinis, collatisque in publicam curam studijs, viribus & consilijs sedulo procuremus ea, quæ veræ pacis nostræ sunt. Dico, veram cum Deo vero veracique pacem queramus, cuius fides, veritas, clementia, & benevolentia erga homines poenitentiam agentes, & qui foedus pacemque ipsius eternam vera fide atque observantia amplectuntur, durat in omnem æternitatem.

Vt ergo & hos, & quos libet alios adversarios submovere, & res nostras tuto posthac loco collocare possimus, sequamur consilia, fidem & signa Dei, magni Imperatoris & Servatoris nostri: & tanti Ducis fiducia subnixi confidentesque, ne formidemus, quicquid tandem, fremendo conjurandoque in Dominum exercituum, atque Christum ejus, valeant vires hominum: qui quantumlibet robusti ac formidabiles appareant, *Psal. 2.* coram Deo certè, ut vasa testacea fragiles, ut vermes & putredo terre imbecilles, ut paleæ ac stipulæ coram vento leves: denique, ut fumus in turbine ac cæra ad ignem, fugaces dissipabuntur, *Psal. 68.* colliquescent, consumuntur & conflagrabunt omnes ira Dei prodeuntis in aciem.

Nam, qui Moysen & Aaronem contra Pharaonis potentiam tutatus est, qui populum suum Israëliticum, nequicquam indignantibus & ingenti



## AD BELGAS.

genti cum exercitu persequentibus Ægyptijs, ex Ægypto forti manu eduxit, qui eosdem Ægyptios unà cum eorum rege Pharaone in mare rubrum merfit ac delevit: qui eundem populum, quàm diu dicto audiens in fide ac fœdere mansit, per loca deserta & sterilia in terram Chananaam deductum inter tot inimicas prævalidasque gentes per tot annorũ secula incolumẽ præstitit: qui optimum regem Ezechiam ob restitutum divinum cultum eversamque idololatriam ab Assyrijs oppugnatum insigni victoria donavit, & Matathiam, Iudam, Simonem, Ionathanem adversus Antiochi aliorumque violentiam egregiè defendit: ille nec nobis, si imperata fecerimus, in tempore defuturus est.

I Reg. 19

Denique (si cui ista veteris populi exempla metum & veterum excutere non possunt) quĩ Ecclesiam Iesu Christi, sub Romana monarchia pressam quidem diu, sed non oppressam, contra infinita obstacula non solum conservavit, sed tandem tempore ac ductu optimorum Principum Constantini Magni, Theodosij & aliorum, & omnium maxime nostris temporibus in Germania, Helveria, Suecia, Dania, Polonia, Anglia Gallia, Hollandia, Zelandiaque adversus immensam conspirationum, seditionum, tumultuum bellorumque molem præter omnem spem humanam miris modis propugnavit & auxit: is & nostros inimicos absque dubio redditurus est

H v

scabel



## ORATIO

**Psalmio** scabellū pedū Christo Imperatori nostro, si pia  
cōcordia in ipsi<sup>9</sup> nos albū ac militiā adscribem<sup>9</sup>.  
Caterū ne illud quidem silentio prētereun-  
dum, inclyti Belgæ, quod ut fideliter vos mo-  
neam, & zelus domus Dei & charitas patrię ve-  
strique necessariō mihi exprimunt: nempe, ut in  
albū Christi nomina nostra recipi queant, nosq<sup>3</sup>  
pace certa ac perpetua fruamur, non solū com-  
prehendi & apponi illum, sed & pręponi fœde-  
ribus nostris oportere. Sicuti enim errore perpe-  
tuo non pervenitur ad optatam metam, ita nec  
nostris pactiōibus pacē ullam sperabimus aut  
fidam aut diuturnam, si pacis authorē & bellorū  
potentem moderatorē pacificatione nostra ex-  
cluserimus. Atque ideō nec bella nobis feliciter  
cedent adversus juratos Dei & patrię hostes, si &  
ipsi vel adversarij professi, vel non fœderati con-  
fessi, vel etiam simulatæ accipitisq<sup>3</sup> fidei amici  
esse perrexerimus. Et quia superiorib. annis so-  
la ejus ope superbo latronum jugo soluti, adeō  
non grati in salutis nostrę pacisq<sup>3</sup> authorē fui-  
mus, ut eum fœdere postea cum iisdē hostib. in-  
stro excluserimus, & antiquum Belialē malorum  
omniū certissimā nobis causam inclusum fœde-  
ri, in contumeliā Dei vivi ac veri, confirmaveri-  
mus: apertē dico, vel corrigendū esse nobis hunc  
tantū errorē nunc, Belgæ, vel nō speranda, irato  
nobis Deo, meliora, quā experti sumus hactenus,  
afflictę patrię tempora. Aut enim nō erit in ma-  
nu Dei



## AD BELGAS.

nu Deipotens præfensque vindicta contumelia  
 sue: aut, nisi nos injuriarum tantarum in tam su-  
 blimē Majestātē finem fecerimus, ad exigendas  
 pertinacissimę rebellionis à nobis pœnas expe-  
 ditos, jamque in altū sublato terribiles Domini  
 scorpiones esse, planè dubitandum non erit. Cæ-  
 terum, ut hunc tantū errorē illorum potius, qui  
 cum dignitate publicū ordinē tunc ducebāt, cul-  
 pa cōmissum fateor, quā vestra, Belgæ, quos ad  
 eundē gradum honoris melior spes gerendę Rei-  
 publicę & spectata in patriā fides evexit: ita cor-  
 rigendum eum vobis affirmo, ut & tueri locum  
 & satisfacere muneri suscepto, & respondere pa-  
 trię de vobis expectationi cum laude possitis.

Nisi enim Deo propicio utamur, urcunque  
 nos munire fœderibus & amicitijs externis fate-  
 gerimus, & nidum nostrum vel intra altissimas  
 montiū rupes collocaverimus, nō erit tamē pax  
 impijs, & inveniet ille nobis hostes, feras & volu-  
 cres, quę eversum effractumq; petris illidāt unā  
 cum pullis, quālibet excelsum nidū nostrum. Ar-  
 mabit ille in nos calorū suorū invictū exercitū,  
 & terrā & flāmas & flumina & gladios nostros,  
 quib. ad effundendū sanguinē innocuum impię  
 sceleratęq; abusi sumus. Nō deerunt illi Assyrii,  
 Chaldei, aut si malumus, Hispani, qui nō minus  
 libērer nostrū bibent, quā nos martyriū sanguinē  
 innocentē bibimus: tādēq; nos bellis, seditioni-  
 bus alijsq; malis fractos experimēto ingētū cala-

*Esca. 3a.  
 abdita.*

imitatur



## ORATIO

mitatum (quia his, ut forte minoribus, cauti esse  
noluimus) docebit impijs pactionibus, seu fa-  
ctionibus veriùs, non evitari sed invitari atque  
irritari iram suam, bella, seditiones & pericula.  
Quasque nos ipso excluso pacis ac tranquillita-  
tis rationes inibimus, & perfugij sedes atque ar-  
ces turissimas fabricabimus, eas ille in laqueos,  
foveas & præcipitia convertet nobis: dissipabit-  
que consilia & conturbabit rationes nostras: ut  
ibi corruamus, mergamur ac pereamus, ubi salu-  
tis fallacem anchoram fixeramus.

Et hic quidem clamant, nosque periculi no-  
stri admonent, cum profanæ, tum sacræ historiæ,  
quàm periculosum exitiosumque sit, permittere  
se fidei hostium reconciliatorum. Nam, ut Eth-  
nicas historias omittam, ut non referam quid  
Saulum, quid Achabum, Achazum, Ezechiam  
reges perdiderit, una Pharaonis historia satis o-  
stendit, nullis religionis, legum, iurisiuradi ac for-  
deri vinculis, nullis ostentis & prodigijs, nulla  
Dei bonitate, clementia atque commonitione  
teneri tyrannos posse, ubi semel decreverint  
perdere populû, quin vel cum contemptu sui pe-  
riculi, cæco furore in prosequendo instituto se-  
metipsos supplantent ac præcipitent. Idem quo-  
que abundè probat illustris Machabæorum du-  
cum historia, qui si, ut in vindicanda patriæ & re-  
ligionis libertate strenui promtiq; & paternæ  
virtutis ac zeli æmuli fuere, ita & constanti pru-  
dentia.



## AD BELGAS.

dentiaque imitatores fuissent, & cavere sibi ab hostium suorum insidiosis pactionibus didicissent, melius & vitæ suæ & exercitus patriæque salutis consulissent. Quæ exempla utinam nobis Belgis in extrema hac rerum nostrarum necessitate ac periculo, ubi peccare ac falli ne semel quidem licet, magis sint familiaria & ad manum, præsertim adversus hoc hominum genus, quibus Machiavellica illa consilia, de quibus supra dictum, implent utramque paginam, qui se non modo non regnare, sed nec vivere quidem, nisi nobis sublati, posse putant.

Cum ergo furor sit amentiaque mera, non consilium aut prudentia, excludere pactionibus nostris eum, qui nos eterno suo foedere exclusos includere in manus sævissimorum hostium nostrorum, ac sempiternos cruciatus potest, & jam ad hoc judicium consedit: capiamus consilium ex tempore, non sine ipso, sed cum ipso, & ab ipso: & foederi nostro illud apponamus, vel potius præponamus: quinimmo in illius æternum foedus facta pace recipi velimus. Illud autem si fecerimus, ducemque tam fidum fortemque ad omnia imperata promptè sequentes, minas ac terrores hostium, pericula damnaque privata voluntati ac moderationi ipsius commiserimus ac submiserimus, tunc & bona terræ nostræ comedemus, & pace atque concordia cum hominibus quidem pia & Christiana, cum Deo autem certa perpetuaque



## ORATIO

tuaque fruemur: & ( si qui consurgere in nos ausi fuerint ) ad propulsandos pacis nostrae pertinacissimos adversarios, neque consilio, neque animis, neque viribus, sub tanti Imperatoris vexillis, unquam destituemur.

Aderit enim nobis imperata facientibus ipse Deus Dux & Imperator exercituum nostrorum, nosque consilio & sapientia reget, animis viribusque in hoste armabit, & ab insidijs fraudibusque tuebatur invictos. Et ex adverso dissipabit consilia dolosque, frangat vires atque animos, turbabit frontes obscenas & impudicas immanissimorum hostium nostrorum, ipsosque cum toto exercitu & universa illa proditorum & venalium nebulonum ac fugitivorum caterva & clientela, non vano nec panico, sed vero ac coelesti pavore consternatos dabit in fugam ac disperdet.

Ad quam quidem fiduciam non mediocriter nobis calcar addere debent mirifica Dei in Hollandos ac Zelandos edita nuperrime tutela, salutis ac liberationis beneficia. Quam gentem ut olim bellicosam ac strenuam, sic longa jam pace ac negotiationum usu residere desideremus: cum hodie, quasi imbelli tantum non conteneremus: ita tamen fortiter defensam divinitus modo vidimus, ut illustre ac sempiternum divinae protectionis, neque minus, quam olim Israelitarum ac Machabaeorum fuit, nobile testimonium curae, veritatis, fidei, favoris auxiliique coelestis ad posteros esse possint.

Nam



## AD BELGAS.

Nam cum ab hisce iisdem Hispanis, ut scitis (quibus cum & Italarum & Allobrogum & Germanorum, & nostrae quoque cohortes erant) tanto cum apparatu, quantum nunquam viderat Hollandia, & cui ipsa ferè tellus dehiscerebat, summis viribus maximaque contentione oppugnarètur: & à nobis non solum non levarètur, ut par erat à fratribus ac vicinis in tali periculo, quod non poterat non in nosipsum redundare: sed gravibus insuper incommodis afficeretur: adeò non caruere ducibus, animis, viribus & consilio, ut fidei ductu, fortitudine ac prudentia inclyti Principis Aurantij ac sociorum subnixi, superbos acerbissimi hostis spiritus viresque contuderint fregerintque, & se in libertatem vindicaverint, & terrorem nominis sui per multas præclarasque victorias navales ad vicinos hostes suos longè lateque circumtulerint. Adeò, videlicet, beatus est *Psal. 52.* ille populus, qui Dominum illum exercituum Imperatorem pro Deo habet, & quem sibi ille in hereditatem elegerit. Res autem fallax equus ad salutem, & exercitus quamlibet terribilis ac numerosus ad victoriam. Evertit enim ac dissipat Dominus consilia gentium, & irritos reddit principum ac populorum conatus. Et recte habet illud Psalmi: Tu ipse Rex meus es, *Psal. 44.* O Deus: dispone tu salutem Iacobo. Per te enim hostes nostros succutiemus: per nomen tuum conculcabitur adversarios nostros.

Neque



## ORATIO

**Deut. 28** Neque enim sperabo in arcu meo, neque gladius meus conservabit me. Tu autem servas nos adversus omnes adversarios nostros, & pudes facis eos, qui nos oderunt, &c. Quibus optime consonant ipsæ promissiones divine per manū Mo-  
 sis populo Dei factæ, si in fide maneret. Efficiet (inquit Deus ipse) Dominus, ut hostes tui, qui adversum te insurgent, ante te corruant. Per iter unū egredientur cōtra te, & per septē vias fugiēt coram te. Eriget te Dominus sibi in populū sanctū, sicut juravit tibi, siquidē præcepta ejus servaveris, & in vijs Dei tui incesseris. Tunc demum omnes populi terræ videbunt, nomen Domini super te invocatum esse, timebuntque sibi à te. Ponet te Dominus in caput, & non in caudam: erisque tantum superior, nec unquam inferior: si modò audieris præcepta Domini Dei tui, quas ego tibi præcipio hodiē, ut custodias ac facias ea. Non deflectes à cunctis sermonibus, quos ego præcipio tibi hodie, neque ad dexteram neque ad sinistram, ut sequaris deos alienos, eosque colas, &c.

Hæc sunt sanè insignia illa liberationis beneficia, quæ nos, aut animis concidere, aut segniter agere non patiuntur, sed ad colendum Deum nostrum alacriter properantes bono esse animo, & spectare ductum ac vexilla Servatoris nostri Dei, non respectare ad minas offensasque impiorum hominum jubent. Hujus enim fidelium  
 miliciam



## AD BELGAS.

militiam professis, & universam fidei panopliā mysticam indutis, primò per quolibet impedimenta spiritualium remorarum & nequitiarum percurrere in patentem, liberum & amœnum pietatis campum, atque inde & hominum & demoniorum tam vanas minas, quàm injustas offensas contemnere licebit. Ephes. 6

Quamobrem, ne diutius vos teneam, Belgæ, appellandi, interpellandi, atque adeò, si queam, impellendi mihi iterum ac sæpius estis, citra exceptionem omnes, & per vestram omnium salutem, per sacrosanctum nomen Magni Dei & Servatoris nostri Iesu Christi rogandi atque obtestandi, ut, quam expositam oblatamque vobis hodie videris, salutis ac beatitudinis occasionem ac viam, eam seriò gratisque animis amplecti, premere atque retinere velitis. Et quoniam ne conscientie quidem nostræ, nedum Dei, qui maior est cōscientia, iudicio negare possumus, quin & impio verbī divini contemptu, cum insana ac detestanda simulachrorum veneratione & horrenda sanguinis innoxij profusione ad iustissimā vindictam Deum omnipotentē hactenus provocaverimus, cuius veram severitatem, nisi vera pœnitētia & fide, declinare minimè possumus; posita tandem infelicissima miserrimaque peccandi libidine ac pertinacia, cum vera gravissimorum peccatorum agnitione, atque aegritudine animorum, firmāq; in Christum fide, Deo

I

Omni-



## ORATIO

Omnipotenti omnem iusticiæ & veritatis lau-  
 dem tribuendo, eorum omnium ab ipso per Chri-  
 stum misericordiam veniamque suppliciter im-  
 ploremus. Ne committamus, dum vel purgare  
 ac defendere tam atrociam peccata, vel elevare eo-  
 rum magnitudinē contendimus, atque hoc modo  
 usitatas in maiestatem illius & verbi veritatem blas-  
 phemias evomere non desinimus, ut, cuius salu-  
 tares admonitiones & consilia verasque minas  
 stolidè contempsimus, ejus potentem manum, fla-  
 gella, & vires terribiles nostris in poenis ac mi-  
 serijs extremis serio experiri cogamur. Non  
 enim vel causa vincemus in iudicio, vel viribus  
 superabimus in conflictu, vel evitabimus dolis  
 in fuga, veridicum os, iusticiam, potentiam sa-  
 pientiamque tanti iudicis, bellatoris ac vindicis.  
 Et licet ad oppugnandum illum, adque propu-  
 gnandam malam causam nostram, omnes so-  
 phistarum gryphos, omnemque mundi poten-  
 tiam advocemus: res tamen ipsa docebit, & sti-  
 pulam esse, & paleas atque quisquillas ad flatum  
 oris divini universam ostentationē artium viriumque  
 humanarum. Et nihilo feliciores contra Deum  
 cuiusque unctos expeditiones nostræ futuræ sunt,  
 quam Senacheribi, Olofernisi, Antiochi, Iuliani,  
 Licinij, Maxentij, & similium hostium Ecclesiæ  
 Dei fuere: dabimusque tandem victi, & ad ex-  
 tremum consumti cum Iuliano Imperatore etiā  
 fientes & convitantes victoriæ laudem vi-  
 ctori



## AD BELGAS.

tori nostro: Vicisti Galilæe. Adeò vincere ac  
 triumphare illum necesse est, qui & omnipotens,  
 & campi & armorum & exercituum Dominus  
 est. Neque rursus desipiamus aut insaniamus  
 usque adeò, ut amore vefano miselli huiusce cor  
 pusculi, quod, utcunque superbiat modò, tamen  
 exanime mox cadaver, ac putris esca vermium  
 futurum est: & studio vitæ tam brevis ac fragilis,  
 quæ ut maximè integrum curriculum temporis sui  
 decurrat, nō le tamen casibus obnoxia est: & si  
 quas habet voluptates, non sine plurimo felle,  
 frui eis potest: gloriam Dei nostri, ac sempiternā  
 & omnibus exemptam casibus, plenamque veris  
 voluptatibus vitam projiciendam nobis existi-  
 memus. Aperiamus & oculos & aures, ac videa-  
 mus mirifica divinæ tum clementiæ tum poten-  
 tiæ opera: audiamus sonantem orbi tubam cœ-  
 lestem: Venite & videte opera Domini. Excite- *Psalm. 48.*  
 mus & explicemus lumē ingeniū mentisque no-  
 stræ, & suspicientes in cælum, ubi gloriam Dei *Psalm. 12.*  
 videmus celebrari, cogitemus non solem, non lu-  
 nam tam crebris defectibus, non aëra, non cælos  
 ipsos tam assidua tristitia, non terram tot moti-  
 bus, neque maria fluminaque tam crebris in ter-  
 ram inundationibus ac minis frustra nobis con-  
 temtæ majestatis supremæ ergò, Creatoris sui irā  
 tristisque pœnas denunciare. Et cum sciamus,  
 non abs re rotiens velut manu divina terribili  
 specie virgas flammeas in cælo ad horrore vi-

I 4

sentiunt



## ORATIO

**Luc. II.**

fentium protendi nobis in approbationem doctrinae coelestis, quae talia signa irae divinae vel ad salutem observare: vel, si nullis omnino documentis cedere cōtumaces volumus, aspicere praesentem vindictam, & simul perire nos jubet: credamus, aut hoc ipsum esse, aut nullum aliud salutis tempus. Meminerimus hodie nobis duas has diversissimas, alteram salutis, alteram exitij sempiterni, propositas esse vias.

**Deut. 28**

**Mat. 24**

**Eccl.**

Quod si optionem vitae hodie spreverimus, & judicij divini severitatem expectandam nobis pervicaciter atque contemti putaverimus, certò statuamus, sicut veritas oris Dei (cui nec anni nec angeli praescribunt) quavis longissima praescriptione temporis non deficit neque intermoritur, ita ruituram potius universam hanc coeli terreque machinam, quam irritas fore minas & plagas ejus, quas per Moysen, per prophetas, per apostolos, perque Christum ipsum unigenitum suum ingrato, impio & rebeli populo suo tantò antè denunciavit.

Neque est profectò (siquidem meminimus, nos ipsum illū oleastrū esse, qui, sicuti gratia Dei insitus est oleae, a qua quondam nativi rami defracti fuere, ita & ipse defringi facilius, ut alienus, poterit) quòd aut majore nobis, quàm Israelitis ipsis & alijs populis cōtigat olim, impunitatē polliceamur, aut Deum posthac minus veracem ac severum mundi judicem nostra causa futu-

rum



## AD BELGAS.

tum imaginemur, quàm vel prisco mundo, vel Sodomæ Gomorræque, vel etiam Israëlitis, atq; ipsis adeò angelis olim suis fuisse legitur. Cum enim non pars tantùm aliqua veritatis, sed ipsa veritas Dei tota indivisa duret in æternũ, nec minùs reverenda tremendaque sũt judicia divina, quàm amandæ atque amplectendæ promissiones, necessarium est, ut, quemadmodũ benignitatis ejus atque clementiæ erga cultores suos eosque, qui ab errore in viam redeunt, constans, certa perpetuæque voluntas est, sic & judicium horribile verè paratum sit impijs & contumacibus. Redeamus ergo & nos ad sanitatem: & quod honorificum Deo Dominoque nostro Iesu Christo, ac salutare Ecclesiæ Dei, & felix faustumque patriæ nobisque universis sit, agendo veram pœnitentiã exemplo veræ Ecclesiæ, sentire ac percipere immensæ bonitatis Dei ac misericordiæ paternæ dulcissimam veritatem atq; constantiam, quàm obstinata peccandi libidine, & æmulatione impiæ synagogæ terribilem comminationum & judicii divini & supplicij sempiterni potentiam ac severitatem exspectare atque experiri malimus.

Ipse interim Deus verè Opt. Max. Pater unigeniti & coæterni Filij sui & magni unicique Servatoris nostri Iesu Christi, qui post tantam cladum Belgicarum tempestatem jam tandem salutifera, & nō dubiè gratiæ pacisque suæ vultu

I iij

foreno



## ORATIO

Areno vos respicere dignatus est, patefactis pe-  
ne in ipso opprimenda patriæ extremo discrimi-  
ne atque articulo consilijs, monstratis insidijs, il-  
lusa spe, fractis viribus, pulsisque è sinu vestro  
præfidijs perniciosissimarum viperarum & pro-  
ditorum vestrorum, det vobis de gloria sua &  
publica salute consultantibus ac dimicantibus  
Spiritus suum Sanctum, Spiritum sapientiæ &  
consilij veritatis ac timoris sui, fortitudinis &  
constantia, ut omnibus viribus atque consilijs  
in unam ipsius gloriam ac salutem publicam  
coninixi intentique, victis, fuis fugatisque sævis  
atque impijs tam Dei, quàm patriæ hostibus, o-  
peratum vobis, & honorificum Deo Servatori  
Patrioque trophaum erigatis, ac læ-  
tum dignumque Christo trium-  
phum celebretis.



## EZECH. XXIII.

*Dic ad eos: Vivo ego, dicit Dominus. Nolo mortem  
impij: sed ut convertatur impius à via sua, & vivat.  
Convertimini, convertimini à vijs vestris malis: cur  
enim moreremini domus Israel?*

**Errata typographica facile corriget  
lector.**



# BALEVS. VIATOR.

**I**lle diu felix populus, longaque beatus  
Pace propè innumeras qui cumulârat opes: *Baleus.*

Infelix, heu, Belga ruens civilibus armis  
Ipse suum proprio confodit ense latus.

Dic, age, quæ misero tam cœci causa furoris? *Viator.*  
Viscera quid rabido devorat ore sua?

Accipe, quâ quæris, causam crimenque malorû: *Baleus.*  
Nempe suum vēcors temserat ille Deum:

Vanâque præcipiti cumulârat numina fastu:  
Inque Deum stolidâ verterat arma manu.

Innumeros ferro, flammis, undisque prophetas  
Merserat, inque cruces egerat, inque rotas.

Quid mirum est igitur, sævus, furiosus & excors *Viator.*  
Si perit ense Dei, qui petit ense Deum?

Quid mirû est, nostrû, Tellus Cœlumq; Fretûq; *Baleus.*  
In nos si cupiant exonerasse nefas?

Si simul in nostros arment se cuncta dolores,  
Quorum cuncta dolent contemnerata lue.

Sed quæ tantorum miseris medicina dolorum? *Viator.*  
Ede, precor, fidus num quis erit medicus?

En tibi: Certa dolor pressis medecina dolorû est *Baleus.*  
Sanctâque Christicola cum Metancea fide.

Certus & hic medicus, fecit qui vulnera Belgis:  
Ipse dabit certa pharmaca certa manu.

Mira quidem, sed vera refers: clementia summi *Viator.*  
Summa Patris natos carpit amatque suos.

Ergo, age, cede Deo, scelerû & cruciare dolore: *Baleus.*  
Cede Deo, & Christum suscipe, crede Deo,

Qui tua salvifica purgabit vulnera lymphâ,  
Inque tuos hostes lata trophæa dabit.



EXCVSA IRENOPOLI,  
Anno salutis CIO. IO. LXXVIII.  
mense Iunio, gratia & privilegio Summi  
Pontificis & Regis Catholici.



